

**Bádha Ngali
gba Yesu Kilisito maka li
Luka
aye lie ko
Eli na kalanu**

Bádha Ngali gba Yesu Kilisito maka li Luka aye lie ngasuno Yesu maka Məkobho inde li Ebhe apa nani me ni aha e pi piga gba omafsalaele la di ne pi ndu opiga na píla doto hana. Luka ngakpokpo me Bu Bhobua gba Ngámá-a a'i nani Yesu ngubula nakpokpo Bádha Ngali pi obhulu ndibhili (4:18). La, Bádha Ngali ango-o abedhe ne ndjinga bhú e pi okpála inde bhú o ne omulopolo gba o hana. Engú na ndjili abhú bhuku gba Luka ngbéngbé ane la mane bhú oalo na kalanu inde ngakpokpo 'ngú nago gba Yesu. Engú na djali ango-o ane matá mane bhú 'so 'kpí nedhinga na'u ka Yesu abhúlá. A ko bha Luka bini inde akpokpo 'ngú bhú bhuku na Kulu gba obhulu titima gba Yesu pindji nabhele a la di-e nayangba ka nabhuka bhú Kilisito pita na'u ka Yesu abhúlá-o.

Bhú Bádha Ngali inde-e, u ngagama 'ngú naali pindji mayo, ne pindji Bu Bhobua, ne pindji kulu gba olisi bhú kulu gba Yesu, di ne lele maka li Ebhe ngambu li sisiti 'ngú gba okpála lie-o.

Ongbengbe ongú inde bhú bhuku inde-e ngae inde:

Eli na kalanu 1:1-4

Nazu lie ne nadu bhú ndili lie gba Djaá bhulú nabatisa okpála di ne Yesu 1:5 - 2:52
 Kulu gba Djaá bhulú nabatisa okpála 3:1-20
 Batisimo di ne nale inde li Djabulú ale Yesu ne e-o 3:21 - 4:13
 Kulu inde li Yesu amene e bhú ká okpála bhú Galilaya 4:14 - 9:50
 Dhuku gba Yesu nayie bhú Galilaya ngú nanu abhú Yelusalema 9:51 - 19:27
 Oekpí nasoso gba Yesu abhú Yelusalema 19:28 - 23:56
 Nazuku gba Yesu, ne nakoto ka ani li okpála, a la di-e na'u ka ani abhúlá-o 24:1-53

Lita 'ngú-o

¹ Ndai ma na mukunda Tiofile,
 Okpála bhelé ale naye todú na ongú inde akodho 'kpí bhú ká ya-o. ² U aye ongú ango-o maka li okpála inde au nayie li lilita-a, akpokpo pi ya lie ko. A ko okpála inde adu nakpokpo eli gba Ebhe-o . ³ Kaka-a, ngama di-e, pita nagili 'ngú tété má bhotobhoto nayie li dudu-o, ma au ndjindji me, ma kpokpo kúkú pi mu li lelele, bhele kpála Tiofile, maka li ongú ango-o akodho 'kpí lie ko. ⁴ Ma kpokpo kúkú pi mu, amba mu mbila kukulu 'ngú na ongú inde u asuno e pi mu ko.

Andjelu apa me u azú Djaá bhulú nabatisa okpála

⁵ Bhú nedhinga li Elode adu lie 'ngbé ngámá na ndu doto na Yudaya-a, dimandé bini gba Ebhe-e adu oo. A adu 'li ani me Djakalia, ani adu

bhú libi odimandø gba Abia. A adu 'li wala ani me Alidjabheti, ani adu bhú piga gba 'ngbé dimandø Alona. ⁶ Ndu uo bhisi hana adu bhú djila Ebhe ngbingbili. U atsia adu amene ndu líli gba Ngámá Ebhe-e hana. ⁷ Engú bini, ndili du ka uo de, anga Alidjabheti adu ne izude. La di-e, u adu ndu o bhisi hana me u nde agbembe.

⁸ Ekpí bini, Djakalia adu amene kulu na dimandø gba e kala Ebhe, anga adu ekpí na libi gba uo-o ngú namemene. ⁹ Maka li odimandø adu amemene lie, Djakalia atsia asia ngasa ngú nanu natsulu mungotsi pi Ebhe abhú 'ngbé 'ti gba Ngámá Ebhe, bhú titina na bubu-o. ¹⁰ Nedhinga ani adu atsutsulu lie, ndu okpála hana adu ayo Ebhe akilidjo.

¹¹ Abhomu-o, kolo má gala me-e, andjelu gba Ngámá Ebhe-e akoto li ani. Ani alu de bili natsulu mungotsi-e ne li pápá na kokpa. ¹² Li Djakalia au ani lie me-e, tsulu aholo amene ani, mabhundja gba ani-e atsia angbingi. ¹³ Engú bini, andjelu-o apa pi ani me: «Djakalia, mo odjé tsulu de, anga Ebhe adje nayo gba mu-o adje. Wala mu Alidjabheti azú pi mu ndili na bhobhoko. Mo ogísila 'li ani me Djaa . ¹⁴ Mo odú ne djali naali, li okpála bhelé tsia kpí di djali ka nazu ani-o. ¹⁵ Ani adú 'ngbé kpála bhú djila Ebhe. Ani ndjí vino de, ani ndjí di pandi na kpekpeke de. Ani abédhe ne Bu Bhobua me ani nde nga bha bhú 'bu 'hi e. ¹⁶ Ani agié ongisi na Isalaele bhelé li pápá gba Ebhe, Ngámá gba o-o. ¹⁷ Ani adú amene kulu kala Ebhe bhú dabili bini ne bua di ne angu maka Polofeta Eliya. Ani aléke

engú sūnda odyi ongisi ne ongisi gba o-o. Aní adjí mabhundja gba okpála na kpekpeke 'ndjì, u tsia kólo ngbingbili,† ngubula naleke okpála inde bedhe pì Ebhe Ngámá.»

¹⁸ Abhomu-o, Djakalia ayi andjelu-o me: «Ma ambíla la lele pì me a ko kùkulu 'ngú-o? Padhá de, anga ma agbe, wala ma akolo la di ne kalanga bhelé.» ¹⁹ Andjelu-o atsia agie pì aní me: «Ngama-a, ma ne Gabiele, ndu 'kpí hana ma dudu de Ebhe. Aní atima ma me ma go kpokpo bádha ngali inde-e pì mu. ²⁰ Engú bini, li mu bhuka engú ma apa e pì mu-o lie de-e, kaka-a, 'bhø mu aní, mu tí da nagama 'ngú belegu de bini akólo li 'kpí li ongú ango-o améne lie lie ko. Engú inde améne lie na paká li nedhinga li Ebhe a'o e-o.»

²¹ Li nedhinga bhomu-o, okpála adu adjeke Djakalia, u adu angamba ka aní adu abhue lie bhú 'tì Ebhe oo naali-o. ²² Aní akoto lie, aní ale nagama 'ngú pì uo pima. Abhomu-o, u atsia ambila me oo, aní au engú na ngangamba gba Ebhe-e au. Aní adu asuno 'ngú pì uo ne 'kpa e, aní tí da nagagama ne 'bhø e de.

²³ Li nedhinga na kulu gba aní andjia lie, aní atsia agie lie agba e. ²⁴ Pita nedhinga bhomu-o, wala aní Alidjabhetì atsia abi 'bhi. Aní awo nga bha lie ngubula epe bhuluvue libhому. Aní adu apa me: ²⁵ «Tsia nga engú inde li Ngámá Ebhe amene e muma-o. Aní abhundja ma. Mbia inde-e, aní a'e ehe inde nako adu aha numu muma bhú ká djila okpála a'e.»

† 1:17 1:17 Tsia bhú Mal. 3:23-24.

Andjelu akpo 'ngú pindji nazu Yesu

²⁶ Li ebhi gba Alidjabheti akolo lie ne epe madhia-a, Ebhe atima andjelu Gabiele bhú kuti bini na ndu doto na Galilaya, inde 'li e me Nadjaleta.* ²⁷ Ani atima ani gba tsangba bini inde adu adjeke naha lie ne bhoko bini. A adu 'li bhoko ango-o me Djodjefu , ani adu bhú piga gba 'ngbé ngámá Davidi. Tsangba ango-o, a adu 'li ani me Malia . ²⁸ Andjelu-o ali agba ani, ani atsia ayi ani me: «Mú oo! Ngamu inde asia bádha bhú 'bu gba Ebhe-e , Ngámá Ebhe bhú dabili bini ne mu.» ²⁹ Malia angamba ka eli bhomu-o naali. Ani adu ayi bua e me: «Ta nayi inde-e pi?» ³⁰ Abhomu-o, andjelu-o atsia apa pi ani me: «Malia, mo odjé tsulu de, anga mo osia bádha bhú 'bu gba Ebhe-e asia. ³¹ Tsia nga, mo obí 'bhi, mu zú ndili na bhobhoko, mu tsia gísila 'li ani me Yesu. ³² Ani adú 'ngbé kpála, u tsia dú a'í ani me, Ndili gba Apí 'Kpí. Ebhe Ngámá a'ó me ani u maka ogbi e Davidi. ³³ Ani au duduuma ne duduuma pí piga gba omafalaale. Nau gba ani-e ndjia de.»

³⁴ Malia atsia ayi andjelu-o me: «Engú ango-o améne lie lele pi? Padhá de, anga ma kunda nga naama bhoko de!» ³⁵ Andjelu-o agie pi ani me: «Bu Bhobua agó pí mu, li angu gba Ebhe Apí 'Kpí búku mu maka kulu zini. Kaka-a, ndili inde mo ozú e adú bubu, u atsia du a'í ani me, Ndili gba Ebhe. ³⁶ Tsia nga okala mu Alidjabheti

* **1:26** 1:26 Nadjaleta: Nayie bhú Yelusalema akólo bhú Nadjaleta-a, a ko kilometele kámá bini. Tsia bhú Luk. 1:19.

di ne ebhi. Aní azú ndili na bhobhoko, abana aní nde lie ne kalanga bhelé. Kpála nako u adu a'i e me izude-o. Mbia inde-e, ebhi gba aní-e ibili ne epe madhia, ³⁷ anga kpéke da 'ngú pí Ebhe belegu ade bini.» ³⁸ Abhomu-o, Malia atsia apa me: «Ma ne bali gba Ngámá. A ayo me ndu 'ngú mo opa e hana, a mene lie muma moko.» Pipita-a, andjelu-o atsia atapa.

Malia anu natsia Alidjabheti

³⁹ Bha bhú oekpí bhomu-o, Malia ayie, aní anu má gala bhú kuti bini na ndu doto na ndu ká eta na Yudaya. ⁴⁰ Aní akolo lie oo, aní alí bhú 'ti gba Djakalia, aní atsia ayi Alidjabheti. ⁴¹ Lí Alidjabheti adje maka lí Malia ayi aní lie me-e, ndili-e atsia atili bhú 'bu aní. Abhomu-o, Alidjabheti atsia abedhe ne Bu Bhobua. ⁴² Aní atsia asula kpekpeke me: «Ebhe aha bisagu pí mu ane ndu olisi hana, bisagu gba aní-e di pí ndili inde mo ozú e-o! ⁴³ Ma ne da me 'hi Ngámá gba ma-a go tsia ma-a? ⁴⁴ Tsia nga, lí nedhinga inde ma adje maka mo oyi ma lie me-e, ndili inde bhú 'bu ma-a atili ne djali hana. ⁴⁵ A ko djali pí mu, ngamu elø inde abhuka! Padhá de, anga engú inde lí Ebhe apa e pí mu-o, améne lie mamene.»

Etsi gba Malia

⁴⁶ Abhomu-o Malia atsia atoko Ebhe me:
«Bua ma ngadhègè Ngámá,

⁴⁷ bua ma abedhe ne djali pí Ebhe Mukobho
gba ma-o,

⁴⁸ anga aní abhundja ma, bali gba e-e ko.

A moko, nayie pí mbia inde-e,

- ndu opiga hana adú a'i ma me,
 ma ne ɔlɔ inde asia bisagu ka Ebhe,
 49 anga Ebhe na Angu amene onǵú na ngbeng-
 bengbe muma.
 A ko Ebhe na bubu,
 50 ndjinga gba ani-e ngadu dudu ma ne dudu ma
 pi okpála inde ngakpe ani ko.
 51 Ani amene ngbengbe 'ngú ne angu gba e-o.
 Ani atsambala okpála na 'ngbé bua.
 Ani atsia amene me mabhundja gba uo-o kolo
 padhá.
 52 Ani akɔ ongbengbe onǵamási ne kuto,
 ani atsia a'e'e okpála na padhá ne abhúlá.
 53 Ani aha ehe bhelé pi obhende adu ne gumu-o,
 ani atsia agie obhulu tia ne 'kpa o padhá.
 54 Ani ateteke omafsalaele, obalise gba e-o.
 Ani 'ili 'to e de li nasuno bádha 'ngú gba e
 ndu 'kpí hana,
 55 maka nani ani apa lie pi onguo ogbi ní
 Abalahama
 ne opiga gba e-o.»
 56 Malia asi ne Alidjabheti masikpe de epe bata.
 Pipita-a, ani atsia agie lie agba e.

Alidjabheti azu Dja

- 57 Li nedhinga nazu ka Alidjabheti akolo lie,
 ani atsia azu ndili na bhobhoko. 58 Li okpála inde
 asili kuti denge ani-e, di ne obhe na piga gba ani-
 e adje lie me, Ebhe adje bha ndju ndjinga ani-e,
 u atsia adu akpi djali bhú dabili bini ne ani.
 59 Pita poso bini-e, u ago ngú nato ndili-e
 bhú gandja. U adu akunda nagisila 'li 'dyi ani
 Djakalia. 60 Abhomu-o, 'hi ani atsia apa me: «A

mo-o ade, adú 'li ani me Djaa.» ⁶¹ U atsia apa pi ani me: «Bhú piga gba m̄-o, kpála bini inde ne 'lì bhom̄-o ade.» ⁶² Abhom̄-o, u atsia amene 'kpa o pi 'dyi ani ngú nayi ani me ani akunda me u gisila 'li ndìlì-e pi. ⁶³ Djakalia amene 'kpa e pi uo me u go pi ní ne pála ndula, ani atsia aye pépé me: «A 'li ani me Djaa.» Ndu uo hana atsia angamba naali. ⁶⁴ Bha li nedhinga bhom̄-o, 'bhe ani abhulu, ani aholo nagama 'ngú, di ne nadhөгө Ebhe. ⁶⁵ Abhom̄-o, ndu okpála hana inde asili kuti lingo uo-o, aholo adje tsalu. Ngali na engú angoo atsia aya bhú ndu doto na ndu ká eta na Yudaya libhomu. ⁶⁶ Ndu okpála hana inde adu adjedje-e, adu abhundja pépé, u atsia adu apa me: «Mbo! Ndili angoo, adú-e maka da?» Angu gba Ebhe-e adu bha ndju bhú dabili bini ne ani.

Djakalia akpokpo ngbengbe 'ngú gba Ebhe

⁶⁷ Djakalia, 'dyi ndìlì-e, abedhe ne Bu Bhobua. Abhom̄-o, ani atsia aholo nakpokpo 'ngú maka polofeta me:

⁶⁸ «A ayo me, u dhөгө Ebhe,
Ngámá gba omafsalaele-o,
anga ani abhundja okpála gba e,
ani atsia agbegbe uo bhú bali.

⁶⁹ Ani atima kpála na angu bini
bhú piga gba Davidi, bali gba e, ngú nakobho ya.

⁷⁰ A bhom̄-o engú inde ani apa nani e didili bhú 'li obubu opolofeta gba e-o.

⁷¹ Ani apa nani me, ni akóbho ní sa 'kpa ndu obhulu yala gba ní-e hana,

di ne obhende ngakunda amene ní sisiti-o.

72 Aní adje ndjinga onguo ogbi ní,
aní atsia abhundja di gandja na bubu gba e-
o.

73 Silika nani inde aní atụ e pí ogbi ní Abalahama-
a,
aní améne pí ní mamene.

74 Pita nakobho ní sa 'kpa obhulụ yala ngubula
me ní améne kulu pí ní ne tsulụ de,

75 amba ní dhөгө ni ne bua ní hana.
Ní dụ di bhú djila ni ngbingbili
ndụ 'kpí hana bhú mukobho gba ní-o.

76 Pí mụ-o, ndika ma, u adú a'i mụ me, polofeta
gba Apí 'Kpí,
anga mo onú kalanụ
ngú naleke kpadji gba Ebhe-o.

77 Mo osúno pí okpála gba ani-e me, aní a'é siti
'ngú inde bhú uo-o ma'e,
aní tsia kóbho di uo.

78 A ko anga Ebhe gba ní-e abedhe ne ndjinga
bedhe,
kaka-a, aní atíma zì 'kpí pí ní maka zì 'ndji
'la na kèkpí.

79 Aní asúno lie pí obhende bhú biti di ne
obhende ne tsulụ kuo,
ngubula me ní dhukụ lí kpadji na guo 'ngú
,»

80 Ndili-e adụ abhele, aní atsia adụ asia kpéke
bua. Aní adụ nadụ bhú omili bili akolo lí 'kpí
inde aní asuno lie lie mbámbá pí omaf salaele
ko.

2

Maliá azu Yesu (Tsia bhú Mat. 1:18-25.)

¹ Li nedhinga bhom̄-o, Agosite, 'ngbé ngámá na Loma , aha líli me u ye 'li okpála hana inde pílá doto gba ni-o. ² Gina naye 'li okpála ango-o amene lie me Kiliniusi nde ne 'ngbé ngámá na Silia. ³ Nd̄a okpála hana ad̄a an̄ me u ye 'li o. Abhom̄-o, kpála ne kpála atsia an̄ bhú k̄ti u azu ani bhú e ko.

⁴ Djodjefu ayie bhú k̄ti na Nadjaleta, bhú ndu doto na Galilaya, ngú nan̄ bhú ndu doto na Yudaya, bhú k̄ti inde u a'i e me Beteleme. A ko bili inde u azu 'ngbé ngámá Davidi lie-o, anga ngaani makpe, ani d̄a nani bhú piga gba Davidi ko. ⁵ Ani an̄ oo me u ye 'li ni, bhú dabili bini ne Malia , eḷe inde ani ad̄a adjeke naha e ko. Eḷe ango-o ad̄a ne ebhi. ⁶ U ad̄a lie abhú Beteleme-e, ekpí nazu ka ani atsia akolo. ⁷ Ani azu ndili na bhobhoko, gina ndili gba e ko. Ani agagala ani ne bongo , ani atsia aseke ani bhú ehe naz̄ 'he gba on̄, anga dabili d̄a pi uo bhú 'ti gba ogomago-o de.

Andjelu akpokpo bádha ngali pi om̄lila gba okand̄e

⁸ Bha bhú ndu doto bhom̄-o, om̄lila gba okand̄e ad̄a asili abhú 'gu ngú nalila on̄ gba o-o. ⁹ Andjelu gba Ebhe-e akoto li uo. Sangu gba Ebhe-e asa uo ngbalina maka zi 'kpí. Abhom̄-o, u atsia adje tsul̄ naali. ¹⁰ Engú bini, andjelu-o apa pi uo me: «Yi adjé tsul̄ de, anga ma ago akpokpo pi yi bádha ngali inde ahá djali naali pi

ndu okpála hana. ¹¹ Naki bhú kuti gba Davidi-e, u azu Məkobho pi yi. A ko Kilisito , Ngámá. ¹² Yi tsia 'he inde yi ambíla aní ka e ko: yi abháka ndje ndili u agagala e ne bongo, u atsia aseke e bhú ehe nazu 'he gba onu.» ¹³ Kolo má gala me-e, bhiti oandjelu ayie abhúlá, u ago abhaka andjelu bhomu, u atsia adu adhөгө Ebhe me:

¹⁴ «Sangu pi Ebhe inde abhúlá,
guo 'ngú gba aní-e du píla doto pi okpála
inde aní akunda o ko!»

Omúlila anu abhú Beteleme

¹⁵ Li oandjelu-o agie lio lie abhúlá-a, omúlila atsia apa sunda o me: «Ní nu kolo nga bha abhú Beteleme, amba ní u engú inde akolo oo, engú inde li Ebhe Ngámá asuno e pi ní ko.» ¹⁶ U anu bhú holo, u abhaka Malia, Djodjefu ne mboye ndili-e me u nde aseke aní bhú ehe nazu 'he gba onu. ¹⁷ U au aní lie, u atsia akpokpo 'ngú inde li andjelu apa e pi uo pindji mboye ndili bhomu-o. ¹⁸ Ndu okpála hana inde adje engú li omúlila adu apa e-e, angamba naali. ¹⁹ La-a, pi Malia, aní adu alila ndu 'ngú bhomu-o hana li bua e ndjindji. Aní atsia adu abhundja pépé. ²⁰ Pipita-a, omúlila aholo nagie lio. U adu aha sangu pi Ebhe, u atsia adu di adhөгө aní ngubula ndu 'ngú inde u adje e ne bhende u au e hana, anga ndundu hana akodho 'kpí maka li andjelu-o akpokpo pi uo lie ko.

U anu ne Yesu bhú 'ngbé 'ti Ebhe gba omaYuda

²¹ Bhú ekpí na madjina pita nazu aní-e, li nedhinga nato aní bhú gandja akolo lie, u atsia

agisila 'li ani me Yesu. A bhomu-o 'li inde li andjelu asuno e kala me 'hi ani bi 'bhi ani-o.

²² Li nedhinga navulu lie pita nazu ka Malia akolo lie, maka li líli gba Moidje apa lie, u atsia anu ne ndili-e bhú Yelusalema ngú na'o ani sa 'kpa Ngámá. ²³ Padhá de, anga u aye bhú líli gba Ngámá-a me: «Ndú ongisi na obhosibhosi na gigena hana, u a'ó uo kpí pí Ngámá.†» ²⁴ U atsia aha di makiso maka li líli gba Ngámá-a apa lie me: «A ayo naha bebhe bhisi. I du mo-o de-e, mu de ha ongisi bebhe bhisi.»*

Simeona agie heni pí Ebhe ngú Yesu

²⁵ Bhú nedhinga bhomu-o, kpála bini adu nani bhú Yelusalema, a adu 'li ani me Simeo. A ko nani kpála na ngbingbili, ani adu amanga Ebhe. Ani adu adjeke nedhinga li Ebhe a'é likabhu gba omafalaele lie ko. Bu Bhobua adu bhú dabili bini ne ani. ²⁶ Abhomu-o, Bu Bhobua atsia apa nani pí ani me, kala nakpi ka ani-e, ani aú ngaiza Masiya inde li Ngámá atima e-o. ²⁷ Nedhinga li okpála inde azu Yesu ago ne ani lie ngú namene maka li líli apa lie li 'ngú gba ani-e, Bu Bhobua ato bhúla Simeo abhú 'ngbé 'ti Ebhe gba omaYuda. ²⁸ Abhú 'ti Ebhe oo, ani aha ndili-o, ani abi ani sa 'kpa e, ani atsia agie heni pí Ebhe me:

²⁹ «Ngámá, mbia inde-e, maka mo opa lie,

† **2:23** 2:23 Tsia bhú Eki. 13:2, 12. * **2:24** 2:22-24 Bhú líli gba omaYuda-a, i du nani me ebe nde azu-o, a ayo me ani nu ngaiza bhú 'ngbé 'ti Ebhe gba omaYuda, ani vulu lie, amba ani kolo bubu kala Ebhe. Tsia bhú Lev. 12:8.

m̄ ti da na'o ma, bali gba m̄-o, me ma n̄
ne guo 'ngú,

³⁰ anga ma au mukobho gba m̄-o ne djila ma au.

³¹ Mukobho inde mo otima e kala nd̄ okpála
hana-o.

³² Aní adú eke p̄ om̄pagano.

Aní tsia d̄ s̄angu gba omāsalaele, okpála
gba m̄-o.»

³³ 'Dyí Yesu ne 'hi Yesu angamba naali ka engú
inde u ad̄ apa e li aní-o. ³⁴ Simeo ayo me Ebhe
tuko bisagu p̄ uo, aní atsia apa p̄ Malia, 'hi Yesu
me: «Ebhe abh̄ nd̄li inde-e nḡbula me okpála
bhelé bh̄ ká omāsalaele li bh̄ mangimbo,
amba Ebhe 'e'e matá okoko bh̄lá. Aní adú ehe
inde li Ebhe ngasuno e, li okpála bhelé tsia yála
aní. ³⁵ Kaka-a, aní agbé mabhundja inde awo lie
li bua okpála bhelé-e bh̄ m̄bas̄. La-a, p̄ m̄
makpe-e, likabhu adú bua m̄ maka ngise má
pu!»

Ana, polofeta na øøø

³⁶ Polofeta bini na øøø ad̄ di nani oo. A ad̄
'li aní me Ana, nd̄li gba Fan̄ele bh̄ p̄iga gba
Asela. Aní ad̄ me aní nde agbe má dyuku! U
amene nani ne bhoko gba e inde u aha lio ne e
bh̄ nd̄li-e kalanga mananika. ³⁷ Pita nakpi ka
'ko aní-e, aní atsia ato økø. Li nedhinga bhom̄-
o, aní ad̄ ibili ne kalanga nd̄jikpa madjina ne
ká badha. Aní d̄ ayie bh̄ 'ngbé 'ti Ebhe gba
omaYuda-a de. Aní ad̄ amene kulu lie p̄ Ebhe
sukpe ne ngbikpi. Aní ad̄ atse ez̄ ngú nayo
Ebhe. ³⁸ Bha li nedhinga bhom̄-o, ngaani di-
e, aní ago, aní atsia aholo adhøø Ebhe. Aní

aholo akpokpo 'ngú pindji ndili-e pi ndu okpála hana inde adu adjeke me Ebhe gbegbe okpála na Yelusalema bhú likabhu gba o ko.

U agie lio bhú Nadjaleta

³⁹ Li 'dyi Yesu ne 'hi Yesu andjia namene ndu 'ngú hana inde li líli gba Ngámá apa e lie, u atsia agie lio bhú ndu doto na Galilaya, bhú kuti gba o na Nadjaleta-o. ⁴⁰ Ndili-e adu abhele, ani atsia adu abi angu. Imbilangu gba ani-e atsia adu di abhulu lie. Bádha bhú 'bu gba Ebhe-e atsia adu di bhú dabili bini ne ani.

Yesu bhú 'ngbé 'ti Ebhe gba omaYuda

⁴¹ Ndu kalanga hana, okpála inde azu ani-e adu anú bhú Yelusalema ngú namene anokomia na Pasika . ⁴² Li ani akolo lie ne kalanga ndjikpa ne ká bhisie, u atsia anu ne ani bhú dabili bini maka u amemene lie ko. ⁴³ Li anokomia andjia lie, u aholo agie lio. Engú bini, ndili-e Yesu atigala naae bhú Yelusalema me 'dyi ani ne 'hi ani nde mbila de. ⁴⁴ U adu abhundja lie me ani bhú dabili bini ne obi o na kpadji-e, u atsia adhuku ekpi bini libhому. Pipita-a, u aholo nagili ani bhú ká opiga gba o di ne bhú ká obi o-o. ⁴⁵ U u la ani lie de-e, u atsia agie lio bhú Yelusalema ngú nagili ani.

⁴⁶ Bhú 'kpi na bata-a, u abhaka ani bhú 'ngbé 'ti Ebhe gba omaYuda me ani nde adu bhú ká omusuno. Ani adu adje uo di ne nayiyi uo. ⁴⁷ Ndu okpála inde adu adje ani-e hana, adu angamba naali ka imbilangu inde ani adu agie engú ne e ko. ⁴⁸ Li okpála inde azu ani au ani

lie, u angamba naali. 'Hi anì atsia ayi anì me: «Ndika ma, mo omene ya mo-o ka ni? Tsia nga ya ne 'dyi m̄-o, ya adu igini agili m̄ me bua ya nde alu bha ndju abhúlá má gba!» ⁴⁹ Engú bini, anì agie pi uo me: «Yi de ngagili ma ngú ni? Yi mbila igini de me, a ayo me ma du bhú 'ti gba 'dyi ma-a di?» ⁵⁰ Engú bini, u mbila nani ta 'ngú inde anì adu apa e pi uo-o de.

⁵¹ Pipita-a, anì atsia agie lie ne uo bhú Nad-jaleta. Anì adu amene líli gba uo-o. 'Hi anì adu alila ndu 'ngú bhomu-o hana li bua e ndjindji. Anì atsia adu abhundja pépé. ⁵² Yesu adu abhele, imbilangú gba anì-e adu di abhulu lie. Engú inde anì adu amene e bhú bádha bhú 'bu gba Ebhe-e, a adu anga li Ebhe, di ne li okpála naali.

3

*Kulu gba Djaá bhulu nabatisa okpála
(Tsia bhú Mat. 3:1-12; ne bhú Mlk. 1:1-8; di ne
bhú Dja. 1:19-28.)*

¹⁻² Pipita-a, Tibeke akolo 'ngbé ngámá na Loma . Bhú kalanga na ndjikpa ne ká bhuluvue bhú nau gba anì-e, Djaá ndili gba Djakalia, inde adu nani adu abhú 'gu-o, asia eli gba Ebhe . Nedhinga ango-o, Pose Pilatø adu alila ndu doto na Yudaya. Elode adu ngámá na ndu doto na Galilaya. Ndai anì Filipino atsia adu ngámá na ndu doto na Itule ne Talakonite. Lisiansi atsia adu naae ngámá na Abilene. Bhú nedhinga bhomu-o, Ana ne uo ne Kaifa atsia adu obhelesi okpála gba odimandø gba Ebhe . ³ Abhomu-o, Djaá aholo adhuku bhú 'gu lingo ngade 'ngu na Djuludani, anì atsia adu

atotobhila me: «Yi dji bua yi, yi sia batisimo, amba Ebhe 'e siti 'ngú gba yi ko.» ⁴ Maka li polofeta Isaya, aye lie bhú bhuku gba e me:

«A ko kpála bini inde ngatotobhila abhú 'gũ me: <Yi leke kpadji pi Ngámá,

yi li okpadji pi ani ngbingbili!

⁵ Ndũ tsutsukudhu bili sũnda ongba 'ta hana abédhe lie.

Ndũ oeta na ngbengbengbe ne obhe na djedjedje hana adjí lie,

i kólo má gbata gbata!

Ndũ kpadji na gagala hana akólo ngbingbili.

Okpadji na sisiti akólo babadha.

⁶ Li ndũ okpála hana tsia ú maka li Ebhe ngakobho okpála lie ko!†»

⁷ Abhomũ-o, okpála bhelé adũ ago abhaka Djaa ngubula nasia batisimo. Ani atsia adũ ayi uo me: «Ngayi opiga kpũũ inde-e! A asuno pi yi da me yi kpe mangimbo gba Ebhe inde ngago-o? ⁸ † dũ mo-o, yi mene engú inde asúno me yi adjí bua yi kukũũ! Yi adú abhundja bha li bua yi de me, Abalahama ne ogbi yi. Padhá de, anga ma apa pi yi na paká me, teme yi ngau e inde-e, Ebhe tí da nadjidji, i tsia kólo odi Abalahama! ⁹ Maka ma ngapapa lie inde-e, u a'o ngbakpa bhú li ndula-a ngú nadede a'o. Ndũ ndula hana inde i li lílí na babadha de-e, u adé, u tsia bhíke bhú djua.»

¹⁰ Abhomũ-o, okpála ango-o atsia adũ ayi ani me: «† dũ mo-o, a ayo me ya mene pi?» ¹¹ Ani atsia adũ agie pi uo me: «Kpála bhende li bongo na mbulu nde ka e bhisi-e, a ayo me ani ha bini

† 3:6 3:4-6 Tsia bhú Isa. 40:3-5.

pi kpála bhende li bongo na mbulu nde ka e ade ko. Kpála bhende li ezɛ nde ka e-e, a ayo me ani ha di mbo pi kpála bhende li ezɛ nde ka e ade ko.» ¹² Ondɔmbi na mandjandja ago di ngú nasia batisimo, u atsia ayi ani me: «Mɔsuno, a ayo me ya mene pi?» ¹³ Ani atsia agie pi uo me: «Yi ayó tia ane bhende li líli aziba e de.» ¹⁴ Osudha atsia ayi di ani me: «A la ya-a, a ayo me ya mene naaya pi?» Ani atsia agie pi uo me: «Yi agbúlɛ tia ka kpála bini ne kpéke, di ne eu de. Engú bini, yi mbila bha tia na kulu gba yi ko.»

¹⁵ Maka li okpála adɛ adjeke nago ka Masiya lie, u atsia adɛ ayi lio li bua o pindji Djaa me: «A ko ndi-e Masiya inde li Ebhe atima e di?» ¹⁶ Djaa atsia agie pi ndɛ uo hana me: «Ngama-a, ma ngabatisa naama yi ne engu. Engú bini, a ngago pita ma ne kpála. Kpála ango-o ane ma ne angu. Ma belegɛ ne tetele kpála ade ngubula me ma bhulu ekpú na maløkø gba ani-o.* Ani abátisa yi ne Bu Bhobua di ne djua. ¹⁷ Ani aholo kakpa gba e sa 'kpa e ngú nape nguwa gba e-o. Ani apó bhúla nguwa na babadha gba e bhú ngbokopi, engú la bini, ani tsia bú fufukudha-a bhú djua inde li kpála bini ti da nabulɛ e de.»

¹⁸ Djaa aha nani líli koko bhelé pi okpála. Bhúbhú-o, ani atsia adɛ akpokpo Bádha Ngali gba Ebhe-e pi uo. ¹⁹ Ngámá Elode aha nani

* **3:16** 3:16 Nani agba omaYuda-a, kulu nagbe maløkø bhú 'dhu ogomago ne navulɛ 'dhu uo-o, a ko nani kulu ka obalise di ne okpála na padhá.

Elodiade, ełe gba ndai e-o.† Anì amene nani matá di osisiti 'ngú koko bhelé. Kaka-a, Djaa atsia ambe bhú 'ndji ani. ²⁰ Abhomu-o, Elode amene matá siti 'ngú koko pépé, ani aha Djaa, ani atsia abhike ani bhú tikpu.

Djaa abatisa Yesu

(Tsia bhú Mat. 3:13-17; di ne bhú Mlk. 1:9-11.)

²¹ Kala me Djaa li bhú tikpu-o, ani abatisa ngaiza ndu okpála hana. Abhomu-o, Yesu atsia asia di batisimo. Nedhinga li Yesu adu akpokpo 'ngú ne Ebhe lie, kokpí abhulu lie, ²² u au Bu Bhobua ngakø pí ani maka bebhe. U atsia adje eli ayie abhúlá apa me: «Mu ne ndili gba ma na mukunda. Djali li bua ma ngú mu naali.»

Onguo ogbi Yesu

(Tsia bhú Mat. 1:1-17.)

²³ Yesu akpo nani lita kulu gba e me ani nde ne kalanga masikpe de ndjikpa bata. Okpála adu abhundja naao me, a ko ndili gba Djodjefu .

Djodjefu ndili gba Eli,

²⁴ Eli ndili gba Matati,

Matati ndili gba Levi,

Levi ndili gba Maleki,

Maleki ndili gba Djanai,

Djanai ndili gba Djodjefu ,

²⁵ Djodjefu ndili gba Matatiasi,

Matatiasi ndili gba Amosi,

Amosi ndili gba Nauma,

Nauma ndili gba Eseli,

† **3:19** 3:19 Filipo ne ndai Elode nani inde abhele Djaa bhulu nabatisa okpála ko. A adu nani me Filipo nde kpi nga de. Tsia bhú Lev. 20:21.

Eseli ndili gba Nagai,
²⁶ Nagai ndili gba Mata,
Mata ndili gba Matatiasi,
Matatiasi ndili gba Semeini,
Semeini ndili gba Djoseke,
Djoseke ndili gba Djoda,
²⁷ Djoda ndili gba Yoanana,
Yoanana ndili gba Lesa,
Lesa ndili gba Djelubabela,
Djelubabela ndili gba Salatiele,
Salatiele ndili gba Neli,
²⁸ Neli ndili gba Maleki,
Maleki ndili gba Adi,
Adi ndili gba Kosama,
Kosama ndili gba Elemadama,
Elemadama ndili gba Ele,
²⁹ Ele ndili gba Yesu,
Yesu ndili gba Eliedjele,
Eliedjele ndili gba Djolime,
Djolime ndili gba Matati,
Matati ndili gba Levi,
³⁰ Levi ndili gba Simeo,
Simeona ndili gba Yuda,
Yuda ndili gba Djodjefu ,
Djodjefu ndili gba Djonama,
Djonama ndili gba Eliakime,
³¹ Eliakime ndili gba Melea,
Melea ndili gba Mena,
Mena ndili gba Matata,
Matata ndili gba Natana,
Natana ndili gba Davidi,
³² Davidi ndili gba Yese,
Yese ndili gba Obede,

Obede ndili gba Boadja,
Boadja ndili gba Salamona,
Salamona ndili gba Nasone,
³³ Nasona ndili gba Aminadaba,
Aminadaba ndili gba Adimina,
Adimina ndili gba Aluni,
Aluni ndili gba Edjelone,
Edjelone ndili gba Peledje,
Peledje ndili gba Yuda,
³⁴ Yuda ndili gba Yakobho,
Yakobho ndili gba Isaka,
Isaka ndili gba Abalahama,
Abalahama ndili gba Tela,
Tela ndili gba Naola,
³⁵ Naola ndili gba Seluga,
Seluga ndili gba Lagau,
Lagau ndili gba Pelege,
Pelege ndili gba Ebele,
Ebele ndili gba Sela,
³⁶ Sela ndili gba Kainame,
Kainame ndili gba Alepakasada,
Alepakasada ndili gba Seme,
Seme ndili gba Nua,
Nua ndili gba Lemeke,
³⁷ Lemeke ndili gba Matusalema,
Matusalema ndili gba Enoka,
Enoka ndili gba Yelede,
Yelede ndili gba Malalele,
Malalele ndili gba Kenana,
³⁸ Kenana ndili gba Enosa,
Enosa ndili gba Sete,
Sete ndili gba Adamu ,
Adamu ndili gba Ebhe.

4

*Djabulɔ ale Yesu**(Tsia bhú Mat. 4:1-11; di ne bhú Mlk. 1:12-13.)*

¹ Pita li Yesu abedhe lie ne Bu Bhobua-a , anɔ ayie lingo 'ngu na Djulɔdani, Bu Bhobua atsia amba bhúla anɔ abhú mili bili. ² Oo, Djabulɔ ale anɔ ngubula ekpí ndjikpa badha. Bhú oekpí bhomɔ-o, anɔ zu 'he de. Pipita-a, gumɔ aholo amene anɔ. ³ Abhomɔ-o, Djabulɔ atsia apa pi anɔ me: «I dɔ me mɔ nde ne Ndili gba Ebhe-e, pa pi teme inde-e me a dji lie, amba a kolo ezɔ.» ⁴ Yesu agie pi anɔ me: «Eli gba Ebhe-e apa me: <Kpála kóbho bha bini ka ezɔ de.†>»

⁵ Djabulɔ aha anɔ, anɔ ne anɔ apí 'ta. Anɔ asuno ndɔ ondende na doto pi anɔ hana, bhú nedhinga bedi bhomɔ. ⁶⁻⁷ Anɔ atsia apa pi anɔ me: «Ebhe aha ndɔ angu, ne otia na ondende bhomɔ-o hana mɔma. Ma ti da nahaha pi kpála inde ma akunda nahaha pi e. I dɔ me mɔ nde akikita lipukɔ mɔ kuto kala ma-a, ma ahá ndɔ angu ne otia na ondende bhomɔ-o hana pi mɔ.» ⁸ Yesu atsia agie pi anɔ me: «Eli gba Ebhe-e apa me:

<Dhøgø Ebhe Ngámá gba mɔ,

amba mɔ toko bha bini anɔ kpi e kpi.†>»

⁹ Pipita-a, Djabulɔ aha anɔ, anɔ ne anɔ abhú Yelusalema. Anɔ a'o anɔ apí tulundji 'ngbé 'ti Ebhe gba omaYuda, anɔ atsia apa pi anɔ me: «I dɔ me mɔ nde bha ndjɔ ne Ndili gba Ebhe-e, 'ulu, mɔ kø kuto, ¹⁰ anga eli gba Ebhe-e apa me:

<Ebhe ahá líli pi oandjelu gba e me, u lila mɔ. †>

† 4:4 4:4 Tsia bhú Det. 8:3. † 4:8 4:8 Tsia bhú Det. 6:13.

† 4:10 4:10 Tsia bhú Ets. 91:11.

¹¹ La di matá:

«U abí mụ sa 'kpa o, amba mo otú 'dhu mụ li teme de.†»

¹² Yesu atsia agie pi ani me: «Eli gba Ebhe-e apa la di me: «Mo olé Ebhe Ngámá gba mụ-o de.†»

¹³ Pita li Djabulu andjia nale Yesu lie ne ndu kpadji hana-a, ani atsia a'o ka ani ngú nadjeke nedhinga koko.

Yesu agie lie bhú Galilaya

(Tsia bhú Mat. 4:12-17; di ne bhú Mlk. 1:14-15.)

¹⁴ Abhomu-o, Yesu atsia agie lie bhú ndu doto na Galilaya, bhú angu gba Bu Bhobua. Ndu okpála hana aholo nakpokpo 'ngú gba ani-e bhú ndu doto bhomu-o libhому. ¹⁵ Ani adu asuno bhú oeti gba uo nadje líli gba Moidje-o . Ndu okpála hana atsia adu adhөгө ani.

Yesu anu bhú Nadjaleta

(Tsia bhú Mat. 13:53-58; di ne bhú Mlk. 6:1-6.)

¹⁶ Pipita-a, ani atsia anu bhú Nadjaleta, kuti inde ani abhele bhú e-o. Li 'kpí naguo gba omaYuda-a , ani ali bhú 'ti nadje líli gba Moidje maka ani adu amemene lie ko. Ani ayie bhúlá ngú natanga eli gba Ebhe-e pi okpála.

¹⁷ Abhomu-o, u atsia aha bhuku gba polofeta Isaya pi ani. Ani abhulu bhuku-o, ani atsia agili bili u aye lie me:

¹⁸ «Bua gba Ngámá-a bhú dabili bini ne ma.

Ani abhu ma ngú nanu nakpokpo Bádha Ngali pi obhulu ndibhili.

† 4:11 4:11 Tsia bhú Ets. 91:12. † 4:12 4:12 Tsia bhú Det. 6:16.

Ani atima ma ngú natobhila pi obalise me, u azé
bhú bali gba o-o maze,
pi okpála i u 'kpí de-e me, u aú matá 'kpí
mau.

Ani atima ma di ngú napandja obhende bhú
mbolo sa 'kpa obhende ngato mbolo li uo-
o.

¹⁹ Ngama-a, ma akpókpo pi okpála me
nedhinga inde li Ebhe adjé ndjinga uo lie
akolo.†»

²⁰ Pita li Yesu andjia natatanga lie, ani agagala
bhuku-o, ani atsia agie pi kpála na kulu-o.
Abhomu-o, ani aha lie adu kuto. Ndu okpála inde
adu bhú 'ti oo hana abanga djila o li ani. ²¹ Ani
atsia aholo napa pi uo me: «Engú inde yi adje e
bhú Bhuku gba Ebhe-e li bili bhomu-o, amene lie
naki amene.» ²² Ndu okpála hana adu angamba
li Yesu naali. U atsia adu aziba eli na bádha bhú
'bu inde ani adu akpokpo e-o. Abhomu-o, u atsia
adu apa me: «A inde-e ndili gba Djodjefu-o di?»

²³ Abhomu-o, ani atsia apa pi uo me: «Ma
ambila na paká me yi apá muma gbitaku inde
me: <Mutia, kobho limu ne titi mu.> Yi tsia pá di
muma me: <Ya adje ndu 'ngú inde mo omene
e bhú Kapalanauma-a hana. Mene nga la di
ngua 'ngú ango-o bhú kuti mo obhele bhú e ko.>»

²⁴ Ani atsia apa matá pipita-a me: «A moko, ma
apa pi yi me, a ko kukulu 'ngú, okpála ziziba
polofeta bhú kuti gba e belegu de bini.

²⁵ Ma apa pi yi na paká me, oekesi na olisilisi
adu nani bhelé bhú ká omafalaale li nedhinga
gba polofeta Eliya. Li nedhinga bhomu-o, ebha

† **4:19** 4:18-19 Tsia bhú isa. 61:1-2.

dhi nani-i de ngubula kalanga bata ne epe madhia. Kaka-a, adyindi na ngbéngbé atsia ali bhú doto ango-o libhomu. ²⁶ Engú bini, Ebhe tima nani Eliya ngú nateteke suka oekesi bhomu-o bini de. Ani atima bha bini ani gba ekè bini na gandji kuti na Salepeta bhú ndu doto na Sidona. ²⁷ Matá-a, okpála na kába adu di nani bhelé bhú ká omaɪsalaele li nedhinga gba polofeta Elisa. Engú bini, Ebhe kobho nani suka uo de, bha bini Namana, gandji kpála na Silia.»

²⁸ Li ndu okpála hana inde adu bhú 'ti oo adje 'ngú bhomu-o lie, u ake 'ngú lio naali. ²⁹ U ayie bhúlá, u agbe ani bhú 'ti bhomu-o, u agbele ani apí 'ta inde u ayiki gudhu gba o pí e-o. U amene nani mo-o ngú nandjimba ani akuto. ³⁰ Engú bini, ani akodho bha 'kpí bhú ká uo oo, ani atsia atapa.

*Yesu akobho kpála li siti bua adu ato mbolo lie
(Tsia bhú Mlk. 1:21-28.)*

³¹ Abhomu-o, Yesu anu bhú Kapitalanauma, kuti bini na ndu doto na Galilaya. Ani atsia adu asuno pi okpála bhú 'kpí naguo gba omaYuda-o. ³² U adu nangamba li ngua nasuno gba ani-o, anga ani adu nasuno ne angu gba Ebhe. ³³ Bhú 'ti nadje líli gba Moidje oo, kpála bini li siti bua adu nato mbolo lie, aholo asusula kpekpeke me: ³⁴ «Aa! Yesu, kpála na Nadjaleta, mo okunda namene ngú ya pi? Mo ogo ngú nabhili ya? Ma mbila mu hana, mu ne kpála na bubu inde li Ebhe atima e ko!» ³⁵ Yesu atsia ambe bhú 'ndji ani me: «Gbite 'bhè mu, amba mu koto la di

bhú kpála bhomu!» Siti bua-a agụ 'i kpála angoo kuto má gbwe, bhú ká djila ndụ okpála inde adu oo hana. Aní akoto bhú aní, engú bini aní mene aní sisiti de. ³⁶ Ndụ okpála hana angamba, u atsia adu ayi lio sùnda o me: «A inde-e mangua eli dho? Aní ngaha líli ne kpéke, di ne angu pí osisiti bua, uo ngaze bhú okpála!» ³⁷ Okpála atsia adu apa 'ngú gba Yesu-o bhú ndụ okuti bhomu-o hana.

Yesu akobho okpála bhelé na kuo

(Tsia bhú Mat. 8:14-17; di ne bhú Mlk. 1:29-34.)

³⁸ Lí Yesu ayie lie bhú 'ti nadjé líli gba Moidje-e, aní atsia anụ alí bhú 'ti gba Simo. A abhaka me a nde lí 'hi wala Simo ne kpéke bandji. Abhomu-o, u atsia ayo ka Yesu me aní kobho aní. ³⁹ Aní ago alu pí aní, aní ambe bhú 'ndji bandji-o. Abhomu-o, bandji-e atsia ayie lí aní. Aní ayie bhúlá kolo má gala, aní atsia aholo nalụ 'zu pí uo.

⁴⁰ Lí ela atí lie, ndụ okpála hana inde adu ne okpála na kuo ngangá agba o-o, abha uo, u atsia ago ne uo pí Yesu. Aní a'o 'kpa e pí 'ndji uo bini ne bini, u atsia akobho ndụ o hana. ⁴¹ Osisiti bua aze di bhú okpála na kuo bhelé. Osisiti bua angoo atsia adu asusula me: «Mụ ne Ndili gba Ebhe!» Engú bini, Yesu adu ambe bhú 'ndji uo. Aní atsia adu di agbite kpadji pí uo me u agama 'ngú de, anga u adu ambila hana me a ko Masiya inde lí Ebhe atima e ko.

Yesu akpokpo Bádha Ngali bhú ndu doto na Yudaya

(Tsia bhú Mlk. 1:35-39.)

⁴² Li ekpí aseke lie, ani akoto bhú kuti bhomu, ani atsia atapa bhú mili bili. Bhiti okpála aholo nagili ani. U au ani lie, u aholo akikiliki lio pi ani me: «Mo o'ó ká ya de, ní tigala ne yi si-i.» ⁴³ Engú bini, Yesu apa pi uo me: «A ayo me ma anu di nakpokpo Bádha Ngali Nau gba Ebhe-e bhú okuti koko, anga Ebhe atima ma ngánga.» ⁴⁴ Abhomu-o, ani atsia adu akpokpo Bádha Ngali bhú oti nadje líli gba Moidje na ndu doto na Yudaya-o.

5

Yesu a'i omukpata na gigina

(Tsia bhú Mat. 4:18-22; di ne bhú Mlk. 1:16-20.)

¹ A akolo ekpí bini, Yesu adu lingo ekpe na Genedjaleta.* Bhiti okpála asulu de ani má wakaka ngú nadje 'li Ebhe. ² Ani au zabu bhisi lingo 'ngu me obhuhulu-o nde aze, u nde ngavulu onado gba o na sungu-o. ³ Yesu atsia a'ua bhú susuka bini, bhende gba Simo-o. Do ani pi Simo me: «Yie lingo 'gø-o, amba mu dyudyo limu mbo ne abhú 'ngu.» Yesu atsia adu bhú zabu-o kuto. Ani aholo nasuno pi bhiti okpála bhomu-o. ⁴ Ani andjia nagama 'ngú lie, ani atsia apa pi Simo me: «Dyudyo zabu-o apí tsiba, amba ngayi ne obi mu-o, yi bala onado gba yi-e bhú 'ngu ngú naholo osungu-o.»

⁵ Simo agie pi ani me: «Musuno, ya amene kulu sukpe inde-e libhomu, ya holo belegu sungu de bini. Engú la bini, ka 'li mu-o, ya abhíke

* **5:1** 5:1 Genedjaleta: A ko 'ili koko na ekpe na Galilaya. Tsia bhú Mlk. 6:53.

onado-o bhú 'ngu mabhike.» ⁶ U abala onado lie bhú 'ngu-o, u atsia aholo osungu bhelé. Kaka-a, onado gba uo-o aholo natsotsolo. ⁷ Abhomu-o, u amene 'kpa o pi obi o inde adu bhú zabu koko ngú na'i uo me, u go ha mbo 'kpa o pi o. Obhobhomu-o ago, u abebedhe ozabu bhisi-e ne osungu bedhebedhe. Kaka-a, ozabu atsia aholo nalinda bhú 'ngu.

⁸ Li Simo Piele au lie mo-o, ani ati bhú li 'dhu Yesu, ani atsia apa me: «Ngámá, gbe limu de ma ne sidi, anga ma ne siti kpála!» ⁹ Ani apa mo-o, anga ngauo ne obi e, u angamba nani naali ka bhiti osungu inde u aholo e ko. ¹⁰ Djaki ne Djaa , ongisi gba Djebedayo inde adu amene bhú dabili bini ne Simo-o, angamba bhadi moko. Engú bini, Yesu apa pi Simo me: «Mo odjé tsulu de, anga nayie pi mbia inde-e, mu dú matá agili osungu de, engú bini, mo odú ibili agili okpála pi Ebhe.» ¹¹ Abhomu-o, u agbele ozabu gba o apí 'gə. U a'o ka ndu 'he gba o hana, u atsia anu bhú dabili bini ne Yesu.

Yesu akobho kpála na kába

(Tsia bhú Mat. 8:1-4; di ne bhú Mlk. 1:40-45.)

¹² A akolo ekpi bini, Yesu adu bhú kuti bini na ndu doto na Galilaya, kpála bini inde li kába atsotsolo kute e hana-a, akoto. Li ani au Yesu lie, ani ago ati kala ani, ani atu bhúla e ne kuto, ani atsia alopola lie pi ani me: «Ngámá, i du me mu nde akunda-a, mu ti da nakobho ma.» ¹³ Yesu aha 'kpa e a'o li ani. Ani atsia apa me: «Ma akunda moko, kokobho!» Abhomu-o, kába agulu bha kolo li kute kpála ango-o hana maka

ndjombe. ¹⁴ Yesu atsia aha líli pi ani me: «Mo opá belegu engú inde-e pi kpála bini de. Engú bini, nɔ suno bha limu pi dimandɔ gba Ebhe maka li kute mu nde lie ko. Pipita-a, amba mu ha makiso maka li líli gba Moidje apa lie, ngɔbula napana pi ndu okpála hana me mo okobho.»
¹⁵ Abana mo-o, engú gba Yesu adu bha ayangba ne kalanu. Okpála bhelé adu ago apo bhúla o de ani ngú nadjé ani, ne di me ani kobho o ne okuo gba o-o. ¹⁶ Engú la bini, ani adu anu bhú omili bili. Oo, ani atsia adu akpokpo 'ngú ne Ebhe.

Yesu akobho dukuto

(Tsia bhú Mat. 9:1-8; di ne bhú Mlk. 2:1-12.)

¹⁷ Ekpí bini, Yesu adu asuno pi okpála. Omufalísai koko ne omusuno na líli gba Moidje inde ayie nani bhú ndu okuti hana na ndu doto na Galilaya ne Yudaya, di ne bhú 'ngbé gudhu na Yelusalema adulu de ani. Ne angu gba Ebhe-e, ani atsia adu akobho okpála na kuo. ¹⁸ Li nedhinga bhomu-o, okpála koko ago ne dukuto bini me u nde abi ani pí kalagba. U adu nagili kpadji ngú nato ani abhú 'ti, amba u 'o ani kala Yesu. ¹⁹ Engú bini, u ale nali ne ani abhú 'ti pima ka li okpála adu lie bhelé-o. Abhomu-o, u atsia a'ɔ ne ani apí 'ngbu 'ti. U adu gudho li 'ngbu 'ti-e má vuu! U atsia akɔ ani ne ekpú tété ne kalagba gba e hana bhú ká okpála kala Yesu. ²⁰ Li Yesu ambila lie me okpála bhomu-o abhuka ni na paká-a, ani atsia apa pi kpála na kuo-o me: «Olia ma, ma a'e osisiti 'ngú gba mu-o a'e.»

²¹ Li omusuno na líli di ne omufalísai adje 'ngú bhomu-o lie, u atsia aholo nabhundja me:

«Kpála inde ngasobho Ebhe me-e, a ko nga naae da? A ti da na'e siti 'ngú gba okpála da, bha bini Ebhe ngae kpi e kpi di?» ²² Yesu ambila mabhundja gba uo lie, ani apa pi uo me: «Yi ngabhundja li bua yi mo-o ka ni? ²³ Ne napa me, <Ma a'e osisiti 'ngú gba mu a'e>, ne napa me, <Yie bhúlá, amba mu dhuku-o> a ane ne bhuku ne bhedho? ²⁴ Engú bini, ma akunda me yi mbila me ngama, Ndili gba kpála-a, ma ne angu pila doto ngú na'e siti 'ngú.» Abhomu-o, Yesu atsia apa pi dukuto-o me: «Ma apa pi mu me yie bhúlá, ha dabili gba mu-o, amba mu gie limu agba mu!» ²⁵ Kolo má gala me-e, kpála bhomu ayie bhúlá bhú ká djila ndu okpála hana, ani aha dabili inde ani de asi pi e, ani atsia agie lie agba e me ani nde ngadhögö Ebhe. ²⁶ Ndu okpála hana adu angamba naali. U abedhe ne tsulu bedhe, u adu adhögö Ebhe, u atsia adu apa me: «Ya au naki ongú na ngangamba!»

Yesu a'i Levi

(Tsia bhú Mat. 9:9-13; di ne bhú Mlk. 2:13-17.)

²⁷ Pipita-a, Yesu akoto kilidjo, ani atsia au ndombi bini na mandjandja, adu 'li ani me Levi,† ani nde adu kuto bhú bilo gba e-o. Yesu apa pi ani me: «Kpata ma.» ²⁸ Levi ayie bhúlá, ani a'o ka ndu 'he hana, ani atsia akpata Yesu.

²⁹ Pipita-a, Levi atsia amene 'ngbé anokomia pi Yesu abhú 'ti gba e. Ondombi na mandjandja bhelé di ne okpála koko adu nazu 'he ne uo bhú dabili bini. ³⁰ Omufalaisai di ne omusuno na líli gba o adu nadi mutokono, u atsia ayi

† 5:27 5:27 Levi: A ko 'ili koko gba Matié.

omukpata gba Yesu-o me: «Ka ni yi ngazu 'he ne nandji vino lie bhú dabili bini ne onðembi na mandjandja di ne okpála na sisiti-e?» ³¹ Yesu atsia agie pi uo me: «Okpála bhende li kuo nde li o ade-e, u ne gumu mutia ade. Engú bini, obhende inde li o ne kuo ne gumu mutia ngao. ³² Ma go ngú na'i okpála bhende ngbingbili-e de. Engú bini, ma ago ngú na'i obhende na sisiti-o, ngubula me u dji bua o.»

Yesu akpo 'ngú pindji natse ezu ngú nayo Ebhe (Tsia bhú Mat. 9:14-17; di ne bhú Mlk. 2:18-22.)

³³ Okpála bhomu-o apa pi ani me: «Omukpata gba Djaa di ne obhende gba omufalisai ngatse ezu piko ngú nayo Ebhe. Engú bini, obhende gba mu-o la bha naao ngazu 'he ne nandji vino.» ³⁴ Yesu agie pi uo me: «Yi abhundja naayi me yi ti da naholo omaha 'ko òlò ne kpéke ngú natse ezu me 'ko òlò-o nde nga bha bhú dabili bini ne uo? ³⁵ Nedhinga koko akólo makolo, nedhinga inde li okpála adhépe 'ko òlò-o lie bhú ká uo-o. Li oekpi angoo, u tsia tsé la 'zu.»

³⁶ Yesu atsia aha di gbitaku inde-e pi uo me: «Kpála bini tí da nasidha bongo na mbia, ani tsia há pápála-a ngú nadudu li bongo na didili de. Ani mene mo-o, li bongo na didili-e sídha, la di-e, pála bongo na mbia lé ne bhe na didili-e de. ³⁷ Kpála bini ti da na'o vino na mbia bhú odidili dhudhu na ko 'nu de. Ani mene mo-o, li vino na mbia bí 'fu, i úpa odidili dhudhu-o. Pandi-e túko, li odhudhu-o tsia síti di. ³⁸ Engú bini, a ayo na'o

vino na mbia bhadi bhú odhudhu na mbia!‡ 39 †
 du me kpála bini nde andji pandi na didili andji-
 e, ani kúnda matá pandi na mbia de, anga ani pá
 me: ‹Pandi na didili-e ane ne bádha.›»

6

*Yesu aziba me ni ne ngámá pí 'ndji ekpí naguo
 gba omaYuda*

(Tsia bhú Mat. 12:1-8; di ne bhú Mlk. 2:23-28.)

¹ Ekpí bini naguo gba omaYuda-a, Yesu ne omukpata gba e adu akodho 'kpí bhú ngu 'zu inde u a'i e me ngano. Omukpata gba ani-e aholo akodho 'ndji 'ndji, atutuluba sa-tikpa o, u atsia adu nazuzu.* ² Omufalisai koko ayi uo me: «Yi ngamene bhomu-o ni? Lili gba ní-e ziba namene kulu bhú 'kpí naguo de.» ³ Yesu atsia agie pi uo me: «Yi atanga ndjindji bhú Bhuku gba Ebhe-e, engú nani li Davidi amene e? Ekpí bini, ngaani ne omaha e, u adu lie ne gumu-o, ⁴ ani ali nani bhú 'ti Ebhe. Ani aha mapa inde u a'o e ngú nadhogø Ebhe-e, ani azu. Ani atsia aha di pi omaha e, abana li lili gba ní-e apa lie me azú bha mapa ango-o ne odimandø-o .» ⁵ Yesu atsia apa matá pi uo me: «Yi mbila me ngama, Ndili gba kpála-a, ma ne ngámá pí 'ndji ekpí naguo.»

‡ 5:38 5:38 Yesu akúnda napa bhomu-o me, u ti da na'o nasuno gba ni na mbia pí bhe gba omufalisai-e de. * 6:1 6:1 Agba omaYuda-a, i du me kpála nde ngakodho ngano-o, amba ani ngamene bhomu-o kulu. La-a, lili gba uo-o ziba namene kulu bhú 'kpí naguo-o de. Tsia bhú Det. 23:26, di ne bhú Lev. 23:5-14.

Yesu akobho kpála li 'kpa e adu ne eze

(Tsia bhú Mat. 12:9-14; di ne bhú Mlk. 3:1-6.)

⁶ A adu nani ekpí nago koko bini, Yesu ali bhú 'ti nadje líli gba Moidje-o . Aní akolo lie oo, aní atsia aholo nasuno. Bhú ká okpála-a, bhoko bini adu oo, adu li 'kpa aní na kokpa-a ne eze.

⁷ Omusuno na líli gba Moidje di ne omuFalisai adu agili kpadji ngú napu ngbángá Yesu me, aní ngamene siti 'ngú. Kaka-a, u aholo atsia aní ne kpéke djila atigala aní kóbho kpála li 'kpí nago.

⁸ Engú bini, li Yesu ambila lie me ali bua uo oo, u ngabhundja mo-o, aní atsia apa pi kpála li eze adu li 'kpa e me: «Yie bhúlá, amba mu lu si bhú ká djila ndu okpála hana.» Kpála ango-o ayie bhúlá, aní atsia alu kala ndu okpála inde adu bhú 'ti oo hana. ⁹ Pipita-a, Yesu atsia apa pi uo me: «Ma ne engú bini ngú nayi yi tété: Li 'kpí nago, líli gba ní-e aziba pi? U mene bádha 'ngú, ne me u mene siti 'ngú? U kobho kpála, ne me u akóbho aní de?» ¹⁰ Aní atsia ndu uo hana bini ne bini. Abhomu-o, aní atsia apa pi kpála na eze-e me: «Gbele 'kpa mu.» Kpála ango-o agbele 'kpa e, 'kpa aní atsia akolo ndjindji. ¹¹ Engú bini, okpála ango-o abi 'gú naali, u atsia aholo nayi lio sunda o me: «Ní ti da namene ngú Yesu mangua 'ngú dho?»

Yesu alo obhulu titima ndjikpa ne ká bhisi

(Tsia bhú Mat. 10:1-4; di ne bhú Mlk. 3:13-19.)

¹² Bhú oekpí bhomu-o, sukpe bini, Yesu a'u apí 'ta ngú nakpokpo 'ngú ne Ebhe. Sukpe libhomu aní asi nakpokpo 'ngú ne Ebhe. ¹³ Li ekpí aseke lie, aní a'i omukpata gba e-o, aní atsia alo okoko

bhú ká uo ndjikpa ne ká bhisi inde aní agisila nani 'lì o me obhulú titima gba Yesu . ¹⁴ A adu nani Simo (inde li Yesu agisila 'lì e me Piele) ne ndai e Andilì, Djaki ne Djaa , Filipo ne Batelemi, ¹⁵ Matié ne Tuma, Djaki ndilì gba Alafayo ne Simo (inde u a'i e me kpála inde akunda doto gba e), ¹⁶ Djude ndilì gba Djaki ne Yuda Isikaliote, inde apú Yesu pì obhulú yala-o.

Yesu asuno pì bhiti okpála

(Tsia bhú Mat. 4:23-25.)

¹⁷ Aní akè ne uo, aní atsia alú asabu 'ta li bili li omakpata gba aní koko bhelé adu lie ko. Okpála bhelé na ndu doto na Yudaya libhomu, na Yelusalema ne ogudhu na ngo 'ngbé 'ngu, gudhu na Tile ne Sidona adu di oo. ¹⁸ Okpála ango-o ago nani ngú nadjé Yesu, amba aní kobho di obhende adu ne okuo-o. Aní atsia akobho di okpála inde li osisiti bua adu ato mbolo li o ko. ¹⁹ Ndu okpála hana adu nagilì nabu 'kpa o li kate aní, anga ndu uo hana adu akobho ka angu inde adu bhú aní-o.

Yesu akpo 'ngú pindji djali ne likabhu

(Tsia bhú Mat. 5:1-12.)

²⁰ Yesu atsia omakpata gba e-o, aní atsia apa pì uo me:

«A ko djali pì yi, ngayi obhulú ndibhili,
anga Ebhe ne ngámá gba yi-e ngae!

²¹ A ko djali pì yi, ngayi obhende ngadje gamu mbia inde,
anga yi azú 'he, yi tsia 'ú 'u!
A ko djali pì yi, ngayi obhende ngaku 'gba mbia inde,
anga yi amú 'zo!

22 A ko djali pi yi, i du me okpála nde ngayala yi, u nde ngagbe yi bhú ká o, u nde ngasobho yi, u nde ngapa 'ngú gba yi-e sisiti kabula ma, Ndili gba kpála. 23 Li nedhinga ango kolo, yi de kpi djali, amba yi dho di ebi, anga makalá na ngbéngbé ngadjeke yi abhúlá. Ogbi uo adu nani amene bhadi opolofeta sisiti moko.

24 Engú bini, a ko likabhu pi yi obhulu tia,
anga yi asia makalá gba yi-e asia!

25 A ko likabhu pi yi, ngayi obhulu ká 'zú mbia inde,
anga yi adú adjé gamu!

A ko likabhu pi yi, ngayi obhende ngamu 'zo mbia inde,
anga yi adú bhú talia, yi tsia dú naku 'gbá!

26 A ko likabhu pi yi, i du me ndu okpála hana nde ngapa 'ngú gba yi-e ndjindji, anga ogbi uo adu apa bhadi nani babadha 'ngú moko li opolofeta na eu ko!»

Yi kunda obhulu yala gba yi-o

(Tsia bhú Mat. 5:38-48, 7:12a.)

27 «Engú bini, ma apa la pi yi me, ngayi obhende ngadje ma-a, yi kunda obhulu yala gba yi-o. Yi mene bádha 'ngú pi obhende ngayala yi ko. 28 Yi yo me bisagu gba Ebhe-e go pí okpála bhende ngatu pedje li yi, amba yi yo Ebhe pi obhende ngamene yi sisiti ko. 29 Li kpála bini su pála mu li pápá bini-e, mu de dji di pápá koko pi ani, amba ani su.† Li kpála bini gbulu koti gba mu-o, mu de 'o di ani amba ani ha bongo

† 6:29 6:29 Agba omaYuda-a, nasu kpála li pabhø e-e, a ko sobho na ngbéngbé.

na mbulu mụ-o. ³⁰ Li kpála yo 'he ka mụ-o, mụ de ha pì ani. I dū me kpála bini nde agbulu 'he ka mụ-o, mo oyó matá ka ani de. ³¹ Yi mene pì okpála koko bhadi maka bhende yi akunda me u mene e pì yi ko.

³² I dū me yi nde ngakunda bha bini okpála bhende ngakunda yi-e, yi abhúndja de me yi asía makalá kaka-a de, anga okpála na sisiti-e, u ngakunda bhadi okpála bhende ngakunda o ko! ³³ I dū me yi nde ngamene bha bini bádha 'ngú pì okpála bhende i ngamemene pì yi-e, yi abhúndja de me yi asía makalá kaka-a de, anga okpála na sisiti-e bhadi ngamemene moko! ³⁴ I dū me yi nde ngaha bha bini 'he pì okpála inde yi abhundja me u tí da di nagigie pì yi lí 'kpí koko-o, yi abhúndja de me yi asía makalá kaka-a de. Abana okpála na sisiti, u ngaha di 'he pì obi o okpála na sisiti ngabula me, u gie di pì o lí 'kpí koko!

³⁵ Engú bini, yi kunda obhulu yala gba yi-o. Yi mene bádha 'ngú pì uo. Yi ha 'he pì uo me yi nde bhundja de me u agíe pì yi magie de. Yi asía 'ngbé makalá. Yi mene mo-o, yi tsia dú ongisi gba Ebhe Apí 'Kpí, anga ngaani-e, ani babadha pì okpála inde i gie heni pì ani de. Ani di babadha pì okpála na sisiti. ³⁶ Yi bedhe ne ndjinga pì okpála maka lí 'dyi yi Ebhe abedhe di ne di lie pì okpála ko.»

*Yi akódho 'ngú gba okpála koko de
(Tsia bhú Mat. 7:1-5.)*

³⁷ «Yi akódho 'ngú gba okpála koko de, amba Ebhe akódho di 'ngú gba yi-e de. Yi a'ó engú

pí okpála koko de, amba Ebhe a'ó di engú pí yi de. Yi mbu li siti 'ngú gba okpála koko, amba Ebhe mbu di li siti 'ngú gba yi ko. ³⁸ Yi ha 'he pí okpála koko, amba Ebhe ha di 'he pí yi. Anì abédhe kílí gba yi-e ne nguwa bedhe má kpambi, i hólo nabala kuto. A moko, Ebhe ahá bhadi pí yi maka lele yi ngahaha pí okpála koko lie ko.»

³⁹ Yesu atsia apa matá pí uo gbitaku bini me: «Kpála i u 'kpí de-e ti da naholo 'kpa kilí e inde i u 'kpí de ngú nasuno kpadji pí anì uu? A mo-o ade! I ðu mo-o, li ndu uo bhisi hana bála bhú 'dú. ⁴⁰ Mụkpata bini ne mụsuno gba e ne imbilangu de. Engú la bini, ndu mụkpata hana inde u asuno 'he pí e ndjindji-e, anì kólo maka mụsuno gba e-o. ⁴¹ Ka ni mụ ngau mboye kụ mụsoli inde bhú djila ndai mụ-o lie, mụ tsia u la ndula inde bhú djila mụ-o de? ⁴² Lele pí mụ ti da napa lie pí ndai mụ me: «Ndai ma, 'o ma, ma gbe mboye kụ mụsoli inde bhú djila mụ bhomu», ngamu-o, mụ nde u ngala belegu de ndula inde bhú djila mụ-o? Bhulu kali, gbe ngaiza ndula inde bhú djila mụ-o. Pipita-a, mụ tsia u la 'kpí ndjindji ngú nagbe mboye kụ mụsoli inde bhú djila ndai mụ ko.»

Ndula ne lí e

(Tsia bhú Mat. 7:16-20, 12:33-35.)

⁴³ «Ndula na babadha lílì lílì na sisiti de. La di-e, ndula na sisiti lílì lílì na babadha de. ⁴⁴ U mbila ndula li lí e. U koko manga li ndula na eti de. La di-e, u koko malibhombi li kobe de. ⁴⁵ Kpála na babadha-a, ka bádha 'ngú inde li bua anì-e, anì méne bhadi engú na babadha. La di-e, kpála na sisiti-e, ka siti 'ngú inde li bua anì-e, anì méne

bhadi engú na sisiti. Engú inde ngakoto bhú 'bhø kpála-a, a ko engú inde ngayie ali bua ani ko.»

Oeti bhisi

(Tsia bhú Mat. 7:24-27.)

⁴⁶ «La ka ni yi nga'i ma lie ndu 'kpí hana me: <Ngámá, Ngámá?> Yi la ngamene engú inde ma ngapa e pi yi me yi mene e ade. ⁴⁷ Kpála bini inde agó abháka ma, adjé 'li ma, ani tsia méne maka ma apa lie, ma akúnda napana pi yi me ani maka da. ⁴⁸ Ani maka kpála inde aholo nayiki eti. Ani adji edú tsutsu, ani atsia a'o 'dhu 'dhu-o pí teme. Li engu asi lie, a ago atú lie li kute eti-o, eti ango-o tsia dyiki de, anga a alú kpekpeke. ⁴⁹ Engú bini, kpála bhende adje 'li ma, ani tsia mene maka ma apa lie de-e, ani maka kpála inde ayiki eti gba e pí doto. 'Dhu 'dhu tété ade. Li engu asi lie, a ago atú lie li kute eti-o. Eti-e atuko bha kolo má gala, a atsia agugumu hana má kpøkøbhø!»

7

Yesu akobho kpála na kulu gba ngámá bini gba osudha

(Tsia bhú Mat. 8:5-13.)

¹ Pita ani andjia napa ndu ongú bhomu-o lie hana pi okpála-a, ani atsia atapa bhú kuti na Kapalanauma. ² Oo, abhú Kapalanauma-a, ngámá bini gba osudha na Loma,* adu ne bali gba e bini inde ani adu akúnda e naali. A adu li bali ango-o ne kuo masikpe de me ani kodho

* **7:2** 7:2 Ngámá gba osudha na Loma: Ngámá bini gba osudha na Loma: Ngámá ango-o nani ne ngámá pí 'ndji osudha kámá bini. A adu nani maYuda de.

bua e. ³ Li ani adje 'ngú gba Yesu-o lie, ani atsia atima obhelesi okpála koko gba omaYuda agba Yesu. U anu napa pi ani me, ani go kobho bali gba ngámá ang-o. ⁴ Li obhelesi okpála bhomu-o akolo de Yesu lie, u atsia aholo nakikiliki lio pi ani me: «Mu ti da namene ehe inde ani ayo e pi ani, i du me mu nde akunda-o, anga ani ndjindji. ⁵ Ani kunda di omaha ní naali. Ani ayiki eti nadje líli gba Moidje pi ní ngae.»

⁶ Abhomu-o, Yesu atsia aholo 'nú ne uo. Ani akolo lie de kuti-e masikpe-e, ngámá gba osudha-a atsia atima obi e me u pa pi ani me: «Ngámá, mo ondála limu de. Ma ne kpála na padhá. A ayo ka mu nali bhú 'ti gba ma-a de.† ⁷ Kaka-a, ma u igini lima ndjindji de me ma go kolo li mu ngama-a de. Engú bini, pa bha koli eli bini, amba bali gba ma-a kobho. ⁸ Ma ngapa mo-o, anga ma sa líli gba ongámási. Ma la di ngaha líli pi osudha. Ma pa pi bhe bini-e me: <Nunu!> Ani nú. Ma pa pi bhe koko-o me: <Gogo!> Ani gó. Ma pa pi bali gba ma-a me: <Mene 'he inde!> Ani méne.»

⁹ Li Yesu adje engú inde li ngámá bhomu-o apa e lie, ani angamba naali. Ani adji lie, ani atsia apa pi bhiti okpála inde adu akpata ani-e me: «Ma apa pi yi me, ma bhaka nga ngua kpála inde abhuka ma me-e de, belegu de bhú ká omafalaale!» ¹⁰ Li okpála na titima agie lio lie agba ngámá-a, u abhaka me kuo nde ayie li bali gba ngámá ang-o ayie.

† 7:6 7:6 Li maYuda bini li bhú 'ti gba kpála inde ne maYuda ade-e, li maYuda ang-o kólo sisiti kala Ebhe.

Yesu azuku ndili na bhobhoko gba  k  bini na    

¹¹ Pita li Yesu akobho bali gba ng m  bhomu-o lie, ani atsia atapa bh  gudhu na Naine. Omukpata gba ani ne okp la bhel  anu bh  dabili bini ne ani. ¹² Ani akolo li 'bh  bhoti na gudhu-o lie, a abhaka me u nde adji ne ngbangba makombi bini ng  nazizi. A ko nani koli ndili na bhobhoko bini gba  k  bini na    . Okp la bhel  na gudhu bhomu-o adu bh  dabili bini ne    ango-o.

¹³ Abhomu-o, Ng m  Yesu au ani. Li ani au ani lie, ani adje ndjinga ani naali. Ani atsia apa pi ani me: «'O naku 'gb !» ¹⁴ Pipita-a, ani adyudyo lie, ani a'o 'kpa e li ngbangba-o. Abhomu-o, okp la inde abi kuo atsia alu. Yesu atsia apa pi makombi bhomu-o me: «Ma apa pi mu me, yie bh l !» ¹⁵ Kp la inde adu igini me ani nde akpi-e, ani ayie bh l , ani adu madu. Ani atsia aholo nagama 'ng . Abhomu-o, Yesu atsia aha ani pi 'hi e. ¹⁶ Ndu okp la hana adje tsulu. U adu adh g  Ebhe, u atsia adu apa me: «'Ngb  polofeta akoto bh  k  n ! Ebhe ago nateteke okp la gba e-o!» ¹⁷ Ngali na eng  li Yesu amene e atsia agbolo bh  ndu doto na Yudaya libhomu di ne bh  okuti na ngongo-o hana.

Djaa bhulu natabisa okp la atima okp la agba Yesu

(Tsia bh  Mat. 11:2-19.)

¹⁸ Li omukpata gba Djaa agie lio lie, u atsia akpokpo ndu ongamba 'ng  inde li Yesu amene e hana pi Djaa. Abhomu-o, ani a'i okp la bhisi bh 

ká uo. ¹⁹ Anì atsia atima uo ngú nayi Yesu me: «Ne me mü ne Masiya inde ngago, ne me ayo me ya adjeke kpála koko?» ²⁰ Li okpála bhomu-o akolo lie de anì-e, u atsia apa pi anì me: «Djaa bhulu nabatisa okpála atima ya me ya go yi mü me: «Ne me mü ne Masiya inde ngago, ne me ayo me ya djeke kpála koko?»»

²¹ Bha li nedhinga bhomu-o, Yesu akobho okpála bhelé na kuo. Anì akobho obhende adu ne okuo ngangá. Anì akobho di obhende adu ne osisiti bua bhú o-o. Anì atsia abhulu di djila okpála bhelé inde i u 'kpí de-e bhú bádha bhú 'bu gba e-o. ²² Pipita-a, anì atsia agie pi okpála li Djaa atima o-o me: «Yi nü kpokpo pi Djaa engú inde yi au e, di ne bhende yi adje e ko. Okpála i u 'kpí de-e ngau 'kpí. Obhende ne eze li 'dhu o-o, u ngadhuku ndjindji. Okpála na kába ngakobho. Obhende i dje 'kpí de-e ngadje 'kpí. Obhende amu-o ngazuku. Ma ngakpokpo Bádha Ngali pi obhulu ndibhili. ²³ A ko djali pi kpála inde i bhúka ma ne bua na bhisi bhisi de ko!»

Yesu akpokpo 'ngú gba Djaa bhulu nabatisa okpála

²⁴ Bhiti okpála adu oo. Pita li obhulu titima gba Djaa agbida lie, Yesu atsia aholo akpokpo 'ngú gba Djaa pi uo me: «Yi anu igini natsia abhú 'gu-o ni? Yi anu igini natsia kpála inde maka mbamba inde ngadyiki ka anvi-e? A mo-o ade. ²⁵ I du mo-o de-e, yi anu la igini natsia ni? Kpála inde adyi babadha bongo-o ? A mo-o ade, anga obhende ngadyi babadha bongo-o, inde di ne ká tia ka o-o ngadu abhú 'ti gba ongámási. ²⁶ Yi anu

nga la igini natsia ni? Polofeta? A moko, ma apa pi yi me, yi au bhende ane belegu polofeta mane.
²⁷ Padhá de, anga a ko kpála inde li eli gba Ebhe-e apa 'ngú gba e me:

<Ebhe apa me, ma ngatima bhulu titima gba ma-
 a
 pi mu kalanu
 ngú naleke kpadji pi mu.†>

²⁸ Ma apa pi yi me, Djaa ngbéngbé ane ndu okpála hana. Engú bini, kpála inde ane ne mboye bhú Nau gba Ebhe-e , ani ane ani ne engbé.»

²⁹ Ndu okpála hana, belegu ondombi na mandjandja adu adje Yesu. Abhomu-o, u ambila nani ngbili 'ngú gba Ebhe-e lie, Djaa atsia abatisa uo.

³⁰ Engú bini, omuFalisai ne omusuno na líli gba Moidje ayala nani me Djaa batisa o. U amene lie mo-o, u ayala engú inde li Ebhe adu akunda e pi uo-o.

³¹ Do Yesu matá me: «Ma tí da nasuno okpála na naki si li da? Uo maka da? ³² Uo maka ongisi inde adulu bhú daposu. Okoko ngasusula pi obi o me:

<Ya abhi ngbabi na ebi pi yi,
 engú bini, yi tsia dho 'bi de!
 Ya ali etsi na da kuo pi yi,
 engú bini, yi ku 'gbá de!>

³³ Padhá de, anga Djaa bhulu nabatisa okpála ago, ani zu 'he maka okpála koko de, ani ndji di vino de, do yi me: <A bhú ani ne siti bual>

³⁴ Ngama, Ndili gba kpála, ma ago, ma ngazu 'he maka okpála koko, ma ngandji vino, do yi me:

† 7:27 7:27 Tsia bhú Mal. 3:1.

«Yi tsia nga kpála inde ngabhundja bha bini nazụ 'he di ne nandji vino! Aní ngakunda ondombi na mandjandja, a ko la di olia okpála na sisiti!»
³⁵ Engú bini, ndụ okpála hana inde abhuka imbilangu gba Ebhe-e, u ambila me imbilangu ango-o ngbingbili.»

Yesu azụ 'he abhú 'ti gba Simo mụFalisai

³⁶ A adụ nani mụFalisai bini, aní a'i Yesu ngú nazụ 'he bhú dabili bini ne e. Yesu ali bhú 'ti gba mụFalisai-o. Oo, aní atsia aholo nazụ 'he-o.
³⁷ Өlө bini na sisiti adụ bhú gudhụ bhomụ-o. Aní adje lie me Yesu ngazụ 'he abhú 'ti gba mụFalisai bhomụ-o, aní ago ne gili bini inde u abho e li teme inde u a'i e me alabatele.‡ Gili ango-o abedhe nani ne mungotsi bedhe. ³⁸ Aní akolo lie, aní atsia akita bhú li 'dhụ Yesu li pápá ne akele aní. Aní aholo naku 'gbá, ngula adụ atuko li 'dhụ Yesu. Abhomụ-o, aní aholo nakukuo ne sundjo e. Aní akama 'dhụ aní, aní atsia aha mungotsi-e, aní atuko tété. ³⁹ Li mụFalisai inde a'i Yesu au lie mo-o, aní atsia apa li bua e me: «Kpála inde-e, a ko bha ndjụ polofeta de kukulu! Padhá de, anga өlө inde ngabu 'kpa e li aní bhomụ-o, a ko siti өlө. Aní mbila la-a de!»

⁴⁰ Abhomụ-o, Yesu atsia apa pi mụFalisai-e me: «Simo, ma mbo ne engú bedi napapa pi mụ.» Simo atsia agie me: «Mụsuno, papa.» ⁴¹ Yesu atsia apa me: «Kpála bini aha nani bopulu pi okpála bhisi. Aní aha pi kpála bhe bini-e lí falanga kámá bhuluvue. Aní atsia aha pi kpála

‡ **7:37** 7:37 Alabatele: A ko teme na mase naali inde u abhobho ohe maka gili lie ko.

bhe koko-o lí falanga ndjikpa bhuluvue. ⁴² Li tia dũ la lie ka okpála ango-o ngú nagigie de, abhomũ-o, aní atsia ambu li bopulu gba ndũ uo bhisi hana. Bhú ká okpála bhisi bhomũ-o, akúnda aní ané mane ne bhedho?» ⁴³ Simo atsia agie me: «Ma abhundja me a ko kpála bhende u ambu li bopulu gba e adũ bhelé naali ko.» Do Yesu pí aní me: «Mo opa ndjindji.»

⁴⁴ Pipita-a, aní adji lie ne lí pápá gba ɔlɔ-o, aní atsia apa pí Simo me: «Mo ou engú lí ɔlɔ inde-e amene e au? Ma alí lie bhú 'ti gba mũ-o, mũ ha engu mũma ngú navulũ 'dhũ ma de. § Engú bini, ngaani-e, aní avulũ 'dhũ ma ne ngũla na djila e. Aní atsia akuo ne sundjo e. ⁴⁵ Mũ kama ma de. Engú bini, ngaani-e, nayie maka ma alí igini lie si-e, akolo pí mbia inde-e, aní 'o nakama 'dhũ ma de. ⁴⁶ Mũ tuko emũ pí 'ndji ma de. Engú bini, ngaani-e, aní atuko mũngotsí lí 'dhũ ma.

⁴⁷ Kaka-a, ma apa pí mũ me, mũkũnda na ngbéngbé inde aní asuno e, apana me u a'e bhiti siti 'ngú gba aní-e a'e. Engú bini, kpála inde u a'e siti 'ngú gba e me a nde yeye-e, aní pána bhadi mũkũnda na yeye.» ⁴⁸ Abhomũ-o, aní atsia apa pí ɔlɔ bhomũ-o me: «Ma a'e osisiti 'ngú gba mũ-o a'e.» ⁴⁹ Okpála inde adũ azũ 'he bhú dabilí bini ne aní aholo nabhundja me: «A inde-e mangua kpála dho? Aní nga 'e belegũ siti 'ngú!» ⁵⁰ Abhomũ-o, Yesu atsia apa pí ɔlɔ-o me: «Ebhe akobho mũ, anga mo obhuka ma. Nũ ne guo 'ngú

§ 7:44 7:44 Simo ha nani engu pí Yesu ngú navulũ 'dhũ e de, anga Simo adũ au lie me ní ngbéngbé pí Yesu ngaani. Tsia bhú Dje. 18:4, 19:2.

.»

8

Omukpata ndjikpa ne ká bhisi ne olisi koko akpata Yesu

¹ Pipita-a, Yesu adu adholo bhú ndu ogudhu di ne bhú ndu okuti hana. Ani adu akpokpo Bádha NgaliNau gba Ebhe-e ne ndu bili hana. Omukpata ndjikpa ne ká bhisi-e adu bhú dabili bini ne ani. ² Olisi koko nani li Yesu apandja osisiti bua bhú o, ne obhe ani akobho o ne okuo-o, a adu di bhú dabili bini ne ani. A du nani: Malia (u a'i e me kpála na gudhu na Magadala) nani li Yesu apandja osisiti bua bhú e mananika-o; ³ Djaani, wala Kudja, ngámá na kulu gba 'ngbé ngámá Elode; Sudjana ne olisi koko bhelé. Ndu olisi bhomu-o hana adu aha tia gba o ngú nateteke Yesu ne omukpata gba e ne di.

Gbitaku gba kpála nalu nguwa

(Tsia bhú Mat. 13:1-9; di ne bhú Mlk. 4:1-9.)

⁴ Okpála adu nayie bhú gudhu bini ne bini, u adu ago abhaka Yesu. Li okpála bhelé adu apokobho bhúla o lie de ani-e, ani atsia apa gbitaku inde-e me: ⁵ «Kpála bini anu ngú nabala nguwa abhú 'dyi gba e. Ani adu ababala lie, té nguwa koko atsia abala li kpadji. Okpála adedele ne 'dhu o, odhu atsia ago, u azu bhobhomu-o hana. ⁶ Koko abala li bili na teme. Li ezu-o aze lie, atsia a'ulu anga engu du bhú doto sasa de. ⁷ Koko atsia abala li bili na eti. A akè lie, ezu-o akè ne eti-e bhú dabili bini. Eti-e atsia agaga ezu-o. Kaka-a, ezu-o bhele ndjindji de. ⁸ Engú

bini, koko atsia abala naae bhú doto na babadha. Ezu-o akø, a atsia ali lílí. Nguwa bini ne bini ali lílí kámá bini.» Yesu atsia apa matá me: «Yi dje ndjindji, i ðu me a nde li yi ne 'dje 'dje ngú nadje 'kpí ko!»

Ka ni li Yesu adu akpo 'ngú lie bhú ogbitaku-o?
(Tsia bhú Mat. 13:10-17; di ne bhú Mlk. 4:10-12.)

⁹ Omukpata gba Yesu ayi ani me: «Ta gbitaku bhomu-o pi?» ¹⁰ Ani atsia agie pi uo me: «Ngayi-e, yi ambila naayi engú inde awo nani lie kalanu pindji Nau gba Ebhe-e ambila. Engú bini pi okpála koko-o, ma akpo engú bhomu-o bhú ogbitaku maka li Bhuku gba Ebhe apa lie me:

«U ti da natsia 'kpí,

engú la bini, u ú 'kpí de.

U ti da nadje 'kpí,

engú la bini, u mbíla tata-a de.†»

Yesu akpo ta gbitaku gba kpála nalu nguwa-o
(Tsia bhú Mat. 13:18-23; di ne bhú Mlk. 4:13-20.)

¹¹ «Ta gbitaku bhomu-o me, nguwa-a, a ko eli gba Ebhe-o . ¹² Nguwa bhende abala li kpadji-e, a ko okpála bhende ngadje eli gba Ebhe-o. Engú bini, li Djabalu gó, ani tsia dhépe eli ango-o li bua uo, ngú nagbite kpadji pi uo me u abhúka de, amba Ebhe akóbho uo de. ¹³ Nguwa bhende abala li bíli na teme-e, a ko okpála bhende ngadje eli gba Ebhe-e, u tsia sía ne djali hana. Engú bini, eli ango-o lí li bua uo de. U bha ngabhuka

† 8:10 8:10 Tsia bhú Isa. 6:9.

ngubula nedhinga bedi. Li nale kolo-o, u 'ó ká nabhuka gba o-o. ¹⁴ Nguwa bhende abala li bili na oeti-e, a ko okpála bhende ngadje eli gba Ebhe-o. Engú bini, u ne gumu ndu 'he na doto ngangá. U ne gumu tia na doto ne odjali na mukobho na doto. Gumu tia na doto ne odjali na mukobho na doto ango-o ngagaga Eli-o. Kaka-a, eli bhomu-o lí lílí nabhele mabhele de. ¹⁵ Nguwa bhende abala bhú doto na babadha-a, a ko okpála bhende ngadje eli gba Ebhe ne bua na babadha, u tsia zíba. U lila ndjindji, u tsia lí lílí ka kekele gba o ko.»

*Gbitaku na eke
(Tsia bhú Mlk. 4:21-25.)*

¹⁶ «I du me kpála bini nde adhedhe eke-e, ani búku ne lusa de. Ani tó di asa polo de. Engú bini, ani 'ó pí 'he ngubula me okpála inde ngali bhú 'ti-e, u u 'kpí tété ndjindji. ¹⁷ A moko, ndu 'he hana inde awo lie mawo-o, akóto bhú mbasu. Ndu 'he inde na pepe hana akóto li zi 'kpí, li okpála tsia mbíla. ¹⁸ Kaka-a, 'e-e! Yi lila liyi bhú nadje eli-o, anga kpála li ehe nde ka e, u ahá matá koko pi ani pépé. Engú bini, kpála inde li ehe nde ka e ade-e, u adhépe belegu mboye 'he bhende ani ngabhundja me a ka ni ko.»

*'Hi Yesu ne ondaise Yesu
(Tsia bhú Mat. 12:46-50; di ne bhú Mlk. 3:31-35.)*

¹⁹ 'Hi Yesu ne ondaise Yesu ago ngú natsia ani. Engú bini, u ale nakolo li ani pima ka bhiti okpála-o. ²⁰ Abhomu-o, u atsia apa pi Yesu me: «'Hi mu ne ondaise mu akilidjo, u ngakunda nau

m̄.» ²¹ Engú bini, Yesu atsia apa pi nd̄ uo hana me: «'Hi ma ne ondaise ma-a, a ko okpála inde ngadje eli gba Ebhe ne namemene ko.»

Yesu ayoko kpéke anvi pí 'ngu

(Tsia bhú Mat. 8:23-27; di ne bhú Mlk. 4:35-41.)

²² Ekpí bini pipita-a, Yesu ne om̄kpata gba e a'̄ bhú zab̄ bini. Aní atsia apa pi uo me: «Ní gulu ekp̄-o ai 'ngu.» Abhom̄-o, u atsia atapa. ²³ Nedhinga u ad̄ agulu 'ngu-o lie, Yesu atsia ati ne ela. Kpéke anvi na gipi aholo nape pí ekp̄-o. Engu aholo nabedhe bhú zab̄-o, kuo atsia akolo de uo masikpe. ²⁴ Om̄kpata adyudyo lio de Yesu masikpe, u atsia az̄k̄ aní me: «M̄suno, M̄suno, ní adjí amú!» Yesu az̄k̄, aní atsia ambe bhú 'ndj̄ anvi di ne wowo 'ngu-o. Abhom̄-o, anvi-e a'o nape, engu-o atsia akolo guguo. ²⁵ Do aní pi uo me: «Nabhuka gba yi-e su?» Engú bini, u ad̄ adje tsul̄, u atsia ad̄ angamba naali. Abhom̄-o, u ad̄ apa s̄nda o me: «A e mangua kpála dho inde ngaha beleḡ líli pi anvi ne engu, uo ngamemene!»

Yesu akobho kpála bini lí osisiti bua ad̄ ato mbolo lí e

(Tsia bhú Mat. 8:28-34; di ne bhú Mlk. 5:1-20.)

²⁶ Abhom̄-o, u akolo bhú ndu doto gba okpála na Gelasa, ayi ekp̄ bhúla ndu doto na Galilaya. ²⁷ Nedhinga lí Yesu ad̄ akoto bhú zab̄-o lie, kpála bini na kuti bhom̄-o ago ngú nabhaka aní. Kpála ango-o, osisiti bua ad̄ bhú aní. Ekpí bhelé,

ani dũ adyi bongo de, ani dũ asi bhú 'ti de. La-a, ani adũ bha bini adũ bhú ká olata. ²⁸⁻²⁹ Siti bua-a adũ agbulũ ani piko. Abhomũ-o, u atsia adũ agbite 'kpa ani ne 'dhũ ani ne ekpú di ne gbĩndjili ngú nalila ani. Engú bini, kpála ango-o adũ atsotsolo gbĩndjili di ne ekpũ-o má dhu dhu dhu! Siti bua atsia adũ amba bhúla ani ne abhú mili bili. Li kpála ango-o au Yesu lie me-e, ani aholo natũ 'ue. Abhomũ-o, ani ati bhú li 'dhũ Yesu, ani atsia asũla kpekpeke me: «Yesu, Ndili gba Ebhe na Apí 'Kpí, mo okũnda namene ngú ma pi? Ma ayo ka mũ me, mo oméne ma sisiti de!» Ani apa nani mo-o, anga Yesu adũ aha líli pi siti bua ango-o me ani koto bhú kpála bhomũ-o makoto.

³⁰ Yesu atsia ayi kpála ango-o me: «A 'li mũ pi?» Ani agie me: «A 'li ma me <Bhelé.>» Ani apa mo-o anga osisiti bua bhelé alĩ nani bhú ani. ³¹ Osisiti bua ango-o atsia adũ akikiliki lio pi Yesu me: «Mo ombá ya bhú tsu 'dú bhe má ngbongobho-o de!» ³² A abhaka me 'ngbé piga opame bini nde ngagili 'zũ gba o pí 'ta oo. Osisiti bua-a atsia apa pi Yesu me: «Ha kpadji pi ya, ya li bhú opame bhomũ-o.» Ani atsia azĩba pi uo.* ³³ Abhomũ-o, osisiti bua aze bhú kpála ango-o, u atsia amba lio bhú opame-o. Piga opame bhomũ-o libhomu ayie ne holo apí 'ta, u anũ alilinda bhú ekpø-o, u atsia amu.

³⁴ Li omũlila gba opame au engú inde

* **8:32** 8:32 Engú inde amene lie si-e, a dũ nani bhú kati gba omaYuda de, anga omaYuda ngau opame sisiti. Tsia bhú Lev. 11:7, ne bhú Det. 14:8, di ne bhú Mlk. 5:11.

akodho 'kpí-e lie, u atsi ne holo, u atsia anu nakpokpo ngali ango-o abhú gadhú ne abhú okuti. ³⁵ Okpála aze ngú nau engú inde akodho 'kpí-o. U akolo de Yesu lie, u abhaka me kpála inde li osisiti bua aze bhú e nde adu kuto bhú li 'dhu Yesu. Aní adu me aní nde adyi bongo, aní nde ngabhundja 'ngú hana ndjindji. Abhomu-o, tsulu atsia aholo uo. ³⁶ Okpála inde au ndu 'ngú bhomu-o hana atsia akpokpo pi uo maka li Yesu akobho kpála ango-o lie ko.

³⁷ Abhomu-o, ndu okpála hana na ndu doto bhomu-o atsia apa pi Yesu me aní yie bhú kuti gba o mayie, anga u adu adje tsulu naali. Yesu a'u bhú zabu-o ngú na'e ne enú. ³⁸ Kpála inde li osisiti bua aze bhú e aholo nalopolo lie pi Yesu me: «Yesu, i du me mu nde akunda-a, mo o'ó ka ma de, ní nu ne mu.» Engú bini, Yesu agie aní sidi, aní atsia apa pi aní me: ³⁹ «Gie limu agba mu, amba mu kpokpo ndu 'ngú inde li Ebhe amene e pi mu-o hana.» Abhomu-o, kpála ango-o atsia atapa ne kpokpo ndu 'ngú li Yesu amene e pi aní-e hana bhú gadhú libhому.

Yesu akobho ebe bini, aní atsia azuku di ndili na ebe gba Yailo

(Tsia bhú Mat. 9:18-26; di ne bhú Mlk. 5:21-43.)

⁴⁰ Nedhinga li Yesu agie lie lie ali pála ekpo koko-o, okpála bhelé asia aní ndjindji, anga ndu uo hana adu adjeke aní. ⁴¹ Li nedhinga bhomu-o, kpála bini akolo. A adu 'li aní me Yailo. Aní adu nani ngamá na eti nadjie líli gba Moidje na bili bhomu-o. Aní atí bhú li 'dhu Yesu, aní atsia

akikiliki lie pi ani me ani nu agba ni, ⁴² anga ndili gba ani na eole adu masikpe de nakpi. Koli ndili bhomu-o bha nani ka ani bini, ani adu ne kalanga ndjikpa ne ka bhisi. Li kpadji-e, bhiti okpala asulu Yesu ma wakaka!

⁴³ A abhaka me ole bini nde oo. Ole angoo, ngute adu atuko li ani bhú sunda kalanga ndjikpa ne ka bhisi. [Ani andjia nani tia lie hana pi omutia], engú bini, kpala bini ti nani da nakobho ani de. ⁴⁴ Ani ago ne akele Yesu, ani atsia abu 'kpa e li bongo 'ta ani-o.† Ngute-e a'o bha kolo natuko li ani maka ndjombe. ⁴⁵ Abhomu-o, Yesu atsia ayi me: «A abu 'kpa e li ma da?» Ndu uo hana agie me: «A ko naae ya de!» Piele atsia apa pi Yesu me: «Musuno, bhiti okpala inde asa mu ngbalina inde-e, ngasulu mu ngao.» ⁴⁶ Engú bini, Yesu atsia apa me: «Kpala bini abu 'kpa e li ma, anga ma ambila me te angu gba ma-a akoto.»

⁴⁷ Ole angoo au me Yesu ambila engú inde ni amene e ambila. Abhomu-o, ani ago ne naguku, ani tsia ati bhú li 'dhu Yesu. Ani atsia akpokpo pi Yesu kala ndu okpala hana ta 'ngú inde ani abu 'kpa e li ani lie, di ne maka ani akobho bha lie maka ndjombe-o. ⁴⁸ Yesu pi ani me: «Ndi ole-e, mo okobho, anga mo obhuka ma kukulu. Nu ne guo 'ngú .»

⁴⁹ Nedhinga li Yesu adu apa lie mo-o, kpala bini ayie agba ngamá Yailo, ani ago apa pi ani

† **8:44** 8:44 Bhú líli gba omaYuda-a, li ole du ne kuo gba olisi-e, ani bu 'kpa e li bhoko-o, li bhoko angoo kolo sisiti kala Ebhe. Tsia bhú Lev. 15:25-33.

me: «Ndili gba mụ-o andjili. Mo ondála matá mụsuno de.» ⁵⁰ Engú bini, li Yesu adje ani lie, ani atsia apa pi Yailo me: «Mo odjé tsulú de, dū bha ne nabhuka, ndili gba mụ-o akóbho makobho.»

⁵¹ Li Yesu akolo lie agba ngámá Yailo, ani ziba de me kpála bini li nganda ni abhú 'ti-e de, bha bini Piele, Djaa ne Djaki, a la bhadi-e 'dyi ndili-e ne 'hi ndili-o. ⁵² Ndū okpála inde adū oo hana, adū atū 'ue ne naku 'gbá ngú ndili ango-o. Abhomụ-o, Yesu atsia apa pi uo me: «Yi 'o naku 'gbá! Ndili-e kpi de, engú bini, ani tila.» ⁵³ La-a, u aholo namụ ani anga u adū ambila ndjindji me ndili-e akpi. ⁵⁴ Abhomụ-o, Yesu aholo 'kpa ani, ani atsia asula kpekpeke me: «Ndika ma, yie bhúlá!» ⁵⁵ Ndili-e azuku, ani ayie bhúlá kolo má gala! Yesu atsia aha líli pi uo me, u ha ezū pi ani. ⁵⁶ Okpála inde azu ani angamba naali. Engú bini, Yesu agbele 'dje uo kpekpeke me u apá belegū engú inde akodho 'kpí-e pi kpála bini de.

9

Yesu atima obhúlú titima ndjikpa ne ká bhisi gba e-o

(Tsia bhú Mat. 10:5-15; di ne bhú Mlk. 6:7-13.)

¹ Ekpí bini, Yesu apo bhúla omụkpata ndjikpa ne ká bhisi gba e-o. Ani aha angu pi uo me u pandja ndū osisiti bua hana bhú okpála, amba u kobho di okpála na kuo. ² Pipita-a, ani atsia atima uo me u nū ne kpokpo ngali Nau gba Ebhe , amba u kobho di okpála na kuo. ³ Ani pi uo me: «Nanū ka yi-e, yi abhá oehe de. Yi ahá ndula de.

Yi ahá ehe ngú nabi 'he bhúbhú de. Yi ahá ezú de. Yi ahá falanga de. Kpála bini bhú ká yi ahá bongo na mbulu bhisi de. ⁴ Ndu eti hana u asía yi bhú e-e, yi dɔ bha oo, akólo li nedhinga inde yi ayíe lie bhú eti ango-o. ⁵ Ndu eti hana u sía yi bhú e de-e, yi de koto bhúbhú, amba yi pulu doto na kuti gba uo inde adhedhe li 'dhu yi-o. Bhobhomu-o asúno pi uo me u amene siti 'ngú.»* ⁶ Obhulu titima gba Yesu agbida, u apu bhú ndu okuti hana. U akpokpo Bádha Ngali gba Ebhe-e pi okpála. U atsia akobho di okpála na kuo ne ndu bili hana.

Mabhundja gba Elode adholo ngangá

(Tsia bhú Mat. 14:1-12; di ne bhú Mlk. 6:14-29.)

⁷ Elode , ngámá na ndu doto na Galilaya, adje ndu 'ngú li Yesu ne omukpata gba e adu amene e hana. Abhomu-o, mabhundja gba ani-e atsia aholo adholo ngangá, anga okpála koko adu apa me: «Djaa bhulu nabatisa okpála azuku!» ⁸ Okoko adu apa me: «Polofeta Eliya akoto bhomu-o ngae.» Okoko atsia adu apa matá me: «Suka opolofeta na kalanu-o, azuku bhomu-o ngae.» ⁹ Engú bini, Elode atsia apa naae me: «Ma aha nani líli-e ngama me u kodho ngulu Djaa . Kpála bhende ma ngadje okpála apa 'ngú gba e me-e, a ko matá naae da?» Abhomu-o, ani atsia adu agili me ni u Yesu.

* **9:5** 9:5 Okuti gba omaYuda inde i ziba nani Bádha Ngali gba Ebhe-e de-e, u dɔ nani au uo maka omaYuda de, ne odoto gba o-o hana. Tsia bhú Mlk. 6:11.

Yesu aha 'zɛ pi bhiti okpála

(Tsia bhú Mat. 14:13-21; ne bhú Mlk. 6:30-44; di ne bhú Dja. 6:1-14.)

¹⁰ Li obhulɛ titima agie lio lie de Yesu-o, u atsia akpokpo ndɛ 'ngú inde u amene e hana pi ani. Pipita-a, ani abha uo, ani atsia atapa ne uo de okpála tsutsu li pápá na gɔdhu na Betesaida.

¹¹ Engú bini, li bhiti okpála bhomɛ-o ambila lie me u agbida oo, u atsia akpata ani. Abhomɛ-o, Yesu asia uo, ani atsia akpokpo 'ngú pindji Nau gba Ebhe-e pi uo. Ani atsia akobho di okpála inde adɛ ne kuo ko.

¹² Li ekpí aholo lie nabi-e, obhulɛ titima ndjikpa ne ká bhisi-e adyudyo lio de Yesu, u atsia apa pi ani me: «Ha kpadji pi okpála, amba u gbida nagili dabili nasi tété, di ne ehe nazɛ mazɛ bhú odjedje kuti masikpe si, anga ní ei bhú mili bili.» ¹³ Do Yesu pi uo me: «Yi ha 'zɛ pi uo ngayi.» U atsia agie me: «A bha ka ya si ne mapa bhuluvue di ne sungu bhisi. Ne me mo okúnda me ya nɛ nakala ezɛ pi ndɛ okpála inde-e hana ngaya?» ¹⁴ (Obhosi adɛ nani oo masikpe de kutu bhuluvue.) Yesu atsia apa pi omɛkpata gba e me: «Yi pa pi uo me u popo bhúla o okpála ndjikpa bhuluvue, ndjikpa bhuluvue, amba u dulɛ kuto.»

¹⁵ Omɛkpata-a amene maka ani apa pi uo lie ko. U atsia apa pi ndɛ okpála hana me u dulɛ kuto. ¹⁶ Abhomɛ-o, Yesu aha mapa bhuluvue ne sungu bhisi-o, ani atsia 'kpí ne bhúlá, ani atsia agie heni pi Ebhe ngubula ezɛ bhomɛ-o. Pipita-a, ani agumɛ mapa ne sungu-o, ani aha pi omɛkpata ngú nagagapa li okpála. ¹⁷ Ndɛ uo

hana azu 'he, u a'u'u má kpú kpú kpú! Dudu atigala-a, obhulu titima alo, a atsia abebedhe okili ndjikpa ne ká bhisí.

Piele apa me Yesu ne Masiya

(Tsia bhú Mat. 16:13-19; di ne bhú Mlk. 8:27-29.)

¹⁸ A akolo ekpí bini, Yesu adu akpokpo 'ngú ne Ebhe kpi e kpi me, omukpata gba ani-e nde de ani. Ani atsia ayi uo me: «Okpála ngapa me ma ne da?» ¹⁹ U agie me: «Okpála koko ngapa me, mu ne Djaa bhulu nabatisa okpála. Okoko me, mu ne polofeta Eliya. Okoko matá me, saka opolofeta na kalanu-o azuku.» ²⁰ Ani atsia ayi matá uo me: «A la yi-e, yi ngapa naayi me ma ne da?» Do Piele me: «Mu ne Masiya inde li Ebhe atima e ko.»

Yesu akpo 'ngú pindji nakpi ne nazuku ka e

(Tsia bhú Mat. 16:20-28; di ne bhú Mlk. 8:30, 9:1.)

²¹ Engú bini, ani agbele 'dje uo kpekepeke, ani atsia aha líli me u apá belegu engú bhomu-o pi kpála bini de. ²² Abhomu-o, ani atsia apa matá pi uo me: «A ayo me ngama, Ndili gba kpála-a, ma dje likabhu naali. Obhelesi okpála, ongbengbe odimandø di ne omusuno na líli gba Moidje ayála ma. U abhéle ma, engú bini, ekpí na bata-a, ma tsia zúku.»

²³ Pipita-a, ani apa pi ndu okpála hana inde adu oo me: «I du me kpála nde akunda nakpata ma-a, a ayo me ani 'o nabhundja 'ngú gba e makpe. Ekpí bini ne bini hana, a ayo me ani bi kulusi gba e-o, amba ani kpata ma. ²⁴ Padhá de,

anga i du me kpála nde akúnda nalila mukobho gba e, ani kpí. La-a, i du me kpála nde akúnda nakpi ngubula ma-a, ani tsia kóbho. ²⁵ I du me kpála nde asia ndu 'he na doto hana, engú la bini, ngaani makpe ani ngita-a, ani tsia kpi-e, a la pi ani babadha bhúbhú ne ni? ²⁶ I du me kpála bini nde adje numu li 'ngú gba ma-a, di ne bhe ma ngapa e-e, ngama Ndili gba kpála, ma adjé bhadi numu li 'ngú gba ani. A adú moko li nedhinga ma agó lie bhú nau na asasaua gba ma, ne bhe gba 'Dyi ma, di ne bhe gba oandjelu na bububu-o. ²⁷ Ma apa pi yi na paká me, okpála koko bhú ká obhende inde si-e, mú padhá de, u aú ngaiza Nau gba Ebhe-e kalanu.»

Zi Ebhe asa Yesu ngbalina

(Tsia bhú Mat. 17:1-8; di ne bhú Mlk. 9:2-8.)

²⁸ Masikpe de ekpi madjina pita ani apa 'ngú bhomu-o lie, Yesu aha Piele, ne Djaa di ne Djaki, ani atsia a'u ne uo apí 'ta ngú nakpokpo 'ngú ne Ebhe. ²⁹ Ani adu akpokpo 'ngú ne Ebhe lie, bhúla ani ayipa lie, bongo gba ani avu má tuu! ³⁰ Kolo me-e, okpála bhisi aze, u atsia aholo nagama 'ngú ne ani. A adu nani Moidje ne Eliya. ³¹ Zi Ebhe asa uo ngbalina. U atsia adu akpokpo 'ngú ne Yesu maka ani adji nandjia kulu gba e lie ne nakpi ka e abhú Yelusalema ko. ³² Piele ne obi e adu ne ela má yikpokpo! U agbungbua lio lie, u au Yesu ne okpála bhisi me zi Ebhe nde asa uo ngbalina. ³³ Li okpála bhisi bhomu-o adu ayie lie de Yesu-o, Piele atsia apa pi ani me: «Musuno, ya si ndjindji. A ayo me ya yiki 'ti ngbangbali bata, bini pi ma, bini pi Moidje, bini pi Eliya.» (Engú

bini, ani du ambila ta 'ngú inde ani adu apa e de.)

³⁴ Nedhinga ani adu apa 'ngú bhomu-o lie, ndindi atsia ago abuku uo. Li ndindi adu abuku uo lie, omukpata atsia aholo nadje tsula naali.

³⁵ Bhú ndindi-e, eli bini akoto, atsia apa me: «Kpála inde-e, a ko Ndili gba ma inde ma abhu e ko. Yi dje ani!» ³⁶ Pita li eli bhomu-o andjia lie, u au bha ibili Yesu kpi e kpi. Nani li nedhinga bhomu-o, omukpata andjili bha má bulu! U tsia pa nga nani engú ango-o pi kpála bini de.

Yesu akobho ndili na bhobhoko bini li siti bua adu ato mbolo lie

(Tsia bhú Mat. 17:14-18; di ne bhú Mlk. 9:14-27.)

³⁷ Li ekpí aseke lie, Yesu ne omukpata bata-a akø eta-o. Okpála bhelé atsia ago ngú nakø lio ne Yesu. ³⁸ Bhú ká okpála bhomu-o, kpála bini aholo nasusula me: «Musuno, kikiliako, dje nga bha-a mbo ndjinga ndili gba ma na bhobhoko-o. Koli ani bha ka ma bini!» ³⁹ Siti bua ngagbulu ani piko. A ngaha pi ani natu 'ue. A ngadyiki ani kpekpeke má djigi djigi! Li efu holo naze bhú 'bhø ani. Bua ango-o le bha nakoto bhú ani pima. Li angu ani ndjia má ngba! ⁴⁰ Ma akikiliki lima pi omukpata gba mu-o me u gbe bua ango-o bhú ani, engú bini, u ale pima.»

⁴¹ Do Yesu de-e: «Ngayi okpála na naki-e, yi ne nabhuka ade, yi ngamene siti 'ngú. Ma adú matá ne yi bhú dabili bini ngubula ekpí madho? Ma akibila matá yi ngubula ekpí madho?» Pipita-a,

Yesu apa pi kpála angoo me: «Go ne ndili gba mụ ei.»

⁴² Li ndili-e adu ago lie, bua angoo adiyiki ani má djigi djigi! Ani atsia agu 'i ani kuto má gbwe! Abhomu-o, Yesu ambe bhú 'ndji siti bua angoo. Ani akobho ndili-o, ani atsia aha ani pi 'dyi e. ⁴³ Ndu okpála hana adu angamba. U atsia aziba me Ebhe ne angu naali.

Yesu akpo matá engú pindji nakpi gba e ko

(Tsia bhú Mat. 17:22-23; di ne bhú Mlk. 9:30-32.)

Li ndu okpála hana adu angamba lie li ndu 'ngú li Yesu adu amene e, ani atsia apa pi omukpata gba e me: ⁴⁴ «Yi dje engú ma adji apa e pi yi inde-e ndjindji. U apú ma, Ndili gba kpála-a, pi okpála na doto.» ⁴⁵ Engú bini, omukpata gba ani-e mbila nani ta 'ngú bhomu-o de. Ebhe awo nani tata-a pi uo mawo. U atsia adu adje tsulu ngú nayi ani tété.

A ngbéngbé da?

(Tsia bhú Mat. 18:1-5; di ne bhú Mlk. 9:33-37.)

⁴⁶ Abhomu-o, omukpata aholo amene kpekebhe sunda o ngú nambila me, a ti da nadu ngbéngbé bhú ká o da. ⁴⁷ Engú bini, li Yesu ambila engú inde u adu abhundja e li bua o-o lie, abhomu-o, ani aha mboye ndili bini, ani a'o ani de e. ⁴⁸ Ani atsia apa pi uo me: «Kpála inde asia mboye ndili inde-e ka 'li ma-a, ani asia bhomu-o ma. Kpála inde asia ma-a, ani asia la di bhomu-o kpála inde atima ma ko. Padhá de,

anga kpála inde ane ne mboye bhú ká yi hana-a, aní ane ne engbé ngae.»

*Kpála inde i yala yi de-e, a ko naayi kpála
(Tsia bhú Mlk. 9:38-40.)*

⁴⁹ Abhomu-o, Djaa adyudyo lie de ani, ani atsia apa pi ani me: «Musunu, ya au kpála bini ngapandja osisiti bua bhú okpála ne 'li mu. Ya di me yoko ani, anga a ko mukpata gba mu-o maka ya de.» ⁵⁰ Engú bini, Yesu agie pi ani me: «Yi ayóko ani de, anga kpála inde i yala yi de-e, a ko naayi kpála.»

*Okpála na kuti bini na ndu doto na Samalia
ayala nasia Yesu*

⁵¹ Li nedhinga nagie lie ka Yesu abhúlá-a akolo lie masikpe-e, ani atsia aholo kpadji na Yelusalema ne kpéke bua hana. ⁵² Ani atima obhulu titima kalanu bhú kuti bini na ndu doto na Samalia, ngu naleke ndu 'ngú hana pi ani ndjindji. ⁵³ Engú bini, ani adu la anu lie ne abhú Yelusalema-a, okpála na kuti bhomu-o atsia ayala nasia ani. ⁵⁴ Omukpata Djaki ne Djaa au lie mo-o, u atsia apa pi Yesu me: «Ngámá, mo okunda me ya ha líli me mugbálá yie abhúlá, amba a go bhili uo?» ⁵⁵ Engú bini, Yesu adji bhúla e ne li pápá gba uo, ani atsia ambe bhú 'ndji uo.† ⁵⁶ Abhomu-o, u atsia agbida bhú kuti koko.

† 9:55 9:55 U aye bhú obhuku koko-o me: «Yi mbila ngua bua inde i ngagama 'ngú bhú yi-e de. Padhá de, anga ngama, Ndili gba kpála-a, ma go ngu nabhili okpála de, ma ago mangbo ngu nakobho uo.» Tsia bhú Luk. 19:10.

*Okpála bhende akúnda nakpata Yesu
(Tsia bhú Mat. 8:19-22.)*

⁵⁷ U adu lie li kpadji-e, kpála bini apa pi Yesu me: «Ma akpáta mu li ndu bili mo onú lie hana.»

⁵⁸ Yesu atsia apa pi ani me: «A ka onekpø di ne odhu ne dabili gba o ngú nasi tété. Engú bini, dabili ngú nago ka ma, Ndili gba kpála tété ade.»

⁵⁹ Ani apa matá pi kpála koko me: «Kpata ma.» Engú bini, kpála ango-o apa pi ani me: «Ngámá, 'o nga ma, amba ma nú zi ngaiza 'dyi ma.»‡

⁶⁰ Yesu agie pi ani me: «'O okpála bhende amu-o, u zi okuo gba o-o, amba ngamu-o, mu nu naamu ne kpokpo ngali Nau gba Ebhe ko.» ⁶¹ Kpála koko apa matá pi ani me: «Ngámá, ma akpáta mu makpata. Engú la bini, 'o ngaiza ma, amba ma nu bhana lima pi opiga gba ma ko.» ⁶² Yesu agie pi ani me: «Li kpála bini holo namene kulu ne kengø-o, pipita ani tsia 'kpí ne sidi-e, kpála ango-o ti ne Nau gba Ebhe-e de.»

10

Yesu atima omakpata ndjikpa mananika ne ká bhisi

¹ Pipita-a, Ngámá Yesu alo omakpata koko ndjikpa mananika ne ká bhisi.* Ani atsia atima uo bhisi bhisi kalanu bhú ndu ogudhu ne ndu bili hana inde a ayo nako lie me, ani nu bha ngae makpe ko. ² Ani atsia apa pi uo me: «Nguwa abhú 'dyi bhelé. Engú bini, okpála namene kulu

‡ **9:59** 9:59 A adu me 'dyi ani nde kpi nga nani-i de. Tsia bhú Eki. 20:12. * **10:1** 10:1 U aye bhú obhuku koko-o me: «Ndjikpa mananika.»

ango-o bhelé ade. Yi yo ka bhulɔ edyi-e me ani tima okpála na kulu bhelé bhú edyi gba e ko. ³ Ma atima yi maka okandələ bhú ká osia. Yi nɔnɔ! ⁴ Yi ahá falanga de. Yi ahá ehe nabi 'he bhúbhú de. Yi ahá maləkə de. Yi adú ne lɔlɔ li kpadji-e ngú nayiyi okpála de.

⁵ Yi li bhú 'ti bini-e, yi de pa ngaiza me: <Guo 'ngú gba Ebhe-e dɔ bhú 'ti inde.> ⁶ Li kpála inde akunda guo 'ngú dɔ bhú 'ti ango-o, li guo 'ngú gba yi-e dú bhú dabilɔ bini ne ani. I dɔ mo-o de-e, nayi na guo 'ngú gba yi-e gíe lie pí yi. ⁷ Yi dɔ bhú 'ti ango-o. I dɔ me u nde aha ehe nazɔ mazɔ di ne bhe nandji mandji pí yi-e, yi de zɔ, amba yi ndji. Padhá de, anga a ayo me kpála na kulu sia makalá na kulu gba e ko. Yi adú asi bhú 'ti ngangá de.

⁸ I dɔ me yi nde ali bhú gɔdɔ bini-e, li okpála na gɔdɔ ango-o sia yi-e, yi de zɔ 'he inde u ahá e pí yi ko. ⁹ Yi kobho obhulɔ kuo inde bhú gɔdɔ ango-o, amba yi pa pí ndɔ okpála hana me: <Naɔ gba Ebhe-e akolo de yi masikpe.>

¹⁰ Engú bini, i dɔ la me yi nde ali bhú gɔdɔ bini-e, u sia yi de-e, yi de ze ali kpadji, amba yi pa me: ¹¹ <Ya ngapulɔ belegɔ doto na gɔdɔ gba yi inde adhedhe li 'dɔ ya, ngú nasuno pí yi me yi amene siti 'ngú. Yi mbɔla la ndjindji me, Naɔ gba Ebhe-e akolo de yi masikpe.> ¹² Ma apa pí yi me li 'kpí li Ebhe akódho 'ngú gba okpála lie, okpála na gɔdɔ ango-o adjé likabhu naali ané okpála na Sodomɔ† mane.»

† **10:12** 10:12 Sodomɔ: A ko gɔdɔ inde li Ebhe atsulu nani e ka siti 'ngú gba okpála ango-o. Tsia bhú Dje. 19:24-28.

*Okuti inde ayala nabhuka Yesu
(Tsia bhú Mat. 11:20-24.)*

¹³ «'E-e! A ko likabhu pi yi okpála na gũdhũ na Koladjina! A ko likabhu pi yi okpála na gũdhũ na Betesaida! Padhá de, anga i dũ me ongamba 'ngũ inde amene lie agba yi-e, i méne lie bhú ogũdhũ na Tile ne Sidona-a, okpála na ogũdhũ ango-o de adyi nani pili didili, u tsia túko 'mbi bhú 'ndji o ngũ napana me u adji bua o adji. ¹⁴ Kaka-a, li 'kpí li Ebhe akódho 'ngũ gba okpála lie, likabhu gba yi-e ané bhende gba okpála na Tile ne Sidona mane. ¹⁵ Ne yi di, okpála na Kapalanauma-a, yi abhundja naayi me u a'é'e yi abhúlá-a? A mo-o ade. U abála yi bhú djua na dũdũma.»

¹⁶ Do ani matá pi omũkpata gba e me: «Li kpála bini dje yi-e, amba ani adje bhomũ-o ma. Li kpála bini yala nasia yi-e, amba ani ayala bhomũ-o nasia ma. Engũ bini, li kpála bini yala nasia ma-a, amba ani ayala bhomũ-o nasia kpála inde atima ma ko.»

Omũkpata ndjikpa mananika ne ká bhisi-e agie lio

¹⁷ Omũkpata ndjikpa mananika ne ká bhisi-e agie lio me u nde abedhe ne djali bedhe. U atsia apa me: «Ngámá, osisiti bua ngamanga belegũ ya ngao nedhinga ya ngaha líli pi uo lie ne 'li mũ ko!» ¹⁸ Yesu atsia apa pi uo me: «Ma au Satana ayie abhúlá akø kuto maka mũgbálá. ¹⁹ Yi djedje nga, ma aha angu pi yi ngũ nadele okpũũ ne oapekebhe ne 'dhũ yi di ne nandjia ndũ angu gba bhũũ yala gba yi-e hana. Ehe bini tí da namene yi sisiti de. ²⁰ Engũ bini, yi akpí djali ka li osisiti

bua ngamanga yi lie de. Yi kpi mangbo djali ka li Ebhe aye 'li yi lie abhúlá ko.»

Yesu akpi djali

(Tsia bhú Mat. 11:25-27, 13:16-17.)

²¹ Bha li nedhinga ango-o makpe-e, Yesu abedhe nani ne djali bedhe ka Bu Bhobua . Aní atsia apa me: «Ma agie heni pí mụ, 'Dyi ma, Ngámá na abhúlá ne Ngámá na doto. Padhá de, anga engú inde mo opana e pí obhende imbilangu de-e, mo owo pí okpála na imbilangu di ne obhende amene balua má too! A moko, 'Dyi ma, anga mo okunda bha nani moko.

²² 'Dyi ma, mo oha ndu 'he hana muma. Kpála bini mbila de me ngama, Ndili-e, ma ne da-ie, bha bini ngamu, 'Dyi ma. Kpála bini mbila la di de me ngamu, 'Dyi ma-a, mụ ne da-ie, bha bini ngama, Ndili gba mụ-o, la di ne okpála bhende li ngama, Ndili-e, ma akunda napana mụ pí o ko.»

²³ Pipita-a, aní adji bhúla e li pápá gba omukpata gba e-o, aní atsia apa pí uo kpi o kpi me: «A ko djali pí yi, ngayi okpála i ngau engú inde yi ngau e ko! ²⁴ Padhá de, anga ma apa pí yi me opolofeta di ne ongbengbe ongámási bhelé akunda nani nau engú yi ngau e inde, engú bini u u de. U akunda nani nadjé engú yi ngadje e inde, engú bini u dje de.»

Kpála bini na ndu doto na Samalía inde amene bádha 'ngú

²⁵ Abhomu-o, musuno bini na líli gba Moidje ayie bhúlá. Aní atsia ayi Yesu ngú nale aní me: «Musuno, a ayo me ma mene pí ngubula me ma

sia mukobho na duduṃa?» ²⁶ Yesu agie pi ani me: «U aye bhú líli gba ní-e pi? Mo otatanga lie, mu djedje bhúbhú pi?» ²⁷ Kpála ango-o atsia agie pi ani me: ««A ayo me kunda Ebhe, Ngámá gba mu-o, ne bua mu hana, ne mukobho gba mu-o hana, ne angu gba mu-o hana, ne mabhundja gba mu-o hana», amba «Mu kunda la di kilí mu, maka mo okunda limu lie makpe ko.»† » ²⁸ Do Yesu pi ani me: «Mo ogie ndjindji. Mene moko, amba mu sia mukobho na duduṃa.»

²⁹ Engú bini, musuno na líli-e ango-o adu akunda nasuno me engú inde ni ayi e, a ngbing-bili. Abhomu-o, ani atsia ayi Yesu me: «Kilí ma-a, a ko da?»

³⁰ Do Yesu pi ani me: «Kpála bini ayie nani bhú Yelusalema, ani adu akø ne abhú Djeliko. Li kpadji-e, ani ati bhú 'kpa obhulu 'zi inde adu agbulu 'he gba okpála ne kpéke. U abha obongo gba ani-o. U abhi ani má kpú! U abha lio-o, u agbida. U atsia a'o ka ani masikpe de nakpi.

³¹ Dimandø bini adu apu li kpadji ango-o. Ani au kpála ango-o lie me-e, ani abuma bha ani li pála kpadji koko, ani atsia atapa. ³² Kpála bini na piga gba Levi‡ akolo di li bili li kpála ango-o adu lie-o. Ani au ani lie, ani abuma bha ani li pála kpadji koko, ani atsia atapa.

³³ Engú bini, kpála bini na ndu doto na Samalia inde adu naae bhú dhuku li kpadji bhomu-o, akolo de ani. Ani au ani lie, ani adje ndjinga ani

† **10:27** 10:27 Tsia bhú Det. 6:5; di ne bhú Lev. 19:18. ‡ **10:32** 10:32 Piga gba Levi: A ko okpála inde a adu nani ateteke odimandø li kulu bhú 'ngbé 'ti Ebhe gba omaYuda-o.

naali. ³⁴ Ani adyudyo lie de ani masikpe. Ani aha emu di ne vino, § ani atuko li djila oeka gba ani-o, ani atsia agbite ne papala bongo. Ani aha ani, ani a'o ani pi 'ngbu punda gba e-o. Ani anu ne ani bhú 'ti gba ogomago. Oo, ani atsia alila ani ndjindji. ³⁵ Li ekpi aseke lie, ani agbe li falanga bhisi, ani aha pi bhulu eti-o. Ani atsia apa pi ani me: «Lila kpála inde-e ndjindji. I du me mu nde apu tia koko pi ani pi bhende-e, ma agie pi mu ngama, nedhinga ma apu matá lie sii ko.»

³⁶ Yesu atsia ayi musuno bhomu-o me: «Mo obhundja naamu pi? Bhú ka okpála bata bhomu-o, a ko kpála bhedho adu nani kilí kpála inde ati bhú 'kpa obhulu 'zi bhomu-o?» ³⁷ Musuno na lili-e agie me: «A ko bhende adje ndjinga ani-o.» Yesu atsia apa pi ani me: «Nanu, amba mu mene bhadi moko.»

Yesu anu natsia Malata ne Malia

³⁸ Li Yesu ne omukpata gba e adu lie li kpadji-e, ani ali bhú kuti bini. Oo, ele bini adu 'li ani me Malata, ani atsia asia Yesu agba e. ³⁹ Malata adu ne ndai e na eele bini, adu 'li ani me Malia. Malia adu naae kuto bhú li 'dhu Yesu, ani atsia adu adje engu inde li Yesu adu apa e ko. ⁴⁰ Bua Malata adu abhula ka bhiti kulu-o. Ani ago de Yesu, ani atsia apa pi ani me: «Ngamá, li ndai ma a'o ka ma lie namene ndu kulu hana kpi ma kpi me-e, mu bhundja 'ngu tete bini di? Pa ngala pi ani me, ani go ha mbo 'kpa e mama.» ⁴¹ Ngamá agie pi ani me: «Malata, Malata, mu nga'o bua

§ 10:34 10:34 Vino du di nani ngu nabhili okoke bhú djila eka.

mụ abhúlá, mụ la di ngatutu limu ngubula ongú bhelé. ⁴² La-a, a ndjindji ne koli 'he bini. Malia aha naae ehe inde ane ne bádha, inde li kpála bini dhépe e ka ani de.»

11

Yesu asuno nakpokpo 'ngú ne Ebhe pi omukpata gba e-o

(Tsia bhú Mat. 6:9-13.)

¹ A adu ekpí bini, Yesu adu akpokpo 'ngú ne Ebhe li bili bini. Aní andjia lie, sùka omukpata gba ani-e atsia apa pi ani me: «Ngámá, suno nakpokpo 'ngú ne Ebhe pi ya, maka li Djaa asuno di lie pi omukpata gba e ko.» ² Yesu atsia apa pi uo me: «Yi du akpokpo 'ngú ne Ebhe-e, yi de pa me:

‹'Dyi ya,

a ayo me, okpála mbila me, mụ ne Ebhe na bubu;
a ayo me, mụ go ụ Ngámá píla doto.

³ Ha ezụ gba ya na ekpí bini ne bini-e pi ya.

⁴ Mbu li osisiti 'ngú gba ya ko.

A moko, ngaya makpe, ya ngambu di li osisiti 'ngú li okpála amene e li pabili gba ya ko. Mo o'ó de me nale ha angu ya-a de.»

⁵ Yesu atsia apa matá pi uo me: «Í du me sùka yi bini nde ne kilí e, aní nù bhaka ani agba e tutu sukpe ngú napa pi ani me: ‹Wai, ha mbo mapa mụma bata. ⁶ Kilí ma bini inde bhú dholo ago li ma oo, ehe la ka ma ngú nahaha pi ani ade.»

⁷ Í du me bhende abhú 'ti-e nde agie pi ani me: ‹Mo ondála ma de! Ma ani bhoti-e ani. Ngaya ne ongisi gba ma-a, ya asili kuto asili. Ma ti da nayie

bhúlá ngú naha mapa pi mü de.»⁸ Ma apa pi yi na paká me, abana aní yie bhúlá ngú nahaha pi aní kabula mukunda gba o-o de-e, engú bini, aní ayíe bhúlá ngú naha ndu 'he hana inde aní nde ne gumu e pi aní ka aní ngandala aní lie ko.

⁹ Ngama-a, ma atsia apa pi yi me, yi yo 'he inde yi nde ne gumu e-o, amba Ebhe ha pi yi. Yi gili 'he inde yi nde ne gumu e-o, amba yi u. Yi bhi bhoti-o, amba Ebhe 'u pi yi. ¹⁰ Padhá de, anga ndu okpála hana inde ngayo 'he aní nde ne gumu e, aní ngasisia. Kpála bhende ngagili 'he inde aní nde ne gumu e, aní ngauu. Ebhe nga'u bhoti pi kpála bhende ngabhíbi-o. ¹¹ Bhú ká yi odyi ongisi-e, a ti da naha kpulu pi ndili gba e da, i du me ndili-e nde ayo ka aní sungu-o? ¹² I du me aní nde ayo ka aní pala 'ngu-o, aní tsia há pi aní apekebhe-e? ¹³ Belegu ngayi okpála na sisiti-e, yi ngaha babadha 'he pi ongisi gba yi-o. A ane la mane ne bádha pi 'Dyi yi inde abhúlá-a me aní ha Bu Bhobua pi obhende ngayoyo ka aní ko!»

Yesu agbe siti bua inde adu ani 'bhø kpála-o
(*Tsia bhú Mat. 12:22-30; di ne bhú Mlk. 3:22-27.*)

¹⁴ Yesu adu agbe siti bua inde adu ani 'bhø kpála bhú bhoko bini. Li siti bua angoo akoto lie, kpála angoo aholo agama 'ngú. Abhomu-o, bhiti okpála inde adu oo angamba naali. ¹⁵ Okpála koko bhú ká uo atsia apa me: «Ngámá gba osisiti bua inde 'li e me Beledjebula ngaha angu pi aní ngae, ngú napandja osisiti bua ne di!»

* **11:11** 11:11 U aye bhú obhuku koko-o me: «Teme i du me u nde ayo ka aní mapa.»

16 Okoko adu agili nale ani. Abhomu-o, u atsia apa pi ani me, ani mene ngamba 'ngú ngú napana me, angu gba ani-e ngayie abhúlá. 17 Engú bini, Yesu ambila mabhundja gba uo-o lie, ani atsia apa pi uo me: «Ɔ du me okpála gba ngámá bini nde ngagu gbele sunda o, nau angu-o lú-u de. Li ndu eti hana túko. 18 Ɔ du me omaha Satana nde ngagu gbele sunda o-o, nau gba ani-e ti da nalu lele pi? Padhá de, anga yi ngapa me, ma ngapandja osisiti bua ne angu gba Beledjebula. 19 Ɔ du me ma nde ngapandja osisiti bua ne angu gba Beledjebula-a, okpála gba yi-e ngapandja uo ne angu gba da? Kaka-a, okpála gba yi-e akódho 'ngú gba yi-e ngao! 20 La-a, i du me ma nde ngapandja osisiti bua ne angu gba Ebhe na paká-a, apa bhomu-o me, Nau gba Ebhe-e akolo li yi akolo.

21 Li kpála bini na angu inde li tia 'gú nde ka e ndjindji, du alila eti gba e-e, ehe bini dúla tia gba ani-e de. 22 Engú la bini, i du me kpála bini inde ane ani ne angu-o go, ani há egú pi ani, ani tsia há angu ani. Ani bhá ndu tia 'gú inde ani adu a'o bua e lie hana. Ani tsia gápa ndu 'he inde ani abha e ka ani-e hana.

23 Kpála bhende pi ma ade-e, a ko yala ma. Kpála bhende i ha 'kpa e muma ngú napo bhúla okpála de-e, ani ngatsambala uo matsambala.»

*Siti bua ti da matá nagie lie
(Tsia bhú Mat. 12:43-45.)*

²⁴ «Li siti bua koto bhú kpála bini-e, aní nú ne djakadha abhú omili bili† ngú nagili bili naguo ka e tété. I du me aní nde u de-e, aní pá li bua e me: «Ma agie lima bhú 'ti gba ma inde ma akoto nako bhú e-o.» ²⁵ Aní gie lie oo, aní bháka me u apo bhú 'ti-o, u aleke ndjindji. ²⁶ Abhomu-o, aní nú, aní bhá osisiti bua koko mananika inde ane aní ne siti. U gie lio bhú dabili bini, u lí bhú 'ti-o, u tsia dúlu. Pipita-a, mukobho gba kpála ango-o, kólo la matá sisiti naali ane bhende na kalanu-o mane.»

Djali na kukulu

²⁷ Nedhinga aní adu apa 'ngú bhomu-o lie, elee bini atsia asula pi aní bhú ká okpála me: «A ko djali pi elee inde azu mu-o, inde di mo ondji 'ka e-o!» ²⁸ Engú bini, Yesu agie me: «A ko djali mangbo pi okpála inde ngadje eli gba Ebhe di ne nalilila ko!»

Yesu ayala namene ngamba 'ngú pi okpála (Tsia bhú Mat. 12:38-42.)

²⁹ Li bhiti okpála ago apo bhúla o lie de Yesu-o, aní atsia aholo apa me: «Okpála na naki inde-e sisiti. U ngayo ngamba 'ngú. Engú bini, Ebhe méne ngamba 'ngú bini pi uo de, bha bini bhende gba polofeta Djonasi. ³⁰ Padhá de, anga maka li Ebhe aha nani Djonasi lie ngú napana ngamba 'ngú pi okpála na Ninive-e, Ebhe ahá bhadi ma, Ndili gba kpála-a, ngú napana ngamba 'ngú pi okpála na naki moko. ³¹ Ngámá na eele

† **11:24** 11:24 Mili bili: A ko bili inde li engu nde lie ade, li kpála ti da di nasi kuti lie de.

inde adu atsia 'kpí li ndu doto na Saba ayie nani tsutsu ngú nago nadje oeli na imbilangu gba 'ngbé ngámá Salomo. Li Ebhe akódho 'ngú gba okpála lie, ngámá na eelə ang-o alú kala okpála na naki, ani tsia a'ó 'ngú pí uo. Kaka-a, kpála bini si, ani ane Salomo mane! ³² Okpála na Ninive adji nani bua o li nedhinga u adje ngali gba Ebhe inde li Djonasi adu akpokpo e lie-o. Li Ebhe akódho 'ngú gba okpála lie, okpála na Ninive alú kala okpála na naki, u tsia a'ó 'ngú pí uo. Kaka-a, kpála bini si, ani ane Djonasi mane!»

Nadu li zi 'kpí

(Tsia bhú Mat. 5:15, 6:22-23.)

³³ «I du me kpála bini nde adhedhe eke-e, ani tó asa lusa de. Engú bini, ani 'ó pí 'he amba okpála inde ngali bhú 'ti-e, u u 'kpí tété ndjindji. ³⁴ Djila mu ne zi 'kpí na kute mu. Li djila mu du ndjindji-e, ndu kute mu hana dú bhú zi 'kpí. Engú bini, li djila mu du sisiti-e, ndu kute mu hana dú bhú biti. ³⁵ Tsia ndjindji me zi 'kpí inde bhú mu-o, adú biti de. ³⁶ I du me ndu kute mu hana nde li zi 'kpí-e, yá mu bini nde bhú biti ade-e, kute mu libhomu dú li zi 'kpí, maka li zi 'ke ngaziga mu lie má ngilili ko!»

Yesu ambamba ta osisiti 'ngú gba omuFalisai di ne bhende gba omusuno na líli gba Moidje-o

(Tsia bhú Mat. 23:1-36; di ne bhú Mlk. 12:38-40.)

³⁷ Li Yesu andjia nagama 'ngú lie, muFalisai bini atsia a'i ani agba e ngú nazu 'he. Ani ali abhú 'ti gba muFalisai-o, ani atsia aholo nazu

'he-o. ³⁸ Mufalisai ango-o angamba naali, anga ani au me Yesu vɔlɔ lie kala nazɔ 'he-e de.‡

³⁹ Abhomɔ-o, Ngámá Yesu apa pɪ ani me: «Ngayi omufalisai-e, yi ngavɔlɔ kute pápá di ne kute saani. Engú la bini, ngayi-e, yi abedhe ne 'ngbé bua di ne siti bua bhú yi bedhe.

⁴⁰ Imbilangu bhú yi ade! Ebhe inde abho kute-e, ani bho di bua ngae di? ⁴¹ Kaka-a, yi ha mangbo pɪ obhɔlɔ ndibhili ehe bhende bhú opápá di ne bhú osaani gba yi ko. Yi mene mo-o, li ndɔ 'he hana kólo pɪ yi babadha.

⁴² La-a, a ko likabhu pɪ yi, omufalisai! Padhá de, anga yi ngaha bini bhú ká ndjikpa na oulu na sese ne ndɔ djedje ulu na abhú 'dyi-e hana pɪ Ebhe. La-a, yi mene engú na ngbingbili pɪ okpála de. Yi kúnda la di Ebhe de. A la bhomɔ-o engú inde ayo me yi mene ngaiza e me, yi nde 'lɪ 'to yi li naha bini bhú ká ndjikpa na oehe gba yi-e pɪ Ebhe de ko. ⁴³ A ko likabhu pɪ yi, omufalisai! Padhá de, anga yi kúnda bha nadɔlɔ pɪ dabilɪ na akalanɔ bhú otɪ nadjɛ lílɪ gba Moidje . Yi kúnda la di me okpála dɔ ne yiyi yi maka ongámási li ohi-kpadji. ⁴⁴ A ko likabhu pɪ yi! Padhá de, anga yi maka olata inde u 'o 'he pɪ e ngú nasusuno de, li okpála ngadhɔkɔ pɪ e me u nde mbɪla de!»

⁴⁵ Suka omɔsuno na lílɪ-e apa pɪ ani me: «Mɔsuno, mo opa lie mo-o, mo osobho di bhomɔ-o ya.» ⁴⁶ Yesu atsia agie me: «A ko di likabhu pɪ yi, omɔsuno na lílɪ! Padhá de, anga yi ngamene

‡ 11:38 11:38 Omufalisai adɔ nani navɔlɔ lio kala nazɔ 'he ngɔbula nasuno me o naao ne obabadha okpála kala Ebhe.

mugito me yi nga'o titili 'he li 'ngbu okpála. Engú la bini, ngayi makpe-e, yi 'o belegu likpa yi bini tété ngú nateteke uo de. ⁴⁷ A ko likabhu pi yi! Padhá de, anga yi ngaleke olata opolofeta, inde li ogbi yi abhili nani o-o! ⁴⁸ Yi ngapana bhomu-o me, yi aziba engú inde li ogbi yi amene nani e ko. Padhá de, anga ngauo-o, u abhili opolofeta, ngayi-e, yi la ngaleke olata uo! ⁴⁹ Kaka-a, Ebhe ne imbilangu gba e, apa li 'ngú gba yi-e me: <Ma atíma opolofeta di ne obhulu titima pi uo. U abhili okoko bhú ká uo, u tsia méne okoko sisiti.>

⁵⁰ Nayie maka li Ebhe abho nani doto lie, okpála atuko ngute opolofeta bhelé. Kaka-a, okpála na naki abí mangimbo angoo ngao. ⁵¹ Kalanu-o, u abhele Abele. Ali soso-o, u abhele Djakalia bhú mbadhasu na 'ngbé 'ti Ebhe gba omaYuda, sunda bili natsulu enu pi Ebhe ne titina na bubu-o. Ma apa pi yi na paká me, okpála na naki abí mangimbo na ngute okpála bhomu-o hana ngao!

⁵² A ko likabhu pi yi, omusuno na líli! Padhá de, anga yi ani bhoti na imbilangu-o. La ngayi makpe-e, yi li de. Yi atsia ani la di bhoti angoo pi obhende akunda nali-o.»

⁵³ Li Yesu ayie lie li bili bhomu-o, omusuno na líli ne omuFalisai aholo napadha ani. U atsia aholo ayiyi ani li ongu bhelé bhelé. ⁵⁴ Padhá de, anga u adu agili nagbo ani li 'li e.

12

*Yi du apa 'ngú mbámbá, yi adú ne tsulu de
(Tsia bhú Mat. 10:26-27.)*

1 Nedhinga bhomu-o, bhiti okpála apo bhúla o de Yesu. U adu bhibhiti naali, kaka-a, u adu adedele 'dhu obi o. Abhomu-o, Yesu atsia aholo napa ngaiza pi omakpata gba e me: «'E-e! Yi lila liyi ka levile gba omuFalisai-e uu! Padhá de, anga u ngali bhú ndu ongu hana ne kali gba o-o maka li levile* ngali bhú mapa lie hana ko. 2 Ndu 'ngú inde awo lie mawo-o hana, akóto bhú mbasú. Ndu 'ngú inde na pepe hana, ndu okpála hana ambíla. 3 Kaka-a, ndu 'ngú inde yi apá e sukpe-e hana, okpála adjé ne ngbikpi. Ndu 'ngú inde yi apá e bhú tupele abhú 'ti-e hana, okpála asúsula ne di bhú mbasú.»

*Kpála inde a ayo me yi kpe e ko
(Tsia bhú Mat. 10:28-31.)*

4 «Ma apa pi yi, ngayi ondaise ma me: yi akpé okpála bhende ngabhelo kute-e de, inde pipita-a, i ti da matá namene 'he bini de ko. 5 Ma asúno pi yi kpála inde a ayo me yi kpe e ko. Yi kpe Ebhe inde ka e ne angu ngú nabhili okpála. Pipita-a, ani ti da nabu uo bhú djua na duduma. A moko, ma apa pi yi me: yi kpe mangbo ani!

6 U tsitsindji odjedje odhu bhuluvue ngubula senge bhisi di? La-a, Ebhe 'ili 'to e li saka uo bini de. 7 Ebhe mbíla belegu alo na sundjo yi-e hana. Yi adjé tsulu de, bhú djila Ebhe-e, yi ane bhiti odjedje 'dhu bhomu-o mane!»

*Okpála ayála Yesu-o, Yesu ayála di uo
(Tsia bhú Mat. 10:32-33, 12:32.)*

* 12:1 12:1 Li bilí inde-e, levile ngasuno ehe na sisiti.

⁸ «Ma apa pi yi me: kpála inde apá li ma bhú ká djila okpála me ni ne naama kpála-a, ngama, Ndili gba kpála-a, ma apá bhadi li ani bhú ká djila oandjelu gba Ebhe-e me, a ko naama kpála. ⁹ Engú bini, kpála inde apá li ma bhú ká djila okpála me ni mbila ma de-e, ngama, Ndili gba kpála, ma apá bhadi li ani bhú ká djila oandjelu gba Ebhe-e me, ma ambila ani de.

¹⁰ I du me kpála bini nde apa siti 'ngú li kute ma, Ndili gba kpála-a, li Ebhe mbú li ani. I du la me kpála bini nde asobho Bu Bhobua-a , Ebhe mbú li ani de.

¹¹ Nedhinga u anú lie ne yi bhú oti nadjé líli gba Moidje , di ne kala ongámási inde ngatsia 'kpí li doto me u kodho 'ngú gba yi-e, yi adjé tsulu de me yi akóbho li mangua kpadji dho-ie de, di ne me yi apá pi-ie de. ¹² Padhá de, anga li nedhinga bhomu-o, Bu Bhobua asúno pi yi ngae engú inde a ayo me yi pa e-o.»

Mukobho gba kpála ane tia

¹³ Abhomu-o, kpála bini bhú ká okpála apa pi Yesu me: «Musunu, pa pi ndai ma me ani ha naama tia na libhondi 'dyi ya-a muma haha.»

¹⁴ Yesu agie pi ani me: «Wai, a'o ma kpála nakodho 'ngú di ne nagbogbo bhusu otia gba yi-e da?» ¹⁵ Ani atsia apa pi ndu uo hana me: «'E-e! Yi lila liyi ka gumu tia na doto uu, anga belegu li tia du bha ka kpála bhelé-e, mukobho gba ani-e du bhúbhú de.»

¹⁶ Abhomu-o, ani atsia akpokpo gbitaku inde pi uo me: «Kpála bini na tia adu nani ne odyi bhelé inde aha nguwa pi ani naali. ¹⁷ Ani adu ayi

li bua e me: «Ma améne si pi? Dabili ka ma ngú nalila nguwa gba ma-a tété hana ade.» ¹⁸ Pipita-a, ani me: «Ma ambila engú inde ma améne e ambila! Ma apándjala ongbokopi gba ma-o, ma ayiki ibili obhe na ngbengbengbe. Ma bú nguwa ne otia gba ma-a hana bhúbhú. ¹⁹ Abhomu-o, ma tsia pá li bua ma me, tia ka ma bhelé ngubula bhiti kalanga. Ma guo ngala mbo guguo. Ma zu babadha 'zu, ma ndji pandi, amba ma kpi djali.» ²⁰ Engú bini, Ebhe pi ani me: «Mu ne ngingi! Sukpe na naki-e, mu ngakpi. Ndu 'he inde mo opo bhúla e hana-a atígala pi da?» ²¹ Yesu apa matá me: «A bhadi moko pi kpála inde ngapo bhúla tia pi e makpe, me ani nde gili nadu bhulu tia li pápá gba Ebhe de ko.»

Yi ha liyi pi Ebhe

(Tsia bhú Mat. 6:25-34.)

²² Pipita-a, Yesu atsia apa pi omukpata gba e me: «Kaka-a, ma apa pi yi me: yi akina liyi ngubula ezú inde yi nde ne gumu e ngú mukobho gba yi-e de. Yi akina di liyi ngubula obongo inde yi nde ne gumu e ngú kute yi-e de. ²³ Padhá de, anga mukobho gba yi-e ane ezú. La di-e, kute yi ane bongo. ²⁴ Yi tsia nga odhu, u lulu 'dyi de. U popo bhúla nguwa de. Dabili ngú naleke 'zu ka uo tété ade. Ngbokopi ka uo ade. La-a, Ebhe ngaku uo! Mukobho gba yi-e, ane bhe gba odhu-o tsutsu naali!

²⁵ A ko da bhú ká yi-e, inde ka nakina lie, i ti da nadyudyo ekpi na mukobho gba e nga bha mbo ne ekpi bini-e? ²⁶ I du me yi nde ti da namene belegu de mboye ehe bhomu-o, yi la ngakina liyi

ngú ongú koko ka ni? ²⁷ Yi tsia nga ofelele abhiye. U memene kulu de. U dudu bongo de. Ma apa la pi yi me, belegu 'ngbé ngámá Salomo bhú ndu ká tia gba e hana-a, ani sia bongo bini ane ne bádha maka susuka de. ²⁸ I du me Ebhe nde ngadyi bongo li ulu inde naki abhiye, mambi u tsia bhíke e bhú djua-a, ani ti da nadyi bongo li yi ane mane di? Ngayi okpála inde li nabhuka gba yi-e nde yeye!

²⁹ Kaka-a, yi a'ó bua yi abhúlá ngú nagili ezú inde yi azú e, ne ehe bhende yi andjí e de. ³⁰ Omupagano, okpála na doto inde-e, u ngagili ehe bhomu-o ndu 'kpí hana ngao. Engú bini, 'Dyi yi Ebhe mbila hana me yi ne gugumu. ³¹ Yi gili nga mangbo namene ongú inde li Nau gba Ebhe-e akunda e ko. Yi mene mo-o, li Ebhe tsia há di ndu 'he koko pi yi hana pépé.»

*Yi wo tia gba yi-e abhúlá
(Tsia bhú Mat. 6:19-21.)*

³² «Ngayi okpála gba ma, inde bhelé ade-e, yi adjé tsulu de. Padhá de, anga 'Dyi yi Ebhe au ndjindji me yi du ongámási bhú Nau gba ani-e, maka ngaani 'Dyi yi, ni nde lie ne Ngámá ko. ³³ Yi tsindji ohe gba yi-o, amba yi ha tiatia, yi ha pi obhulu ndibhili. Yi bho pi yi oti bongo inde i kádha de. Yi wo tia gba yi-e abhúlá, li bili i síti lie de. Obhulu 'zi ti da nakolo tété de. Okoké ti la di da nazuzu de. ³⁴ Padhá de, anga bili inde li tia gba yi-e nde lie, bua yi bhadi oo ko.»

Okpála na kulu inde i ngalila

35 «Yi dɛ bedhe ngɔbula kulu maka kpála inde adyi bongo na kulu, ani atsia adhedhe eke gba e madhedhe. 36 Yi dɛ bedhe maka okpála inde i ngadjeke ngámá gba o me, ani nde atapa bhú anokomiá na kɔva. U ngadjeke me u 'ɛ bhoti-e pi ani má gala, li nedhinga inde ani agó nabhibhi lie ko. 37 A ko djali pi okpála na kulu inde li ngámá gba o akólo lie, ani bháka me u nde la de ko! Ma apa pi yi na paká me, ani dyí bongo na kulu gba e-o, ani 'í uo ngɔbula nazɛ 'he. Ani tsia há ezɛ-o pi uo. 38 A ko djali pi uo, i dɛ me ani nde abhaka me u nde la de ko, belegɛ ani go tutu sukpe, belegɛ ani go bhú sikikpi! 39 Yi mbila ndjindji me, i dú me bhulɛ eti mbíla nedhinga inde li bhulɛ 'zi agó lie mambíla-a, ani de 'ó de me ani li abhú 'ti gba ni-e de. 40 Ngayi di-e, yi dɛ bedhe. Padhá de, anga yi mbíla nedhinga li ngama, Ndili gba kpála-a, ma agó lie de.»

Kpála na kulu na ngbingbili di ne kpála na kulu na sisiti

(Tsia bhú Mat. 24:45-51.)

41 Abhomɛ-o, Piele atsia ayi ani me: «Ngámá, mo opa gbitaku inde-e bha bini pi ya kpi ya kpi? Ne me, mo opa pi ndɛ okpála hana.» 42 Ngámá agie pi ani me: «Kpála na kulu na ngbingbili ne imbilangɛ-o, a ko bhedho? A ko kpála bhende li ngámá gba e a'o e ngú nalila eti gba e-o, di ne nagapa ezɛ pi okpála koko na kulu, i dɛ me nedhinga ango-o nde akolo-o. 43 A ko djali pi kpála na kulu ango-o, i dɛ me ngámá gba ani-e nde agie lie agba e, ani tsia bhaka me ani nde ngamene kulu gba e ko! 44 Ma apa pi yi

na paká me, ngámá bhomu-o 'ó ani pí 'ndji ndu 'he gba e hana. ⁴⁵ Engú bini, i du me kpála na kulu ango-o nde apa li bua e me: <Ha-a! Ngámá gba ma-a gó má gala de.> Ani hólo nabhi obi e na obhosibhosi di ne obhe na olisilisi-o. Ani hólo nazu 'he, nandji pandi ne nalangba ne di. ⁴⁶ Ngámá gba ani-e gíe lie li ekpí ani djeke ani lie de, li nedhinga inde ani mbila e de. Ngámá gba ani-e 'é ani bhú kulu, ani tsia 'ó ani bhú ká okpála na sisiti.†

⁴⁷ I du me kpála na kulu nde ambila engú li ngámá gba e akunda e, engú bini ani tsia leke lie ngú namemene maka li ngámá ango-o akunda lie de-e, kaka-a, u bhí ani naali. ⁴⁸ La-a, i du me kpála na kulu nde mbila 'ngú li ngámá gba e ngakunda e de-e, ani mene engú inde a ayo me u bhi ani ka e, u bhí ani naali de. Padhá de, anga kpála bhende u aha 'he pi e bhelé-e, u ayó bhadi 'he ka ani bhelé. Kpála bhende u a'o 'he sa 'kpa e bhelé-e, u ayó matá ehe ka ani pépé ane mane.»

*Yesu ago ngú nagbogbo bhusu okpála
(Tsia bhú Mat. 10:34-36.)*

⁴⁹ «Ma ago ngú nabhike djua píla doto. Ma akunda me adu atsi matsi! ⁵⁰ A ayo me ma sia batisimo na likabhu. La-a, likabhu li bua ma naali akólo li 'kpí inde ma asía lie ko! ⁵¹ Yi abhundja naayi me ma ago ngú na'o guo 'ngú píla doto? Ma apa pi yi me, a mo-o ade. Ma ago mangbo ngú nagbogbo bhusu okpála. ⁵² Nayie pi

† **12:46** 12:46 U aye bhú obhuku koko-o me: «U kókodho bhusu ani má mbi mbi mbi!»

mbia inde-e, piga bini na okpála bhuluvue agbó
bhṣṣṣ e, bata ayála bhisi, li bhisi yála bata.

⁵³ 'Dyi ndili ayála ndili na bhobhoko gba e-o,
li ndili-e yála 'dyi e.

'Hi ndili ayála ndili na øøø gba e-o,
li ndili-e yála 'hi e.

Ogbi na øøø ayála øø gba ndala e,
li øø gba ndili-e yála ogbi e. †»

*Yi mbila engú inde ngakodho 'kpí mbia inde-e
ko*

(Tsia bhú Mat. 16:2-3.)

⁵⁴ Yesu apa matá pí okpála me: «Yi u me ebha
ngago ne kati, yi kolo pá me: «Ebha inde-e adhi
madhi.» I tsia méne la bhadi lie moko. ⁵⁵ Yi dje
anvi me a nde ngayie li pápá na yoyoko, yi pá
me: «Ekpí-e akpá naali.» I tsia méne la bhadi lie
moko. ⁵⁶ Ngayi obhulú kali inde-e! Yi mbila engú
inde ngakodho 'kpí abhúlá ne bhende píla doto-
o hana. La ka ni, yi kúnda nambila engú inde
ngakodho 'kpí li nedhinga inde-e lie de-e?»

*Yi dje liyi ne kpála inde yi nde ne e bhú 'ngú
ko*

(Tsia bhú Mat. 5:25-26.)

⁵⁷ «Ka ni, ngayi makpe, yi mbila nakodho 'ngú
na ngbingbili inde ayo namene e lie de-e? ⁵⁸ I
du me yi nde bhú 'ngú ne kilí mu-o, ani du anú
ne mu bhú djila okpála nakodho 'ngú-o, mu de
mene ne kpéke me yi dje liyi ne ani li kpadji.
Mu ngakpe bhomu-o me, ani anú ne mu pí kpála
nakodho 'ngú-o de. Li kpála nakodho 'ngú-o há

† 12:53 12:53 Tsia bhú Mik. 7:6.

m̄ pi osudha de. Li osudha-a tsia bhíke m̄ bhú tikp̄ de. ⁵⁹ Ma apa pi m̄ me, m̄ kóto bha oo me, m̄ nde agie nd̄ bopulu gba m̄-o hana má kpek̄bh̄!»

13

Ebhe nga'i okpála me u dji bua o

¹ Abhom̄-o li nedhinga ango-o, okpála koko ago akpokpo pi Yesu me: «Pilat̄ abhili okpála koko na Galilaya me u nde ngatsulu en̄ pi Ebhe.» ² An̄ agie pi uo me: «Yi abhundja naayi me, i d̄ me Pilat̄ nde abhili uo mo-o, a akunda napa me u ad̄ sisiti ane nd̄ okpála koko na Galilaya hana? ³ Ma apa pi yi me, a mo-o ade. Engú bini, i d̄ me yi nde dji bua yi de-e, nd̄ yi hana, yi amú bhadi maka uo. ⁴ Yi bhundja okpála ndjikpa ne ká madjina nani li 'ndjá 't̄i na Silue abhili o-o. Yi abhundja naayi me u ad̄ nani sisiti ane nd̄ okpála koko na Yelusalema hana? ⁵ Ma apa pi yi me, a mo-o ade. Engú bini, i d̄ me yi nde dji bua yi de-e, nd̄ yi hana, yi amú bhadi maka uo.»

Ndula na figi inde i li líl̄ de

⁶ Pipita-a, Yesu atsia apa gbitaku inde-e pi uo me: «Kpála bini alu nani ndula na figi bhú edyi gba e na vino. Ekpí bini, an̄ ago nagili líl̄ bhúbhú. La-a, an̄ u belegu de bini. ⁷ Abhom̄-o, an̄ atsia apa pi kpála na kulu gba e me: <Tsitsia nga, a ko mbia inde-e kalanga bata, ma ngago agili líl̄ bhú ndula inde. La-a, ma u belegu de bini. Dede! A nganḡi bili padhá ka ni?> ⁸ Engú

bini, kpála na kulu-o agie pi ani me: <Ngámá, 'o nga matá ndula ango-o li kalanga inde, amba ma dji doto bhú lili ngbalina, ma tuko doto na eká bhúbhú. ⁹ Koko bhú kalanga na sidi-e, i lí lílí. I du la me a nde li lílí de-e, mu tsia dé.>>

Yesu akobho ɔlɔ bini na kuo bhú 'kpí naguo gba omaYuda

¹⁰ Li 'kpí bini naguo gba omaYuda-a , Yesu adu asuno bhú 'ti nadjɛ lílí gba Moidje-o . ¹¹ A abhaka me ɔlɔ bini na kuo nde oo. Sunda kalanga ndjikpa ne ká madjina, siti bua adu bhú ani. Siti bua ango-o atsia adu anu 'ngbu ani. Kaka-a, ani ale nani nali lie pima. ¹² Li Yesu au ɔlɔ ango-o lie, ani a'i ani. Ani atsia apa pi ani me: «'Hi ma, kuo gba mu-o ayie.» ¹³ Ani abu 'kpa e pí ani, kolo má gala me-e, ani ali lie má ngbu! Ani atsia aholo nadhɔgɔ Ebhe.

¹⁴ Engú bini, ngámá na eti nadjɛ lílí-e ake 'ngú lie naali, ka li Yesu akobho kpála lie bhú 'kpí naguo-o. Do ani pi okpála inde adu oo me: «A ne 'kpí madhia ngú namene kulu. Yi go li okpí bhomu-o, ngubula me u kobho yi ne okuo gba yi ko. Engú bini, yi agó bhú 'kpí naguo de!»

¹⁵ Abhomu-o, Ngámá Yesu atsia agie pi ani me: «Yi ne obhulu kali! Li 'kpí naguo-o, yi bhuhulu bagala di ne punda gba yi-e bhú 'ti o, ngú nanu ne uo me u ndji 'ngu di? ¹⁶ ɔlɔ inde-e, ani bhú piga gba Abalahama. Satana agbite ani kalanga ndjikpa ne ká madjina. A ayo de me u bhulu ani li 'kpí naguo di?» ¹⁷ Li Yesu agie pi uo lie mo-o, ndu obhulu yala gba ani-e hana atsia asia numu.

Engú bini, ndu okpála hana adu akpi djali ka ndu obabadha kulu hana inde ani adu amene e ko.

Gbitaku pindji lí ndula u a'i e me mutadi

(Tsia bhú Mat. 13:31-32; di ne bhú Mlk. 4:30-32.)

¹⁸ Abhomu-o, Yesu atsia apa me: «Nau gba Ebhe-e , a maka ni? Ma ti da napapana li ni?

¹⁹ A maka lí ndula na mutadi. Kpála bini aha, ani alu bhú 'dyi gba e-o. A akø, a akolo 'ngbé ndula. Odhu atsia ayiki 'ti o bhú oyáyá ko.»

Gbitaku pindji levile

(Tsia bhú Mat. 13:33.)

²⁰ Do Yesu matá me: «Ma ti da napana Nau gba Ebhe-e li ni? ²¹ A maka levile inde li ølø bini aha e. Ani atsia akpødhølø ne bhiti faline akólo li nedhinga li faline hana afúka lie ko.»

Yi li li bhoti na yeye

(Tsia bhú Mat. 7:13-14, 21-23.)

²² Yesu aholo 'nú bhú Yelusalema. Li ani adu anu lie oo, ani adu apu bhú ogudhu ne bhú okuti me ani nde ngasuno Bádha Ngali pi okpála.

²³ Kpála bini ayi ani me: «Ngámá, Ebhe akóbho bha okpála masudha?» Abhomu-o, Yesu atsia agie pi uo me: ²⁴ «Yi mene ne kpéke me yi li li bhoti na yeye-o. Padhá de, anga ma apa pi yi me, okpála bhelé agli me ni li, engu la bini u alé pima.

²⁵ A maka me li nedhinga li bhulu 'ti-e ayie bhulá lie, ani ní bhoti-o. Pipita-a, yi dúlu akilidjo. Yi hólo nabhi bhoti-e me yi nde ngapa me: <Ngámá, 'u bhoti-e pi ya.> Ani tsia gie pi yi me:

«Ma mbila bili li yi ayie lie de!» ²⁶ Abhomu-o, yi tsia pá pi ani me: «Ní azu nani 'he, ní andji di pandi ne yi bhú dabili bini. Mo otsia asuno li okpadji gba ya-o.» ²⁷ Ani tsia gíe pi yi me: «Ma mbila bili li yi ayie lie de. Ngayi osisiti okpála, yi yie de ma oo ko!» ²⁸ Nedhinga yi aú Abalahama, Isaka, Yakobho di ne ndu opolofeta hana lie bhú Nau gba Ebhe-e, li Ebhe tsia bála la naae yi akilidjo! Oo, yi adú aku 'gbá di ne nazu tate yi. ²⁹ Okpála ayie ne 'dje doto badha hana, u tsia gó bhú anokomia bhú Nau gba Ebhe ko. ³⁰ Abhomu-o, okpála koko inde asidi mbia inde-e, u akólo akalanu. Li obhe koko inde akalanu mbia inde-e, u tsia kólo asidi.»

*Yesu li kpadji na Yelusalema
(Tsia bhú Mat. 23:37-39.)*

³¹ Li nedhinga ango-o, omuFalisai koko ago apa pi Yesu me: «Yie si mayie, anga ngámá Elode ngakunda nabhele mu.» ³² Yesu atsia agie pi uo me: «Yi nu pa pi bhulu kali maka nekpè bhomu-o me: «Ma ngapandja osisiti bua bhú okpála. Ma di ngakobho okpála na kuo naki di ne mambi. Ma tsia ndjia kulu gba ma-a bhú 'kpí na bata.» ³³ Engú bini, a ayo me ma kpata kpadji gba ma-a, naki, mambi di ne ekpí na bata. Padhá de, anga a ayo de me, okpála bhèlè polofeta li bili koko de, bha bini abhú Yelusalema.

³⁴ Aa! Ngayi, okpála na Yelusalema-a, yi ngabhili opolofeta! Yi la di ngabhili ne teme okpála inde li Ebhe atima o agba yi-o! A ko bhutsibhutsi madho ma akunda napo bhúla yi maka li 'hi 'ngu apopo bhúla ongisi gba e lie sa

mbudha e-o. La-a, yi tsia kunda de! ³⁵ Mbia inde, kuti gba yi-e atigala padhá. Ma apa pi yi me, yi ú matá ma belegu de bini akólo li nedhinga inde yi apá lie me: «A ayo me Ebhe tuko bisagu pí kpála inde ngago ne 'li aní ko!†»»

14

Yesu akobho kpála na kuo li 'kpí naguo gba omaYuda

¹ A akolo ekpí bini, ekpí naguo gba omaYuda-a, Yesu anu nazu 'he agba saka ongámási gba omuFalisai-o. Okpála inde adu oo adu atsia Yesu ne kpéke djila. ² Abhomu-o, kpála bini inde li kute e asisika ne engu adu kala aní. ³ Yesu ayi omusuno na líli gba Moidje ne omuFalisai-e me: «Líli gba ní aziba nakobho kpála li 'kpí naguo? Ne me a ziba de.» ⁴ Engú bini, u andjili bha má bulu! Abhomu-o, Yesu aha 'kpa bhulu kuo-o, aní akobho aní. Aní atsia apa pi aní me aní gie lie agba e. ⁵ Pipita-a, aní pi uo me: «Belegu li 'kpí naguo-o, li saka ongisi gba yi na bhosi-bhosi-e,* i du di-e saka bagala gba yi-e ti bhú 'dú 'ngu-o, yi kolo gbé aní má gala! A mo-o adi?» ⁶ U mbila engú bini inde u agie e tété-e de.

Yi ko liyi ne kuto

⁷ Yesu au me okpála inde u a'i o-o ngadulu pí odabili na akalanu. Abhomu-o, aní atsia apa gbitaku inde-e pi ndu uo hana me: ⁸ «Li kpála

† 13:35 13:35 Tsia bhú Djlm. 22:5; di ne bhú Ets. 118:5.

* 14:5 14:5 Ongisi na obhosi-bhosi: Bhú obhuku koko-o u aye me «punda.»

bini 'i mụ bhú anokomia na kụva-a, mo onú adu pí dabili na akalanu de. Padhá de, anga mụ mbila de me, u a'i kpála koko inde ane mụ mane e-e de. ⁹ I du mo-o, li kpála inde a'i ndu yi bhisi hana gó pa pi mụ me: <'O ka dabili bhomu-o pi ani.> Abhomu-o, mụ nú ne nümü hana, mụ tsia dú asidi. ¹⁰ Engú bini, li kpála bini 'i mụ bhú anokomia-a, mụ de nu du pí dabili na asidi, amba li kpála inde a'i mụ agó lie, ani de pa pi mụ me: <Ndai ma, dyudyo limu ne akalanu.> Li ndu okpála bhende yi ngazu 'he ne o-o hana, tsia ú mụ me, mụ ne 'ngbé kpála. ¹¹ Padhá de, anga i du me kpála nde nga'o lie ne abhúlá-a, li Ebhe ké ani ne kuto. I du la me kpála nde nga'o lie ne kuto-o, li Ebhe 'é'e ani ne abhúlá.»

A ayo na'i da bhú anokomia gba mụ-o?

¹² Pipita-a, Yesu apa pi kpála inde a'i ani-e me: «Li mụ 'i okpála ngú nazu 'he tulukpe, i du di-e tagolo-o, mo o'í obi mụ de. Mo o'í ondaise mụ de. Mo o'í okpála na piga gba mụ-o de. Mo o'í la di okpála na tia inde asili kuti lingo mụ-o de. Padhá de, anga ngauo-o, u 'í di mụ li 'kpí koko, u tsia gíe ehe inde mo omene e pi uo-o pi mụ. ¹³ Engú bini, li mụ 'i okpála bhú anokomia-a, 'i obhulu ndibhili. 'I okpála na eze. 'I obhende ne eze li 'dhu o-o di ne obhende i u 'kpí de ko. ¹⁴ Mụ mene mo-o, mụ dú ne djali, anga u ti da nagie 'he bini pi mụ de. Ebhe agíe pi mụ li 'kpí li okpála na ngbingbili-e azúku lie ko.»

*Gbitaku pindji 'ngbé anokomia
(Tsia bhú Mat. 22:1-10.)*

15 U adje 'ngú bhomu-o lie, sùka okpála inde adu azu 'he bhú dabilì bini ne Yesu-o atsia apa pi ani me: «A ko djali pi kpála inde azú anokomia bhú Nau gba Ebhe-o !» 16 Do Yesu pi ani me: «Kpála bini amene 'ngbé anokomia. Ani atsia a'i okpála bhelé ngánga. 17 A akolo lie li nedhinga nazu 'he-e, ani atsia atima kpála na kulu gba e ngú napa pi okpála inde ani a'i o-o me: «Ezu-o abhu, yi gógo.» 18 Kpála ne kpála aholo ayo ka ani me ani mbu li ni. Bhe na kalanu-o apa pi ani me: «Ma akala edyi, a ayo me ma nu natsitsia. Ma ayo ka mu me mbu li ma.» 19 Koko apa pi ani me: «Ma akala obagala ndjikpa ngubula kulu na edyi. Ma adji nale uo. Ma ayo ka mu me mbu li ma.» 20 Koko atsia apa matá me: «Ma aha ele mbia inde. Kaka-a, ma ti dá nanu-u de.»

21 Kpála na kulu-o agie lie agba ngámá gba e-o. Ani atsia akpokpo 'ngú bhomu-o pi ani. Abhomu-o, ngámá-a aholo ake 'ngú lie. Ani atsia apa pi kpála na kulu gba e me: «Nu má gala bhú odaposo, di ne li okpadji. 'I obhulu ndibhili. 'I okpála na eze. 'I obhende i u 'kpí de, di ne obhende ne eze li 'dhu o-o.» 22 Pita nedhinga masudha-a, kpála na kulu ago, ani atsia apa me: «Ngámá, ma amene líli gba mu-o amene. Engú bini, dabilì nga bha uu.» 23 Abhomu-o, ngámá atsia apa pi kpála na kulu gba e me: «Nu li okpadji 'dyi, lingo oaga na edyi, mba okpála ne kpéke, amba eti gba ma-a bedhe bedhe. 24 Padhá de, anga ma apa pi yi me, okpála inde ma a'i o kalanu-o, sùka uo bini zú anokomia gba ma-a de!»

*Yi 'o ka ndu 'he hana ngu nakpata Yesu
(Tsia bhu Mat. 10:37-38.)*

²⁵ Ekpí koko-o, li okpála bhelé adu adhuku lie bhú dabili bini ne Yesu-o, ani adji bhúla e li pápá gba uo-o, ani atsia apa pi uo me: ²⁶ «Kpála inde akunda akpata ma-a, a ayo me ani yala 'dyi e ne 'hi e. Ani yala wala e ne ongisi gba e-o. Ani yala ondaise e na obhosibhosi, di ne obhende na olisilisi, amba ani yala belegu mukobho gba e makpe ko. I du mo-o de-e, ani ti da nadu mukpata gba ma-a de. ²⁷ Kpála inde i kunda nabi kulusi gba e de-e, inde i kpata ma de-e, ani ti da nadu mukpata gba ma-a de.

²⁸ I du me suka yi nde akunda nayiki 'ngbé 'ti-e, ani dú ngaiza kuto. Ani tsia hólo nabhundja ngu nambila me tia ka ni bhelé ngu nandjia kulu ango-o. ²⁹ I du mo-o de-e, ani 'o 'dhu 'ti-e, pipita ani tsia ndjia eti-e de-e, ndu okpála hana inde aú-o, u hólo namu ani. ³⁰ U tsia dú apa me: <Yi tsia nga kpála inde, ani akpo nako lita nayiki eti. Engú bini, ani ndjia de!> ³¹ A bhadi moko, i du me 'ngbé ngámá bini nde akunda nagu 'gú ne 'ngbé ngámá koko, ani dú ngaiza kuto. Ani holo nabhundja ngu nambila me, ne okpála kutu ndjikpa-a, ni ti da nagu 'gú ne 'ngbé ngámá inde ka e ne okpála kutu ndjikpa bhisi-o. ³² I du mo-o de-e, ani tíma obhulu titima pi 'ngbé ngámá ango-o nedhinga ani nde nga bha lie tsutsu-o. Ani tsia yí ani me: <A ayo namene pi ngubula me egú adú-u de-e?>» ³³ Abhomu-o, Yesu atsia apa matá me: «Suka yi bini ti da nadu mukpata gba ma-a de, i du me ani nde 'o ka ndu 'he gba

e hana de ko.»

Ngutu inde akolo padhá

(Tsia bhú Mat. 5:13; di ne bhú Mlk. 9:50.)

³⁴ «Ngutu ne bádha 'he. Engú bini, i du me kpokpo nde andjia bhúbhú andjia, u tí da nagie matá kpokpo bhúbhú ne ni? ³⁵ A belegu ndjindji ade ngú doto di ne ngú nalu 'zu. U bála bha ibili akilidjo. Kpála inde ne 'dje 'dje ngú nadje 'kpí-e, ani djedje!»

15

Gbitaku gba kandөлө inde angita, u atsia au matá e

(Tsia bhú Mat. 18:12-14.)

¹ Ekpí bini, ondombi na mandjandja di ne okpála na sisiti ago ndu o hana de Yesu ngú nadje ani. ² Omufalisai ne omusuno na líli gba Moidje adu adi ani. U adu apa me: «Kpála inde-e ngasia okpála na sisiti. Ani la di ngazu 'he ne uo bhú dabili bini!»

³ Abhomu-o, Yesu atsia apa gbitaku inde-e pi uo me: ⁴ «Kpála bini bhú ká yi ne okandөлө kámá bini. Li saka uo bini ngita-a, ani mene pi? A na paká me, ani 'ó ká obhende ndjikpa odukpabini ne ká odukpabini-e li bili nazu 'he ka o-o. Ani tsia nú nagili bhende angita-a, akólo li nedhinga inde ani aú ani lie-e ko. ⁵ Li ani au ani lie, ani bédhe ne djali bedhe. Ani há kandөлө-o, ani 'ó ani pí de-ngulu e. ⁶ Ani gie lie agba e. Pipita-a, ani 'í obi e ne okpála inde asili kuti de ani-o. Ani tsia pá pi uo me: <Yi kpi djali bhú dabili bini ne ma, anga ma au kandөлө gba ma inde angita

nako au!»» ⁷ Yesu atsia apa matá me: «Djali adú bhadi moko abhúlá ngúbula kpála bini na sisiti inde adji bua e. Djali ango-o ané bhende u nde ne e ngúbula okpála na ngbingbili ndjikpa odukpabini ne ká odukpabini, inde ngabhundja me o ne gũmũ nadji bua o ade ko.»

Gbitaku pindji lí falanga inde angita, u atsia au matá e

⁸ «Matá di-e, i dũ me ɔlɔ bini nde ne lí falanga* ndjikpa, lí sũsũka bini ngíta-a, aní méne pí? A na paká me, aní dhédhe eke. Aní pó bìli abhú 'tí. Aní gílí má bhotobhoto, akólo lí nedhinga inde aní aú lie-e ko! ⁹ Lí aní au lie, aní 'í obi e di ne okpála inde asílí kùtí de aní-o. Aní tsia pá pí uo me: <Yi kpi djali bhú dabilí bini ne ma, anga ma au lí falanga inde angita nako ka ma-a au!»»

¹⁰ Yesu atsia apa matá me: «Oandjelu gba Ebhe-e akpí bhadi djali moko ngúbula koli kpála na sisiti bini inde adji bua e ko.»

Gbitaku gba ndilí inde angita, u atsia au matá e

¹¹ Yesu atsia apa matá me: «Bhoko bini adũ nani ne ongisi na obhosibhosi bhisi. ¹² Bhende na ndimindimi-e apa pí 'dyí e me: <'Dyí ma, ha naama tia na libhondi-e mũma haha.> Abhomũ-o, 'dyí uo atsia agapa tia gba e lí uo. ¹³ Pita 'kpí bedí, ndilí na ndimindimi-e abha tia gba e, aní atapa ne di bhú kùtí bini tsutsu. Oo, aní andjia

* **15:8** 15:8 Agba omaYuda-a, lí falanga bini (denaliusi) nani ne makalá pí kpála na kulu ngúbula ekpí bini.

tia gba e hana má kpøkøbho li ndu 'ngú na padhá padhá!

14 Li aní andjia tia gba e lie hana-a, adyíndi na ngbéngbé atsia alí bhú ndu doto ango-o. Abhomu-o, aní aholo adje gumu. 15 Aní anu alí bhú kulu pí saka kpála na ndu doto bhomu-o. Kpála ango-o aha aní, aní atsia atima aní abhú 'dyi gba e me aní du nalila opame. 16 Aní adu akunda nazu ezu gba opame-o. La-a, kpála bini ha nani ehe nazu mazú pí aní de.

17 Abhomu-o, aní aholo abhundja. Pipita-a, aní atsia apa lí bua e me: <Ndu okpála na kulu gba 'dyi ma-a hana, ezú ka uo bhibhiti naali. Ngama la ei-e, ma ngakpi ne gumu! 18 Ma agié lima agba 'dyi ma, ma tsia pá pí aní me: 'Dyi ma, ma amene siti 'ngú kala Ebhe di ne lí pápá gba mu. 19 A ayo matá na'i ma me ndili ka mu de. Ha bha ibili ma maka saka okpála na kulu gba mu ko.>

20 Aní atsia aholo agie lie agba 'dyi e. Lí nedhinga inde aní adu nga bha lie de kuti-e tsutsu-o, 'dyi aní au aní. Aní au aní lie, aní adje ndjinga aní naali. Aní anu ne holo, aní atí lí ngulu aní, aní atsia akama aní lí kute e.

21 Abhomu-o, ndili-e atsia apa pí aní me: <'Dyi ma, ma amene siti 'ngú kala Ebhe di ne lí pápá gba mu. A ayo matá na'i ma me ndili ka mu de.>

22 U akolo lie akuti-e, do 'dyi aní pí okpála na kulu gba e me: <Yaka! Yi go ne yambu bhende ane ne bádha, yi dyi lí aní. Yi to kati bhú 'kpa aní, amba yi to maløke bhú 'dhu aní. 23 Pipita-a, yi nu bhølo folo bagala na tsikpa-o. Ní zu 'he, amba ní kpi djali. 24 Padhá de, anga ndili gba

ma inde adu nako mugito me ani akpi-e, ani agie matá lie bhú mukobho. Ani adu nako me ani nde angita, ma atsia au matá ani.> Abhomu-o, u atsia aholo nakpi djali.

²⁵ Li nedhinga bhomu-o, ndili bhende na gigina adu abhiye. Nedhinga ani adu agie lie lie akuti-e, ani akolo lie de eti-e masakpe-e, ani adje tolo 'tsi ne ebi. ²⁶ Ani a'i suka okpála na kulu-o. Ani atsia ayi ani li engú inde adu akodho 'kpi-o. ²⁷ Kpála na kulu ango-o agie pi ani me: <Ndai mu agie lie agie. 'Dyi mu atsia abhølo folo bagala na tsikpa-o, anga ani au me, ani agie lie ne kute na angu.> ²⁸ Abhomu-o, ndili na gigina-a aholo nake 'ngú lie. Ani ayala nali abhú 'ti-o. 'Dyi ani akoto, ani atsia alopolo lie pi ani me ani lili. ²⁹ Engú bini, ndili-e agie pi 'dyi e me: <Djedje nga, a ko kalanga bhelé ma ngamene kulu pi mu maka bali. Ma ndjo suka líli gba mu-o 'kpi bini de. Mu ha nga la belegu ndili meeme mama bini de me, ya mene anokomia ne obi ma-a ne di. ³⁰ Li ndili gba mu inde andjia tia gba mu-o hana ne olisi na zabhe-e ago lie, mo otsia abhølo folo bagala na tsikpa-a pi ani!>

³¹ 'Dyi ani atsia apa pi ani me: <Ndika ma, ndu 'kpi hana, ní ne mu bhú dabili bini. Ndu 'he inde gba ma-a hana, a ko naamu. ³² Engú bini, a ayo bha igini me ní mene anokomia amba ní kpi djali. Padhá de, anga ndai mu inde adu nako mugito me ani akpi-e, ani agie matá lie bhú mukobho. Ani adu nako me ani nde angita, ma atsia au matá ani!>>

16

Kpála na kulu na kali

¹ Pipita-a, Yesu atsia apa matá pi omukpata gba e me: «Bhulɔ tia bini adɔ ne kpála na kulu gba e. Kpála ango-o adɔ atsia 'kpí li ohe gba ani-o. Okpála koko ago apa pi ani me, kpála na kulu ango-o ngarɔɔɔ tia gba ani-o. ² Abhomɔ-o, ani a'i kpála na kulu-o. Ani atsia apa pi ani me: <Ma ngadje pɔndji mɔ e mangua 'ngú dho? Suno obhuku na ndɔ tia gba ma-a hana mɔma, anga mɔ tí da matá natsia 'kpí li ohe gba ma-a de.> ³ Abhomɔ-o, kpála na kulu ango-o aholo ayi bua e me: <Ma améne si pi? Padhá de, anga ngámá gba ma adji a'é ma bhú kulu. Angu ka ma ngú nade edyi ade. A la di li ma ne nɔmɔ ngú nadɔ ne yoyo 'he. ⁴ Aa! Ma ambila engú inde ma améne e ambila, ngɔbula me okpála sia ma ndjɔndji li nedhinga u a'é ma lie bhú kulu ko!»

⁵ Abhomɔ-o, ani a'i okpála bini ne bini inde adɔ ne bopulu gba ngámá gba ani-o. Ani ayi bhende na kalanɔ-o me: <Bopulu gba ngámá gba ma-a ka mɔ madho?> ⁶ Ani agie pi ani me: <Ngbɔngɔlɔ na emɔ kámá bini.> Kpála na kulu-o pi ani me: <Ha 'kpa balɔa na bopulu gba mɔ-o. Dɔ kuto má gala, amba mɔ dji me ndjikpa bhuluvue.> ⁷ Pipita-a, ani ayi koko me: <A la mɔ-o, bopulu gba mɔ-o madho?> Ani agie me: <Kíli mapunga kámá bini.> Kpála na kulu-o pi ani me: <Ha 'kpa balɔa na bopulu gba mɔ-o, amba mɔ dji me ndjikpa madjina.> ⁸ Ngámá gba kpála na kulu na kali ango-o adhogɔ ani, anga ani amene

ehe maka kpála inde ngau 'kpí tsutsu. Okpála na doto inde-e ne imbilangu na kali gba o-o, u ambila namene ehe sùnda o ane ongisi gba Ebhe.

⁹ Ngama-a, ma apa pì yi me, yi gili nadu bhú makpolia ne obi yi ne tia na kali na doto inde, amba li tia neke ka yi-e, u de sia yi bhú kuti na dudu. ¹⁰ Kpála bhende ngbingbili bhú ohe na djedjedje-e, ani bhadi ngbingbili bhú ohe na ngbengbengbe. Kpála bhende ngbingbili bhú ohe na djedjedje-e ade, ani di ngbingbili bhú ohe na ngbengbengbe ade. ¹¹ I du me yi nde mene ndjindji ne tia na kali na doto inde-e de-e, Ebhe tí da naha kukulù tia pì yi de. ¹² I du me yi nde mene ehe ngbingbili ne tia gba kpála koko de-e, a há tia gba yi-e pì yi da?

¹³ Kpála bini tí da namene kulu pì ongámási bhisi de. Ani yála bini, ani tsia kúnda koko. Ani méne kulu pì koko ndjindji, ani tsia ú koko bhú djila e padhá. Yi tí da namene kulu pì Ebhe bhú dabilì bini ne namene pì tia de.»

Yesu asuno pindji 'ngú ngangá

(Tsia bhú Mat. 11:12-13, 5:31-32; di ne bhú Mlk. 10:11-12.)

¹⁴ Omufalisai adje ndu 'ngú bhomu-o hana. Abhomu-o, u atsia adu amu Yesu, anga u adu nani akúnda tia naali. ¹⁵ Yesu atsia apa pì uo me: «Yi ngamene ehe bhú djila okpála mugoito me yi ngbingbili. Engú bini, Ebhe mbila bua yi hana, anga ehe li okpála ngau e bhú djila o ngbéngbé-e, Ebhe ngauu bhú djila e padhá.

¹⁶ Nakolo li nedhinga gba Djaa bhulu nabatisa okpála-a, u akpokpo 'li Ebhe pì okpála bhú líli

gba Moidje di ne bhú obhuku gba opolofeta . Nayie li nedhinga bhomu-o, u akpokpo Bádha NgaliNau gba Ebhe-e pi okpála. Kpála ne kpála ngagili ne kpéke me ni li bhú kuti na mundayi-o .
¹⁷ A ko mboye 'ngú masudha me ekpí di ne doto kodho 'kpí. A ko la kpéke da 'ngú me okpála 'e mboye ku eli bini bhú ká líli gba Moidje-o.

¹⁸ Li bhoko bini 'e wala e bhú kúva-a, ani ha elee koko-o, ani akúnda bhomu-o elee gba kpála koko. Li bhoko bini ha elee inde li 'ko e a'e e bhú kúva-a, ani akúnda di bhomu-o elee gba kpála koko.»

Gbitaku gba bhulu tia ne bhulu ndibhili

¹⁹ «A adu nani bhulu tia bini. Ani adu adyi babadha bongo na tia naali. Ndu 'kpí hana, ani adu nadu ndjindji. Ani atsia adu di nazu 'he ndjindji. ²⁰ Bhulu ndibhili bini adu di nani oo. A adu 'li ani me Ladjalo. Eka atsotsolo nani kute ani hana. Ani adu asi kuto li bhoti gba bhulu tia-o. ²¹ Ani adu akúnda nazu okulu 'zu inde adu abala sa dabili nazu 'he gba bhulu tia-o. La di-e, obulu adu ago adhapa oeka gba ani-o. ²² Bhulu ndibhili-e akpi. Oandjelu aha ani, u atsia anu a'o ani ade Abalahama. Bhulu tia akpi di, u atsia azi ani.

²³ Oo, li bili gba okpála inde amu-o, ani adu adje likabhu naali. Ani atsia 'kpí ne abhulá, ani au Abalahama tsutsu ne Ladjalo de e. ²⁴ Abhomu-o, ani aholo natobhila me: <'Dyi ma Abalahama, dje nga bha mbo ndjinga ma! Tima Ladjalo me ani to ndji-likpa e bhú 'ngu, amba ani go ne di tunu pí 'mi ma, anga ma ngadje likabhu bhú djua inde-e naali.> ²⁵ Abalahama agie pi ani

me: <Ndika ma, bhundja me mo osia nani tia bhelé li nedhinga mo odu lie bhú mukobho pila doto-o. La-a, Ladjalo atsia asia nani naae likabhu naali. Mbia inde-e, ani ngasia bádha 'ngú, ma la naamu ngasia likabhu. ²⁶ Matá-a, a sunda ní ne tsú 'dú, ngubula me li kpála kunda nayie gba ya ei akodho 'kpí ne agba yi oo, ani de le pima! Li kpála kunda nayie gba yi oo akodho 'kpí ne agba ya ei-e, ani de le di pima!>

²⁷ Do bhulu tia me: <'Dyi ma, kikiliako, ma ayo nga bha-a ka ma me, tima Ladjalo agba 'dyi ma, ²⁸ anga ondaise ma na obhosibhosi bhuluvue oo. A ayo me, ani nu nagbele 'dje uo, amba ngauo di-e, u agó li bili na likabhu inde-e de.>

²⁹ Abalahama agie me: <U mbila líli gba Moidje di ne obhuku gba opolofeta-a hana. A ayo me u dje uo.> ³⁰ Bhulu tia atsia apa me: <'Dyi ma Abalahama, a mo-o ade. Engú bini, i du me saka okpála inde amu-o nde azuku-o, ani nu pa pi uo-o, u dji bua o.> ³¹ Abalahama pi ani me: <I du me u nde dje engú inde bhú líli gba Moidje di ne bhú obhuku gba opolofeta de-e, belegu i du me saka okpála inde amu-o nde azuku-o, u djé di ani de.>>

17

Yi mbu li siti 'ngú gba okpála koko

(Tsia bhú Mat. 18:6-7, 21-22; di ne bhú Mlk. 9:42.)

¹ Pipita-a, Yesu apa pi omukpata gba e me: «Engú inde ngato okpála bhú siti 'ngú-o néke de. Engú la bini, a ko likabhu pi kpála inde i

ngato engú angó-o ko! ² I dú me kpála bini nde ngato ongisi bhú siti 'ngú-o, a pi ani ndjindji me u gbite ngingi tangulu ani, amba u bhike ani bhú 'ngbé 'ngu. Bhobhomu-o pi ani ndjindji naali ane me suka okpála na bhuhuku-o ti ka ani bhú siti 'ngú. ³ 'E-e! Yi lila liyi ndjindji!

I dú me ndai mu nde amene siti 'ngú-o, mu de suno pi ani. I dú me ani nde apa me ni amene sisiti-e, mu de mbu li ani. ⁴ I dú me ani nde amene mu sisiti bhutsibhutsi mananika li 'kpí bini-e, ani go bhutsibhutsi mananika hana, ani pa pi mu me: <Ma amene mu sisiti, mbu li ma.> Mu de mbu li ani.»

Nabhuka na kpekpeke

⁵ Obhulu titima apa pi Ngámá Yesu me: «Mene me nabhuka gba ya-a kolo matá kpekpeke.»

⁶ Abhomu-o, Ngámá Yesu atsia agie me: «I dú me nabhuka gba yi-e dú maka lí ndula na mutadi-e, yi de tí da napa pi ndula inde-e me: <Yie si, amba mu nu lu limu abhú 'ngbé 'ngu.> I tsia méne bhadi moko.»

Kulu inde a ayo me kpála na kulu mene e ko

⁷ «Li kpála bini bhú ká yi dú ne kpála na kulu gba e bini-e, i dú me kpála na kulu angó-o nde ngamene kulu abhiye, ani dú di-e ngalila onu-o, ani gie lie akuti-e, ani tsia pá pi kpála na kulu ago-o me: <Go má gala ngú nazu 'he?> ⁸ A mo-o ade. Ani pá mangbo pi ani me: <Lu ezú, mu yipa bongo-o ngú naha ezú-o mu ma akólo li nedhinga ma andjia nazu 'he lie di ne nandji 'he bhende nandji mandji lie ko. Pipita-a, mu tsia zu 'he

amba mu ndji di 'he bhe gba mu-o.> ⁹ Anì ti da nagie heni pi kpála na kulu-o, anga anì amene líli gba anì-e uu? Belegu de bini. ¹⁰ A bhadi pi yi moko. Nedhinga yi amene ndu 'ngú inde u apa e pi yi e lie hana-a, yi de pa me: <Ya bha naaya ne okpála na kulu. Ya amene bha kulu inde a ayo igini me ya mene e ko.>>

Yesu akobho okpála na kába ndjikpa

¹¹ Li Yesu adu anu lie abhú Yelusalema-a, anì apu sunda ndu doto na Samalia ne bhe na Galilaya. ¹² Anì alì lie bhú kuti bini me-e, obhosi na kába ndjikpa ago akè lio ne anì. U alulu mbo de anì tsutsu. ¹³ U atsia aholo atobhila me: «Ngámá Yesu, dje nga bha-a mbo ndjinga ya!» ¹⁴ Yesu au uo lie, anì atsia apa pi uo me: «Yi nu suno liyi pi odimandè gba Ebhe-o .» Nedhinga u adu anu lie, u atsia akobho. ¹⁵ Li sùka uo bini au lie me ni akobho-o, anì atsia agie lie sidi me anì nde ngadhègè Ebhe ne angu hana. ¹⁶ Anì ati bhú li 'dhu Yesu. Anì atu bhúla e ne kuto. Anì atsia agie heni pi Yesu. Bhoko ang-o adu nani kpála na Samalia. ¹⁷ Abhomu-o, Yesu atsia ayi me: «Ndu okpála ndjikpa hana akobho adi? Obhende odukpabini-e la su? ¹⁸ Kpála bini bhundja nago nagie heni pi Ebhe de, bha bini kpála inde naae ne maYuda ade inde-e?» ¹⁹ Pipita-a, Yesu atsia apa pi anì me: «Yie bhúlá, nunu. Mo okobho, anga mo obhuka ma.»

Nedhinga li Ebhe agó nau lie píla doto

(Tsia bhú Mat. 24:23-28, 37-41.)

²⁰ Omufalisai ayi Yesu me: «Nau gba Ebhe-e agó nadho?» Anì atsia agie pi uo me: «Nau gba

Ebhe-e gó ngua bhende de me okpála nde ngauu mau-o de. ²¹ U pá de me: <Yi tsitsia, a sii!> ne me <A aoo!> padhá de, anga yi mbila me Naa gba Ebhe-e bhú ka yi.»

²² Pipita-a, ani atsia apa pi omukpata-a me: «Nedhinga koko akólo makolo. Yi akúnda me yi u nga bha mbo ma, Ndili gba kpála, 'kpí bini. Engú bini, yi ú la ma de. ²³ U apá pi yi me: <Ani aoo!> di ne me: <Ani sii!> engú bini, yi agú holo oo de. ²⁴ Ekpí li ngama, Ndili gba kpála, ma agó lie, a adú maka mɔgbálá, li zì e ngayie li 'dje kokpí, li pápá bini akólo li pápá koko. ²⁵ Engú bini, a ayo me ma dje ngaiza likabhu naali, amba okpála na naki yala di ma.

²⁶ Maka engú inde akodho 'kpí nani bhú 'kpí Naa-a, akódho bhadi 'kpí moko li 'kpí inde li ngama, Ndili gba kpála, ma agó lie ko. ²⁷ Padhá de, anga bhú 'kpí Naa, okpála adu azu 'he. U adu andji pandi. Obhosi ne olisi adu aha lio akolo li 'kpí li Naa ali bhú zabu lie ko. Ebha adhi, engu asi píla doto libhomu, a atsia abhili ndu uo hana. ²⁸ A adú maka bhú 'kpí gba Loto. Okpála adu azu 'he. U adu andji pandi. U adu akala 'he di ne natsindji 'he. U adu alu 'zu. U adu ayiki 'ti. ²⁹ Engú bini, ekpí li Loto akoto bhú Sodomu lie, djua di ne itimeli ayie abhúlá, abala pí uo maka ebha, atsia abhili ndu uo hana. ³⁰ A akódho bhadi 'kpí moko li 'kpí li ngama, Ndili gba kpála-a, ma súno angu gba ma-a lie pi okpála ko.

³¹ Li 'kpí ango-o, kpála bhende abháka e apí 'ngbu 'ti-e, a ayo de me ani li abhú 'ti ngú nabha ohe gba e de. A bhadi moko, kpála bhende

abháka e abhú 'dyi-e, a ayo de me ani gie lie akuti-e de. ³² Yi bhundja engú inde amene nani wala Loto-o.* ³³ Kpála bhende agíli nalila makobho gba e, ani kpí. Kpála bhende la abhíke makobho gba e, ani tsia kóbho. ³⁴ Ma apa pi yi me, sukpe ang-o, okpála bhisi adú pí mako bini, u ahá bini, u tsia 'ó ká koko. ³⁵ Olisi bhisi adú atu mapunga bhú dabili bini, u ahá bini, u tsia 'ó ká koko. [³⁶ Obhosi bhisi adú amene kulu bhú edyi bini, u ahá bini, u tsia 'ó ká koko. »] ³⁷ Omakpata ayi ani me: «Ngámá, engú ang-o akódho 'kpí ne su?» Ani atsia agie pi uo me: «Bili li kuo kpála adú lie, oagbagba apékèbhè bhadi bhúla o oo ko.»

18

Gbitaku gba siti kpála nakodho 'ngú ne òkè bini na òelè

¹ Pipita-a, Yesu apa gbitaku bini pi omakpata gba e ngú nasuno pi uo me, a ayo me u du nayo Ebhe ndu nedhinga hana, u andála de. ² Ani pi uo me: «Kpála nakodho 'ngú bini adu nani bhú gudhu bini. Ani du akpe Ebhe de. Ani atsia adu di au okpála bhú djila e padhá. ³ Bhú gudhu ang-o, òkè na òelè bini adu di oo. Ani adu ago apa pi ani me: <Leke engú sùnda ya ne kpála inde ya nde ne e bhú 'ngú ko.> ⁴ Ekpí bhelé, kpála nakodho 'ngú ang-o adu ayayala. Pipita-a, ani atsia apa li bua e me: <Ma ngakpe Ebhe ade. Ma la di ngau okpála bhú djila ma padhá. ⁵ Engú

* **17:32** 17:32 Wala Loto akolo nani teme na ngutu anga ani agamu nani líli gba Ebhe. Tsia bhú Dje. 19:26.

bini, økø inde ngandala ma naali. A ayo me ma leke engú gba ani-o, anga i dũ mo-o de-e, ani dũ bha ago naba 'ndji ma.»»

⁶ Ngámá Yesu atsia apa matá me: «Yi dje engú inde li siti bhulũ nakodho 'ngú bhomu-o apa e ndjindji! ⁷ Ebhe méne bádha 'ngú pi okpála inde ani alo o-o di? I dũ me u nde ngaku 'gba pi ani sukpe ne ngbikpi-e? Ani djéke ngengele ngú nateteke uo? ⁸ Ma apa pi yi me, ani aléke 'ngú gba uo-o má gala! La-a, li nedhinga li ngama, Ndili gba kpála, ma agó lie, ma abháka me okpála nde abhuka Ebhe píla doto uu?»

Gbitaku gba mũFalisai , ne ndombi na mandjandja

⁹ Okpála koko adũ au lio me o naao ngbingbili. U atsia adũ au ndũ okpála koko hana bhú djila o padhá. Abhomu-o, Yesu atsia apa gbitaku inde-e li 'ngú gba uo-o me: ¹⁰ «Ekpí bini, okpála bhisi anũ bhú 'ngbé 'ti Ebhe gba omaYuda ngú nayo Ebhe. Bhe bini adũ mũFalisai , bhe koko adũ ndombi na mandjandja. ¹¹ MũFalisai-e ayie bhúlá, ani atsia ayo Ebhe a li bua e me: <Oo, Ebhe! Ma ngagie heni pi mũ, anga ma maka okpála koko ade. U ngazi 'he. U ngamene sisiti 'ngú. U ngakũnda olisi, i dũ di-e obhosi gba okpála koko. Ma di ngagie heni pi mũ, anga ma maka ndombi na mandjandja inde-e ade. ¹² Ma tsetse ezũ 'kpí bhisi sũnda poso bini ngú nayo mũ. Ma haha bini bhú ká ndjikpa pí ndũ 'he ma ngasia e hana.>

¹³ Ndombi na mandjandja alu naae mbo tsutsu, ani akpe belegu natsia 'kpi ne abhula. Engu bini, ani atu bhula e ne kuto, ani abu 'kpa e pi 'ka e, ani atsia apa me: <Oo, Ebhe! Dje nga bha-a mbo ndjinga ma, ma naama ne siti kpala.>» ¹⁴ Do Yesu mata me: «Ma apa pi yi me, ndombi na mandjandja ango-o agie nani lie agba e me, Ebhe nde adje nayo gba ani-e adje. Engu bini, Ebhe dje bhende gba muFalisai-e de. Padha de, anga kpala bhende nga'o lie ne bhula-a, li Ebhe ko ani ne kuto. La-a, kpala bhende nga'o lie ne kuto-o, li Ebhe 'e'e ani ne bhula.»

Yesu asia ongisi na ndjendje

¹⁵ Okpala adu ago di pi ani ne ongisi na ndjendje ngubula me ani 'o 'kpa e pi 'ndji uo. Li omakpata au lie mo-o, u aholo nayoko uo. ¹⁶ Engu bini, Yesu a'i uo, ani atsia apa me: «Yi 'o ongisi na djedjedje me u go bhaka ma! Yi ani kpadji pi uo de, anga Nau gba Ebhe-e , a pi okpala inde maka uo ko. ¹⁷ Ma apa pi yi na paká me, kpala inde i sia Nau gba Ebhe-e maka mboye ndili de-e, ani ti ne Nau gba Ebhe-e de.»

Bhulu tia ne uo ne Yesu

(Tsia bhú Mat. 19:16-30; di ne bhú Mlk. 10:17-31.)

¹⁸ Abhomu-o, ngama bini gba omaYuda ayi Yesu me: «Musuno, ngamu badha kpala, a ayo me ma amene pi ngubula nasia mukobho na duduma?» ¹⁹ Yesu atsia agie pi ani me: «Mu nga'i ma me badha kpala ka ni? Kpala bini babadha ade. Ebhe bha babadha ngae kpi e kpi. ²⁰ Mu

mbila olíli-e ndjindji: «Mo okúnda eḷe, i dɔ di-e bhoko gba kpála koko de. Mo obhéḷe kpála de. Mo ozi 'he de. Mo opá eu li kilí mɔ de. Manga 'dyi mɔ ne 'hi mɔ mamanga.†» ²¹ Ngámá ang-o atsia apa me: «Nayie bhú ndili li ma-a, ma amene ndɔ 'ngú bhomɔ-o hana.» ²² Pita li Yesu adje engú bhomɔ-o lie, ani atsia apa pi ani me: «Mo oneke matá koli ehe bini. Nɔnɔ, tsindji ndɔ 'he gba mɔ-o hana, amba mɔ gapa tiatia pi obhulɔ ndibhili. Mo osía tia abhulá. Pipita-a, mɔ go kpata ma.» ²³ Ani adje lie mo-o, ani asia likabhu naali, anga tia adɔ nani ka ani bhelé naali.

²⁴ Li Yesu au lie me ani asia likabhu mo-o, ani atsia apa me: «A bha ndjɔ kpekpeke pi obhulɔ tia ngú nali bhú Nɔ gba Ebhe-o! ²⁵ A kpekpeke pi eya ngɔbula nali li gudho mɔsana. A la matá kpekpeke ane pi bhulɔ tia ngɔbula nali bhú Nɔ gba Ebhe ko.»

²⁶ Abhomɔ-o, okpála inde adje engú inde ani apa e atsia ayi me: «I dɔ mo-o, a ti da nakobho da?» ²⁷ Yesu agie me: «Engú bhende i ti ne okpála de-e, a ati bha ne Ebhe.»

²⁸ Abhomɔ-o, Piele atsia apa me: «Tsitsia nga, ya a'o ká ndɔ 'he gba ya-a hana ngú nakpata mɔ.» ²⁹ Do Yesu pi uo me: «Ma apa pi yi na paká me, i dɔ me kpála bini nde a'o ká eti gba e, ani 'o ká wala e, ani 'o ká ondaise e, ani 'o ká okpála inde azu e, ani 'o ká ongisi gba e ngɔbula Nɔ gba Ebhe-e, ³⁰ ani sía 'he bhelé naali kuto ei.

† **18:20** 18:20 Tsia bhú Eki. 20:12-16; di ne bhú Det. 5:16-20.

Pipita-a, bhú nedhinga inde ngago-o, ani tsia sía di mukobho na duduama.»

Yesu akpo 'ngú bhútsibhútsi na bata pindji nakpi di ne nazuku ka e

(Tsia bhú Mat. 20:17-19; di ne bhú Mlk. 10:32-34.)

³¹ Pipita-a, Yesu aha okpála na titima ndjikpa ne ká bhisi-e, ani anu ne uo li ngongo, ani atsia apa pi uo me: «Yi djedje, ní adji mbia inde-e abhú Yelusalema. Oo, ndu 'ngú hana inde li opolofeta aye e pindji ma, Ndili gba kpála-a, adji amene lie. ³² Padhá de, anga u apú ma pi omupagano. Li okpála ang-o mú ma, u sóbho ma, u tsia kú di ngusu li kute ma. ³³ U abhí ma ne fimbo. Pipita-a, u tsia bhólø ma. La-a, bhú 'kpí na bata-a, ma tsia zúku.» ³⁴ Engú bini, omukpata mbila nani ta 'ngú ang-o de, anga a awo nani lie pi uo mawo. U tsia du ambila ta 'ngú li Yesu adu apa e de.

Yesu akobho kpála bini inde i u 'kpí de

(Tsia bhú Mat. 20:29-34; di ne bhú Mlk. 10:46-52.)

³⁵ Li Yesu akolo lie masikpe de Djeliko-o, kpála bini inde i u 'kpí de-e adu kuto dengo 'hi-kpadji. Ani adu ayo 'he. ³⁶ Ani adje tolo okpála akodho 'kpí lie, ani atsia ayi me: «A ko ni?» ³⁷ Okpála atsia agie pi ani me: «Yesu, kpála na kuti na Nadjaleta ngakodho 'kpí bhomu-o ngae.» ³⁸ Abhomu-o, ani atsia asula me: «Yesu, Ndili gba Davidi, dje nga bha-a mbo ndjinga ma!» ³⁹ Okpála inde adu akalanu-o aholo ambembe bhú 'ndji ani me: «Gbite 'bhø mu.» Engú bini, ani aholo asusula matá kpekpeke me: «Ndili

gba Davidi, dje nga bha-a mbo ndjinga ma!»
⁴⁰ Yesu aɓu, ani atsia aha lili me u go ne ani pi ni. Ani akolo lie de ani-e, Yesu atsia ayi ani me:
⁴¹ «Mo okunda me ma mene pi mu ni?» Ani agie me: «Ngamá, bhulu djila ma, amba ma u matá 'kpí.»
⁴² Yesu apa pi ani me: «U matá 'kpí uu! Mo okobho anga mo obhuka ma.»
⁴³ Kolo má gala me-e, ani aholo matá nau 'kpí. Ani atsia adu akpata Yesu me ani nde ngadhogö Ebhe. Ndu okpála hana inde au engú angoo, aholo di nadhogö Ebhe.

19

Yesu ali bhú 'ti gba Djakayo

¹ Pita li Yesu ali lie bhú Djeliko, ani atsia adu agulu gudhu-o. ² A abhaka me kpála bini nde oo, a adu 'li ani me Djakayo. A adu nani ngamá gba ondombi na mandjandja. Tia adu ka ani bhelé.
³ Ani adu agili nau me Yesu ngae dho. Engú bini, li okpála adu la lie bhelé-e, ani ale nau ani pima anga ani adu nani ndundu. ⁴ Abhomu-o, ani ayiki lie ne holo ne akalanu. Ani atsia a'u bhú ndula bini dengo 'hi-kpadji ngubula me ni u Yesu nedhinga inde ani apú lie oo ko.

⁵ Li Yesu akolo lie li bili bhomu-o, ani a'e djila e ne abhulá, ani atsia ani. Ani atsia apa pi ani me: «Djakayo, kə kuto má gala, anga a ayo me ma si naki bhú 'ti gba mu-o.» ⁶ Abhomu-o, Djakayo akə kuto bhú holo. Ani atsia asia Yesu ne djali hana. ⁷ Ndu okpála hana au lie mo-o, u aholo adi mutokono. U atsia adu apa me: «Lele pi li

kpála inde-e atapa lie nasi agba kpála na sisiti-e!» ⁸ Djakayo ayie bhúlá, do aní pí Yesu me: «Ngámá, djedje nga. Ma agbó bhusu tia gba ma-a bhisi. Ma ahá bhe bini-e pí obhulú ndibhili. I du me ma nde aha tia gba kpála bini ne kali-e, ma agié pí aní bhutsibhutsi badha.» ⁹ Abhomu-o, Yesu atsia apa pí aní me: «Naki-e, Ebhe akobho mu. Ngamu di-e, mu bhú piga gba Abalahama-o. ¹⁰ Padhá de, anga ngama, Ndili gba kpála-a, ma ago nagili di ne nakobho okpála inde angita ko.»

*Gbitaku gba okpála na kulu ndjikpa
(Tsia bhú Mat. 25:14-30.)*

¹¹ Yesu akolo de Yelusalema masakpe. Okpála inde adu adje ani-e adu abhundja naao me, Naú gba Ebhe-e asúno lie pí okpála mbia inde. ¹² Kaka-a, aní atsia apa gbitaku bini pí uo me: «Kpála bini na piga gba ngámá bini anu nani bhú doto bini tsutsu ngubula me u to palata na ngámá tangulu ni, amba pipita-a, ni gie lini. ¹³ Kala me aní nu-o, aní a'i okpála na kulu gba e ndjikpa-o. Aní agapa lí falanga* bini bini li ndu uo hana. Aní atsia apa pí uo me: <Yi mene kulu ne falanga inde, akólo li nedhinga inde ma agié lima lie ko.> ¹⁴ Okpála na doto gba ani-e adu ayala ani. U atima okpála nganda aní ngú napa me: <Ya kunda de me kpála bhomu-o u ngámá pí 'ndji ya-a de.>

¹⁵ La-a, u ato palata na ngámá tangulu ani. Aní atsia agie lie bhú doto gba e-o. Abhomu-o, aní

* **19:13** 19:13 Agba omaYuda-a, lí falanga bini (olo) nani ne makalá pí kpála na kulu ngubula epe bata.

a'ì okpála na kulu inde anì agapa nako falanga lio ngábula nambila bhende u asia e pépé-o. ¹⁶ Abhomu-o bhe na kalanu-o ago. Anì atsia apa me: <Ngámá, ma asia lí falanga ndjikpa pí bhende nako mo oha e muma ko.> ¹⁷ Abhomu-o, ngámá-a apa pí anì me: <A ndjindji. Mu ne bádha kpála na kulu, anga mo omene ndjindji bhú mboye ehe bedi. Ma a'ó ibili mu ngámá pí 'ndji ogudhu ndjikpa.> ¹⁸ Bhe na bhisi-e ago, anì atsia apa me: <Ngámá, ma asia lí falanga bhuluvue pí bhende nako mo oha e muma ko.> ¹⁹ Abhomu-o, ngámá-a apa di pí anì me: <Ngamu di-e, ma a'ó mu ngámá pí 'ndji ogudhu bhuluvue.>

²⁰ Pipita-a, koko ago, do anì de-e: <Ngámá, lí falanga gba mu-o ii. Ma awo nako bhú bongo . ²¹ Mu 'o li ma tsulu, anga mu ne kpála inde ngamene 'ngú na kpekpeke. Mu ngaha ehe bhende mu 'o e ngamu de. Mu ngaha 'zu inde mu lu e ngamu de.> ²² Ngámá-a apa pí anì me: <Mu ne siti kpála na kulu. 'Li mu makpe agbite mu ngae. Mo ombila nako hana me, ma ne kpála inde ngamene 'ngú na kpekpeke. Ma ngaha ehe inde ma a'o e ngama de. Ma ngaha ezu inde ma alu e ngama de. ²³ Ka ni mu 'o nako tia gba ma-a lie bhú baki de-e? Maka ma ago-o, ma de asia koko pépé.>

²⁴ Pipita-a, anì apa pí okpála inde adu oo me: <Yi dhepe tia inde ka anì bhomu, amba yi ha pí bhende ne di ndjikpa ko.> ²⁵ U atsia apa pí anì me: <Ngámá, a ka anì ndjikpa!> ²⁶ Anì agie me: <Ma apa pí yi me, kpála bhende li ehe nde ka e, u ahá ehe pí anì bhelé. Engú bini kpála bhende li

ehe nde ka e ade-e, u adhépe belegu mboye ehe inde ka ani ko. ²⁷ La-a, pi obhulu yala gba ma inde i kunda nako de me ma au ngámá pí 'ndji o-o, yi go ne uo ei, amba yi bhili uo kala ma sii.»

Yesu ali bhú Yelusalema

(Tsia bhú Mat. 21:1-11; ne bhú Mlk. 11:1-11; di ne bhú Dja. 12:12-19.)

²⁸ Pita li Yesu akpo 'ngú bhomu-o lie, ani atsia akodho 'kpí ne akalanu ngú nanu bhú Yelusalema. ²⁹ Ani akolo lie sunda kuti na Betefadje ne Betania-a,† lingo 'ta na ondula na Olive, ani atsia atima omakpata bhisi. ³⁰ Ani pi uo me: «Yi nu bhú kuti inde kala yi aoo. Yi akólo lie oo, yi abháka me u nde agbite ndili punda oo. Kpála bini dhaku nga pi ani de. Yi bhulu ani amba yi go ne ani ei. ³¹ I du me kpála bini nde ayi yi me: <Yi ngabhulu ani ngú ni?> Yi de pa pi ani me: <Ngámá ne gamu ani.» ³² Omakpata bhisi anu, u atsia abhaka ndu 'ngú hana maka li Yesu apa pi uo lie ko. ³³ U adu abhulu enu-o lie, obhuhulu-o ayi uo me: «Yi ngabhulu enu bhomu-o ngú ni?» ³⁴ U agie me: «Ngámá ne gamu ani.»

³⁵ Pipita-a, u ago ne ndili 'nu-o pi Yesu. U apa okoti gba o pí 'ngbu enu-o. U atsia ateteke Yesu ngú na'u pí 'ngbu ani.‡ ³⁶ Ani adu anu lie, okpála adu apa okoti gba o li kpadji. ³⁷ Ani akolo de Yelusalema masikpe li ngba 'ta na ondula

† **19:29** 19:29 Nayie bhú Yelusalema akólo bhú Betefadje ne Betania, a ko kilometele bata. ‡ **19:35** 19:35 Na'u ka Yesu pí 'ngbu punda-a, asuno nani bhomu-o guo 'ngú di ne nako lie ka ani ne kuto. Tsia bhú Djl. 9:9.

na Olive. Ndu omukpata hana abedhe ne djali bedhe. U atsia aholo nadhөгө Ebhe kpekepeke ngú ndu ongamba 'ngú hana inde u au e ko. ³⁸ U adu apa me:

«A ayo me Ebhe tuko bisagu pí
'ngbé ngámá inde ani atima e ko!

Guo 'ngú abhúlá,

amba sangu du di pí Ebhe Apí 'Kpí!†»

³⁹ Omufalisai koko inde adu bhú ká okpála bhomu-o, apa pí Yesu me: «Musunu, yoko omukpata gba mu-o mayoko.» ⁴⁰ Yesu atsia agie me: «Ma apa pí yi me, i du me u nde agbite 'bhө o-o, li oteme holo natu 'ue!»

Yesu aku 'gbá ngú okpála na Yelusalema

⁴¹ Li Yesu akolo lie masikpe de Yelusalema-a, ani au gudhu-o lie, ani atsia aholo aku 'gbá ngú okpála ango-o. ⁴² Ani adu apa me: «Aa! Ngayi okpála na Yelusalema-a, i dú me yi mbíla li 'kpí na naki inde-e, guo 'ngú inde u ago pí yi ne e uu-o! La-a, a ko likabhu pí yi anga mbia inde-e, awo lie pí yi mawo. ⁴³ Padhá de, anga oekpí koko akólo pí yi makolo, li 'kpí ango-o, obhulu yala gba yi-e, asá aga denge yi ngbalina. U búka yi, u tsia há 'gú pí yi ne ndu pápá hana. ⁴⁴ U agúgumu gudhu-o. U tsia bhili ndu okpála inde bhúbhú-o hana. Agba yi-e, teme bini tígala pí kilí e de, anga yi mbíla nani ekpí inde li Ebhe ago natsia yi lie de!»

† 19:38 19:38 Tsia bhú Ets. 118:26.

Yesu alì bhú 'ngbé 'ti Ebhe gba omaYuda
(Tsia bhú Mat. 21:12-17; ne bhú Mlk. 11:15-19;
di ne bhú Dja. 2:13-22.)

⁴⁵ Pipita-a, Yesu alì bhú 'ngbé 'ti Ebhe gba omaYuda-o. Anì atsia aholo natsambala okpála inde adu atsiñdji 'he oo-o. § ⁴⁶ Anì apa pì uo me: «U aye bhú Bhuku gba Ebhe-e me, Ebhe apa me: <Eti gba ma-a, a adú eti nayo ma.> Engú bini, ngayi-e, yi adji, atsia akolo bìlì gba obhulù 'zi!†»

⁴⁷ Yesu adu asuno ndu 'kpí hana bhú 'ngbé 'ti Ebhe gba omaYuda. Ongbengbe odimandø , omusuno na lílì gba Moidje di ne obhelesi okpála adu agilì kpadji ngú nabhøø anì. ⁴⁸ Engú bini, u tsia sia kpadji ngú namemene de, anga ndu okpála hana adu adje anì ne gugumu naali.

20

A ngaha angu pì Yesu da?
(Tsia bhú Mat. 21:23-27; di ne bhú Mlk. 11:27-
33.)

¹ A akolo ekpí bini, Yesu adu asuno pì okpála bhú 'ngbé 'ti Ebhe gba omaYuda. Anì atsia adu di nakpokpo Bádha Ngali pì uo. Ongbengbe odimandø gba Ebhe , omusuno na lílì gba Moidje di ne obhelesi okpála ago. ² U atsia ayi anì me: «Pa nga pì ya, aha kpadji pì mu ngú namene ongú inde-e da? A aha la di angu ango-o pì mu ngánga da?» ³ Abhomu-o, Yesu atsia agie pì uo

§ 19:45 19:45 U adu nani atsiñdji onu di ne odhu bhú 'ngbé 'ti Ebhe gba omaYuda ngabula me okpála, inde adu ne gugumu ngú nahaha pì Ebhe-e, kala. † 19:46 19:46 Tsia bhú Isa. 56:7; di ne bhú Djlm. 7:11.

me: «Ngama di-e, ma ayí yi lí 'ngú bini. Yi pa nga muma, ⁴ a ha kpadji pi Djaa ngú nabatisa okpála da? Ne me a ko Ebhe, ne me a ko okpála?»

⁵ U aholo namene kpekebhe sunda o. U atsia adu apa me: «Í du me ní nde agie me: <A aha kpadji pi ani ne Ebhe>, ani yí ní me: <Í du mo-o, ka ni yi bhuka la nani engú inde ani adu apa e lie de-e?» ⁶ Í du di me ní nde apa me: <A ha kpadji pi ani ne okpála-a>, li ndu okpála hana bhíli ní ne teme, anga u ambila ndjindji me Djaa nani ne polofeta .» ⁷ Abhomu-o, u atsia agie me: «Ya mbila kpála inde aha kpadji pi ani-e de.» ⁸ Do Yesu pi uo me: «Í du mo-o, ngama di-e, ma pá pi yi de me aha kpadji muma da ngú namene ehe inde.»

Gbitaku pindji okpála na kulu inde abhelo ndili gba ngámá gba o-o

(Tsia bhú Mat. 21:33-46; di ne bhú Mlk. 12:1-12.)

⁹ Pipita-a, Yesu aholo nakpokpo gbitaku inde-e pi okpála me: «Kpála bini alu nani ngu vino.* U adje lio ne okpála ngú namene kulu bhú 'dyi-o, amba o du agbó bhusu o ne uo li nguwa-o. Ani atsia atapa dhuku ngubula 'kpí bhelé.

¹⁰ A akolo li nedhinga nako lílí o. Abhomu-o, ani atima kpála na kulu bini agba okpála ango-o me u ha nguwa bhe gba ni-e pi ni haha. Engú bini, okpála ango-o abhi kpála na kulu bhomu-o má kpú! U atsia agie ani ne mbulu 'kpa e padhá.

* **20:9** 20:9 Bhú bhuku gba polofeta Isaya-a, vino ngasuno piga gba omafalaale. Tsia bhú Isa. 5:1-7.

11 Bhulɔ 'dyi-e atima matá kpála na kulu koko bini. U abhi di ani, u asosobho ani, u atsia agie ani ne mbulɔ 'kpa e padhá. 12 Ani atima matá kpála na bata. Bhobhomɔ-o, u atsotsolo kute ani ne eka. U atsia agbe ani bhú 'dyi-o.

13 Abhomɔ-o, bhulɔ 'dyi atsia apa me: «Ma améne si pi? Ma atíma nga ibili ndili gba ma na mukunda-o. Nedhinga koko-o, u tí da namanga ani.» 14 Engú bini, li okpála ango-o au ndili-e lie me-e, u atsia apa sɔnda o me: «Yi tsia nga la ndju kpála inde atígala galikpe ne edyi-o. Ní bhøle ani, amba edyi-e kolo ibili naaní.» 15 Abhomɔ-o, u agbe ani bhú 'dyi-o, u abhøle ani.» Yesu atsia ayi me: «Mbia inde-e, bhulɔ 'dyi-e améne ngú uo pi? 16 Ani agó, ani bhíli okpála na kulu ango-o. Ani tsia há edyi-e pi okpála na kulu koko.» Li okpála adje engú bhomɔ-o lie, u atsia apa me: «A ayo de me, bhobhomɔ-o mene lie de!»

17 Yesu atsia uo, ani atsia apa me: «Engú inde u aye e bhú Bhuku gba Ebhe-e me: <Teme inde li okpála nayiki eti-e abhike e,

akolo teme inde abi eti-e libhomu.†> A akunda napa pi? 18 I du me kpála nde ati pí teme ango-o, ani gúgumɔ. I du la di me teme ango-o nde ati pí kpála-a, i tú nu ani.»

Engú pindji nakala mandjandja
(Tsia bhú Mat. 22:15-22; di ne bhú Mlk. 12:13-17.)

19 Bha li nedhinga bhomɔ-o, omusuno na líli gba Moidje di ne ongbengbe odimandø gba Ebhe-e, agili nani naholo Yesu, anga u ambila me ani

† 20:17 20:17 Tsia bhú Ets. 118:22.

apa gbitaku bhomu-o li 'ngú gba o-o. Engú bini, u adu adje tsulu ka okpála. ²⁰ Abhomu-o, u aholo akenge Yesu. U atsia atima obhulu kali inde adu amene ehe mugito me uo ngbingbili. Okpála ango-o adu agili naholo ani li 'li e ngubula me o pu ani pi Pilate, ngámá na ndu doto ango-o. ²¹ U ayi ani me: «Musunu, ya ambila me ma ngagama 'ngú ndjindji, ma la di ngasuno 'ngú ngbingbili. Ma tsia engbé gba kpála de. Ma ngasuno kpadji gba Ebhe-e pi okpála ngbingbili. ²² Pa nga pi ya, a ayo me ya kala mandjandja gba Kaisala, 'ngbé ngámá na doto na Loma-a, ne me ya kala de?»

²³ Li Yesu ambila ekú gba uo-o lie, ani atsia apa pi uo me: ²⁴ «Yi suno nga lí falanga mama bini. A pépé ne kulu da, la di ne 'li da?» U agie me: «A ko kulu Kaisala, 'ngbé ngámá na doto na Loma, di ne 'li ani.» ²⁵ Abhomu-o, Yesu atsia apa pi uo me: «I du mo-o, yi ha ehe bhende gba Kaisala, 'ngbé ngámá na doto na Loma-a pi e, amba yi ha la di bhende gba Ebhe-e pi Ebhe.» ²⁶ U u siti 'ngú bhú engú inde ani adu apa e kala okpála-a de. Engú bini, u angamba naali ka eli inde ani agie e ko. Kaka-a, u andjili bha má bulu!

Nazuku ka okpála inde amu

(Tsia bhú Mat. 22:23-33; di ne bhú Mlk. 12:18-27.)

²⁷ Abhomu-o, oSadukai koko ago de Yesu. OSadukai ziba nani naao de me okpála inde amu-o, azúku mazuku-o de. U ayi ani me: ²⁸ «Musunu, Moidje aye nani lili pi ní me: «Li kpála kpi 'o ká wala e me ani nde zu de-e, a ayo me ndai ani de ha elo ango-o, amba ani zu ongisi pi ndai e inde

akpi ko.» ²⁹ La-a, adu nani obhosi mananika bhú piga bini. Bhende na kalanu-o aha elø, ani akpi padhá me ani nde zu de. ³⁰ Bhende na bhisi-e aha økø angø-o. Ani atsia akpi. ³¹ Pipita-a, bhende na bata-o. A adu bhadi moko pi ndu uo mananika hana, u amu me u nde zu de. ³² Ali soso-o, ølø angø-o atsia akpi di. ³³ Ya ngayi mu me: Li 'kpí li okpála inde amu-o azúku lie, ølø angø-o adú naa da? Padhá de, anga ndu uo mananika hana aha nani ani!»

³⁴ Abhomu-o, Yesu atsia agie pi uo me: «Okpála na naki inde-e ngaha lio. ³⁵ Engú bini, okpála bhende amu-o, li Ebhe au me u ti da nazuku ngú nasia mukobho bhú nedhinga inde ngago-o, u há lio de. ³⁶ U tí da matá namu-u de, anga u akolo ibili maka oandjelu . A ko ongisi gba Ebhe, anga u azuku. ³⁷ Moidje asuno pi ní mbámbá me okpála inde amu-o azúku mazuku. Ani aye bhú bhuku gba e li bili inde ani akpo 'ngú lie pindji tsa 'po inde adu atsi-e me, Ebhe apa me: <Ma ne Ebhe inde li Abalahama ngadhøø e, Ebhe inde li Isaka ngadhøø e, Ebhe inde li Jakobho ngadhøø e ko.†> ³⁸ Ebhe ne Ebhe gba okpála bhende amu-o ade. Engú bini, a ko Ebhe gba okpála bhende bhú mukobho, maka li Abalahama, Isaka ne Jakobho nde pi ani lie bhú mukobho ko.»

³⁹ Abhomu-o, omusuno na líli koko atsia agie pi ani me: «Musuno, mo opa ndjindji.» ⁴⁰ Kaka-a, u yi matá ani li 'ngú bini de.

† **20:37** 20:37 Abalahama, Isaka ne Jakobho ngadhøø Ebhe anga pi Ebhe-e, belegu u amu lie li kute o, uo bhú mukobho li bua o. Tsia bhú Eki. 3:6.

Masiya ne Ngámá gba Davidi

(Tsia bhú Mat. 22:41-46; di ne bhú Mlk. 12:35-37.)

⁴¹ Abhomu-o, Yesu apa matá pi uo me: «Lele pi li okpála ti da napa lie me Masiya ne ndili na piga gba Davidi-e? ⁴² Padhá de, anga ngaani Davidi makpe-e, ani apa bhú bhuku na oetsi gba omaYuda me:

«Ebhe Ngámá apa pi Ngámá gba ma-a me:

Du kuto li pá 'kpa ma na kokpa,

⁴³ akólo li nedhinga inde ma a'ó obhulu yala gba mu-o lie

dabili na sa-tidhu mu ko.» †

⁴⁴ I du me Davidi nde nga'i Masiya me Ngámá gba ni-e, lele pi li Masiya ti da napa lie ndili na piga gba Davidi-e?»

Yi améne maka omusuno na líli de

(Tsia bhú Mat. 23:1-36; di ne bhú Mlk. 12:38-40.)

⁴⁵ Ani apa pi omukpata kala ndu okpála hana inde adu adje ani-e me: ⁴⁶ «'E-e! Yi lila liyi ka omusuno na líli gba Moidje-e uu! U kunda bha nadhuku ne ondjandja yambu. U kunda bha me okpála du ne yiyi o maka ongámási li bili li okpála apopekøbhø bhúla o lie ko. U kunda bha nadulu pi odabili na akalanu bhú oeti nadje líli , di ne odabili na akalanu bhú da anokomia.

⁴⁷ U ngandjia angu oekesi na olisilisi ne nabha ohe gba uo. U ngayo Ebhe ngengele ngu nasuno mugito me a ko obabadha okpála. Kaka-a, u asia likabhu naali!»

† **20:43** 20:42-43 Tsia bhú Ets. 110:1.

21

Makiso gba ɛkɛ bini na ɔɔlɔ

(Tsia bhú Mlk. 12:41-44.)

¹ Ekpí bini, Yesu adu bhú 'ngbé 'ti Ebhe gba omaYuda. Aní atsia 'kpí, aní au me obhulɔ tia ngabhike tia gba o-o bhú sanduku na makiso na 'Ngbe 'ti Ebhe-e ngú nahaha pí Ebhe. ² Aní atsia au di ɛkɛ bini na ɔɔlɔ bhulɔ ndibhili me aní nde ngabhike senge bhisi. ³ Abhomu-o, aní atsia apa me: «Ma apa pí yi na paká me, ɔlɔ na ndibhili lí 'ko e akpi inde-e, aha makiso ane ndu okpála koko hana. ⁴ Padhá de, anga ndu okoko hana, u aha tia bhende u nde ne gumu e ade ko. Engú bini, ngaani-e, abana aní nde lie bhú ndibhili-e, aní aha ndu bhende aní adu akobho lie hana.»

Yesu apa me: «U agúgumu 'ngbé 'ti Ebhe gba omaYuda-o»

(Tsia bhú Mat. 24:1-2; di ne bhú Mlk. 13:1-3.)

⁵ Pipita-a, okpála koko aholo akpokpo 'ngú pindji 'ngbé 'ti Ebhe gba omaYuda-o. U adu apa me: «A bha ndju babadha naali ne obabadha teme ango-o, di ne ohe na mase naali inde u aha e pí Ebhe-o.» Engú bini, Yesu atsia apa me: ⁶ «Ndu 'he inde yi ngau e inde-e, ekpí koko akólo makolo, teme bini tígala pí kilí e de. U agúgumu eti-e hana kuto.»

Likabhu inde akólo kala sokpi-o

(Tsia bhú Mat. 24:3-14; di ne bhú Mlk. 13:3-13.)

⁷ Abhomu-o, u atsia ayi aní me: «Musunu, engú inde mu ngakpokpo 'ngú pindji e bhomu-o, akólo nadho? Ehe inde asúno nedhinga nago ka engú

ango-o, a adú ni?» ⁸ Yesu agie me: «Yi lila liyi uu! Kpála bini apíte yi de. Padhá de, anga okpála bhelé agó ne 'li ma, u tsia pá me: <Ma ne Masiya !> U tsia pá di me: <Nedhinga nago ka Masiya akolo!> Engú bini, yi akpáta uo de. ⁹ I dũ me yi nde adje okpála ngakpo 'ngú na oegú di ne ongú na okpekpeke 'ndji-e, yi adjé tsulũ de. Padhá de, anga a ayo ngaiza me oengú ango-o kolo kalanũ. La-a, sokpí-e dú nga kolo má gala mo-o de.» ¹⁰ Pipita-a, aní matá pi uo me: «Okpála na kuti bini ahá 'gú pi okpála na kuti koko. Li ngámá na kuti bini há 'gú pi ngámá na kuti koko. ¹¹ Doto adyíki ne adjigidjo na ngbéngbé. Adyíndi di ne osisiti kuo natagba matagba alí bhú obili ngangá. Yi aú ongamba 'ngú di ne ongú na tsulũ tsulũ abhúlá.

¹² Engú bini, kala me ndũ 'ngú bhomũ-o hana kolo-o, u ahólo yi. U améne yi sisiti. U anú ne yi me u kodho 'ngú gba yi-e bhú 'ti nadjé líli gba Moidje . U tsia bhíke yi bhú tikpũ. U asungula yi pi ongbengbe ongámási di ne obhende ngatsia 'kpí li kuti-e kabula 'li ma. ¹³ Bhobhomũ-o ahá kpadji pi yi ngubula me, yi kpokpo 'ngú gba ma-a pi uo. ¹⁴ Yi 'o li bua yi me, yi gíli engú inde yi apá e li nedhinga nakodho 'ngú gba yi-e kalanũ de. ¹⁵ Padhá de, anga ma ahá eli di ne imbilangu pi yi ngama makpe, ngubula nagbite 'bhø ndũ obhulũ yala gba yi-e hana. ¹⁶ Odyi yi ne ohi yi, ondaise yi ne okpála na piga gba yi di ne obi yi apú belegu yi ngao. U abhíli okpála koko bhú ka yi. ¹⁷ Ndũ okpála hana ayála yi kabula 'li ma. ¹⁸ Engú bini, 'kpa sundjo yi ngíta belegu de bini.

¹⁹ I dũ me yi nde alũ kpekpeke akólo li soso-o, yi sía mukobho na dũdũma.»

Engú inde akólo li Yelusalema

(Tsia bhú Mat. 24:15-21; di ne bhú Mlk. 13:14-19.)

²⁰ «Nedhinga yi aú lie me osũdha asa Yelusalema ngbalina-a, yi de mbila me, nakpi kaka-a akolo masakpe. ²¹ Abhomũ-o, okpála bhende a abháka o bhú ndu doto na Yudaya-a, a ayo me u kpe ne apí 'ta. Obhende adú bhú Yelusalema-a, a ayo me u ze bhúbhú maze. Obhende adú asangba gũdhũ-o, a ayo matá de me u li abhú gũdhũ-o de. ²² Padhá de, anga adú ekpí nakodho 'ngú gba Ebhe ngũbula me ndũ 'ngú hana inde u aye e bhú Bhuku gba Ebhe-e, amene lie. ²³ Li 'kpí ang-o-o, adú likabhu na ngbéngbé pi olisi na ebhi di ne obhende li ongisi adú andji 'ka o-o. Padhá de, anga okpála na doto adjé likabhu naali, li mangimbo gba Ebhe-e súno lie pi uo. ²⁴ U abhíli okoko ne ombotia. U tsia mbá okoko bhú bali ne ndũ bili hana. Omũpagano adédele Yelusalema ne 'dhũ o akólo bha bini li nedhinga gba uo andjia lie ko.»

Nakolo ka sokpí

(Tsia bhú Mat. 24:29-31; di ne bhú Mlk. 13:24-27.)

²⁵ «U aú oengú na ngangamba bhúla ela, bhúla epe di ne bhúla oikupala. Píla doto-o, bua okpála hana adú atí má ngbi ngbi ngbi ne tsulũ ka tolo, di ne ka li 'ngbé 'ngu adú adimba lie ko! ²⁶ Okpála amú ne tsulũ ka nabhundja engú inde akólo píla doto libhomu-o, anga ndũ 'he na

abɥúlá hana adyíkí má djigi djigi! ²⁷ Pípíta-a, u tsia ú ma ngama, Ndílí gba kpála, me ma nde ngago bhú ndindi ne angu di ne asasaua gba ma-a hana.† ²⁸ Nedhinga lí onǵú angó-o ahólo amene lie lie, yi de lɥ kpekpeke, amba yi 'e 'ndjì yi ne abɥúlá, anga ekpí lí Ebhe akóbho yi lie akolo masikpe.»

Gbitaku pindjì ndula na figi

(Tsia bhú Mat. 24:32-35; di ne bhú Mlk. 13:28-31.)

²⁹ Pípíta-a, Yesu atsia apa gbitaku inde-e pì uo me: «Yi tsia nga ndula na figi di ne ondula koko hana. ³⁰ Yi u me 'kpá 'kpá aholo nake-o, yi mbíla me gboko 'kpí akolo masikpe. ³¹ A bhadi moko, nedhinga yi aú onǵú bhomu-o lie ngakolo-o, yi de mbíla me Nau gba Ebhe-e akolo masikpe. ³² Ma apa pì yi na paká me, ndu 'ngú bhomu-o hana akólo me okpála na nakí inde-e nde mu nga ndu o hana de. ³³ Ekpí ne doto akódho 'kpí makodho. Engú bini, 'li ma kódho 'kpí belegu de bini.»

Yi lila liyi malila

³⁴ «'E-e! Yi lila liyi uu! Yi adú abhundja bha engú na anokomia, ne engú nalangba ne pandi di ne ongangá 'ngú na doto inde-e de. † du mo-o, lí ekpí lí ngama, Ndílí gba kpála, ma agó lie, í kólo lí yi bhú gbilikiti, ³⁵ maka ekú ahoholo onu lie ko. Padhá de, anga ahólo okpála píla doto libhому. ³⁶ Yi alá-a de. Yi du nayo Ebhe ndu nedhinga hana, ngubula me yi sia angu ngú nakpe ndu

† 21:27 21:27 Tsia bhú Dan. 7:13.

'ngú inde akólo hana, amba yi koto ngú nalụ kala ma, Ndili gba kpála-o.»

³⁷ Ne ngbikpi-e, Yesu adu asuno bhú 'ngbé 'ti Ebhe gba omaYuda-o. Tagolo, ani atsia adu anu asi apí 'ta na ondula na Olive. ³⁸ Ndu okpála hana adu ago bhú sikikpi bhú 'ngbé 'ti Ebhe ngú nadje ani.

22

*Ongámási gba omaYuda agili nabhөлө Yesu
(Tsia bhú Mat. 26:1-5; ne bhú Mlk. 14:1-2; di
ne bhú Dja. 11:45-53.)*

¹ Ekpí na anokomia na Pasika , ekpí ayo di lie me u zu mapa inde li levile nde bhú e ade-e, akolo masikpe. ² Ongbengbe odimandø gba Ebhe di ne omusuno na líli gba Moidje adu agili kpadji ngú nabhөлө Yesu. Engú la bini, u adu adje tsulụ ka okpála.

³ Pipita-a, Satana ali li bua Yuda inde u a'i e me Isikaliote, saka obhulụ titima ndjikpa ne ká bhisi gba Yesu-o. ⁴ Abhomu-o, ani anu nadje lie ne ongbengbe odimandø gba Ebhe di ne ongámási gba okpála nalila 'ngbé 'ti Ebhe gba omaYuda. Ani anu nakpokpo ne uo maka ani apú Yesu lie pi uo ko. ⁵ U akpi djali naali, u atsia adje lio sunda o me o há pi ani falanga. ⁶ Yuda aziba. Ani atsia aholo agili nedhinga na ndjindji ngú napu Yesu pi uo me, okpála nde de uo ade.

Yesu atima okpála me, u nɔ po bhúla ezɔ na anokomia

(Tsia bhú Mat. 26:14-16; ne bhú Mlk. 14:12-21; di ne bhú Dja. 13:21-30.)

⁷ Ekpí na anokomia nazɔ mapa inde li levile nde bhú e ade-e akolo. A adɔ di ekpí inde ayo lie me u bhøle folo kandøle ngubula anokomia na Pasika-o. ⁸ Yesu atima Piele ne Djaa . Aní pí uo me: «Yi nɔ leke ndɔ 'ngú hana pí ní ngú anokomia-o.» ⁹ U atsia ayi aní me: «Mo okúnda me ya nɔ leke su?» ¹⁰ Aní agie pí uo me: «Yi djedje, yi alí lie bhú Yelusalema-a, yi atú liyi ne bhoko bini me aní nde abi lusa 'ngu pí 'ndji e. Yi kpata aní bhú eti inde aní alí bhú e-o. ¹¹ Yi yi bhulɔ eti ang-o me: <Mɔsuno ngayi mɔ me, tina 'ti inde ma azú anokomia ne omɔkpata gba ma-a bhú e ngae dho?» ¹² Aní asúno 'ngbé tina 'ti bhe na abhúlá-a pí yi bini. Ndɔ 'he hana bhúbhú. Yi leke ehe na anokomia bhúbhú.» ¹³ U agbida, u abhaka ndɔ 'ngú hana maka li Yesu apa lie ko. Abhomɔ-o, u atsia aleke ezɔ na anokomia-o.

Yesu aha mapa ne vino pí obhulɔ titima

(Tsia bhú Mat. 26:26-30; ne bhú Mlk. 14:22-26; di ne bhú 1 Kol. 11:23-25.)

¹⁴ Li nedhinga ang-o akolo lie, Yesu ne obhulɔ titima gba e atsia adulɔ kuto ngú nazɔ 'he-o. ¹⁵ Aní apa pí uo me: «Ma adɔ nako ne gumɔ naali me ní zɔ anokomia inde-e ne yi bhú dabili bini kala me ma dje likabhu ko! ¹⁶ Padhá de, anga ma apa pí yi me, ma zú matá-a de, akólo li nedhinga inde li tata-a asúno lie lie bhú Nau gba

Ebhe ko.» ¹⁷ Abhomu-o, ani aha kópo na vino-o, ani agie heni pi Ebhe. Ani atsia apa me: «Yi haha, amba yi ndji ndu yi hana. ¹⁸ Ma apa pi yi me, ma ndji matá-a de akólo li nedhinga inde li Nau gba Ebhe-e agó lie ko.» ¹⁹ Pipita-a, ani aha mapa-o, ani agie heni pi Ebhe. Ani agumu bhusu bhusu, ani aha pi uo. Ani atsia apa me: «A inde e kute ma [inde aha lie pi yi-o. Yi du amemene moko, ngubula nabhundja ma.» ²⁰ Pita u andjia nazu 'he bhomu-o lie, ani aha di kópo na vino-o pi uo, ani atsia apa me: «Vino inde-e, a ko gandja na mbia li Ebhe akodho e ne yi ne ngute ma inde atuko pi yi-o.]

²¹ Engu bini yi tsitsia, kpála inde apu ma-a, ani ngazu 'he ne ma bu dabili bini si! ²² Padhá de, anga a ayo me ngama, Ndili gba kpála-a, ma kpi maka li Ebhe apa lie ko. Engu la bini, a ko likabhu naali pi kpála inde apu ma ko!» ²³ Abhomu-o, u atsia aholo ayi lio sunda o me, a ko kpála bhedho bu ka o inde i ti da namene 'ngu bhomu-o.

Ane ne engbe da?

²⁴ Pipita-a, omukpata aholo amene kpekebhe sunda o ngu nambila me ane ne engbe bu ka o da. ²⁵ Yesu atsia apa pi uo me: «Ongbengbe ongamasí gba omupagano-o ngaha lili pi okpála gba o-o. Obhende ngatsia 'kpi li doto-o kunda me u 'i o me <Obabadha okpála.> ²⁶ Pi yi-e, yi amene mo-o de. Engu bini, a ayo me kpála inde ane ne engbe bu ka yi-e du maka mboye ndili, amba kpála inde ngatsia 'kpi li okpála koko-o, du naae

maka kpála na kulu gba uo-o. ²⁷ Padhá de, anga ane ne engbé da, ne me a ko kpála inde ngazụ 'he? Ne me a ko kpála inde ngamene kulu kulu-o. A ko kpála inde ngazụ 'he-e di? La-a, ma bhú ká yi maka kpála na kulu gba okpála koko.

²⁸ Ngayi obhulụ titima gba ma-a, ní adu ne yi ndu 'kpí hana bhú nedhinga inde ma adu adje likabhu gba ma-a lie ko. ²⁹ Kaka-a, ma ahá Nau pi yi maka li 'Dyi ma aha di muma lie ko. ³⁰ Abhomu-o, yi azú 'he, yi tsia ndjí di vino ne ma bhú dabilí bini, i du me ma nde ali bhú Nau gba ma-o. Yi adúlú di pí odabilí na ngámá ngú nakodho 'ngú gba opiga ndjikpa ne ká bhisi gba omafsalaele ko.»

*Yesu apa pi Piele me: «Mo oyála ma»
(Tsia bhú Mat. 26:31-35; ne bhú Mlk. 14:27-31;
di ne bhú Dja. 13:36-38.)*

³¹ Pipita-a, Ngámá Yesu atsia apa me: «Simo, Simo, djedje nga! Ebhe aha kpadji pi Satana me ani pe yi maka u apepe mapunga lie ko. ³² Engú bini, ngama-a, ma ayo Ebhe ngú mu, amba mo o'ó ká nabhuka gba mu-o de. Mo odjí matá bua mu lie, mu de ha di angu pi ondaise mu uu.» ³³ Piele apa pi ani me: «Ngámá, ma bedhe me, abana i du nanu bhú tikpu di ne nakpi-e, ní nú ne mu bhú dabilí bini.» ³⁴ Yesu agie pi ani me: «Piele, ma apa pi mu me, sukpe na naki inde-e, kala me engu ku 'gbá-a, mo opá bhutsibhutsi bata me ni mbila ma de.»

*Yesu apa pi omukpata gba e me, u leke lio
ngubula egú*

³⁵ Pipita-a, ani atsia ayi uo me: «Nedhinga nako ma atima yi lie mandí tia-a, mandí gonia ne maløkø-o, ehe bini aneke nako ka yi uu?» U agie me: «Ehe bini neke ka ya de.» ³⁶ Do ani pi uo me: «Mbia inde-e, kpála bhende li tia ne gonia nde ka e-e, a ayo me ani haha. Kpála bhende li mbotia nde ka e ade-e, a ayo me ani tsindji koti gba e-o, amba ani kala mbotia ne di. ³⁷ Padhá de, anga ma apa pi yi me, engú inde u aye e bhú Bhuku gba Ebhe-e me, «U ato ani bhú ká okpála na sisiti-e», a ayo me amene lie li kute ma. A moko, engú inde atsia ma-a, a adji amene lie.†» ³⁸ Omukpata atsia apa me: «Ngámá, a ka ya si ne ombotia bhisi.» Ani atsia agie pi uo me: «A ale.»

Yesu anu nayo Ebhe pí eta na ondula na Olive (Tsia bhú Mat. 26:36-46; di ne bhú Mlk. 14:32-42.)

³⁹ Pipita-a, Yesu akoto. Ani anu apí eta na ondula na Olive* maka ani adu amemene lie ko. Omukpata gba ani atsia akpata di ani. ⁴⁰ U akolo lie oo, ani atsia apa pi uo me: «Yi yo Ebhe, amba yi alí bhú nale de.» ⁴¹ Ani ayie de uo, ani adyudyo mbo lie tsutsu masudha. Ani akikita lipuku e kuto, ani atsia ayo Ebhe me: ⁴² «'Dyi ma, i du me mu nde akunda-a, mu de 'e likabhu inde-e de ma tsutsu. La-a, mo oméne maka ma akunda lie de, mene mangbo maka mo okunda lie ko.» [⁴³ Abhomu-o, andjelu bini ayie abhúlá, ani akoto li ani, ani atsia aha angu pi ani. ⁴⁴ Ani abedhe

† **22:37** 22:37 Tsia bhú Isa. 52:12. * **22:39** 22:39 Eta na ondula na Olive-e asangba gudhu na Yelusalema.

lie ne likabhu-o, ani atsia aholo matá nayo Ebhe kpekpeke naali. Ngufu na kute ani akolo maka ngute, a atsia adu ayi kuto má ta ta ta!]

⁴⁵ Pita li ani a'o nayo Ebhe lie, ani ayie bhúlá, ani agie lie ade omukpata. Ani abhaka me u nde atuko ne ela ka likabhu. ⁴⁶ Ani atsia apa pi uo me: «Yi atuko ne ela ka ni? Yi yie bhúlá, amba yi yo Ebhe, ngubula me yi alí bhú nale de.»

U aholo Yesu

(Tsia bhú Mat. 26:47-56; ne bhú Mlk. 14:43-50; di ne bhú Dja. 18:3-11.)

⁴⁷ Li nedhinga li Yesu adu apa 'ngú bhomu-o lie, Yuda suka obhulu titima ndjikpa ne ká bhisi-e ago ne bhiti okpála. Ani adyudyo lie de Yesu masikpe ngubula me ni nvu pabhø ani.

⁴⁸ Abhomu-o, Yesu atsia apa pi ani me: «Mu nganvu pabhø ma, Ndili gba kpála, ngubula napu ma-a?»

⁴⁹ Li omukpata gba Yesu-o au engú inde adji akódho 'kpí-e lie, u atsia ayi Yesu me: «Ngámá, a la ya gu ne uo ne mbotia?» ⁵⁰ Suka uo asu kpála na kulu gba bhele kpála gba odimandø gba Ebhe-o . Ani atsia akodho kpadje ani li pápá na kokpa-a má tse! ⁵¹ Engú bini, Yesu atsia apa me: «Yi 'o'o, a apise moko.» Ani aha kpadje kpála angoo, ani a'o 'kpa e tété, ani atsia akobho ani.

⁵² Pipita-a, Yesu atsia apa pi ongbengbe odimandø ne ongámási gba omulila na 'ngbé 'ti Ebhe gba omaYuda, di ne obhelesi okpála inde ago ngú naholo ani-e me: «Ka ni yi ago ngú ma lie ne ombotia, di ne ondula mugito me yi ago ngú naholo bhulu 'zi-e? ⁵³ Ní adu nako ne yi

ndu 'kpí hana bhú dabili bini bhú 'ngbé 'ti Ebhe gba omaYuda. La-a, yi holo ma de. Engú bini, nedhinga gba yi-e akolo, nedhinga gba ngámá na biti-o.»

Piele apa me ni mbila Yesu de

(Tsia bhú Mat. 26:57-58, 69-75; ne bhú Mlk. 14:53-54, 66-72; di ne bhú Dja. 18:12-18, 25-27.)

⁵⁴ Abhomu-o, u aholo Yesu, u anu ato ani bhú 'ti gba bhele kpála gba odimandø gba Ebhe-o. Piele adu akpata uo mbo tsutsu. ⁵⁵ A abhaka me u nde akpo djua tu mbadhasu, okpála adulu dede. Piele atsia ago adu bhú ká uo. ⁵⁶ Kpála na kulu bini na ølø au ani li zi djua me ani nde adu kuto. Ani atsia Piele ne kpéke djila, ani me: «Kpála inde-e du di nako ne ani bhú dabili bini!» ⁵⁷ Engú bini, Piele ayala, do ani de-e: «Ma ambila ani de, ølø-e.» ⁵⁸ Pita nedhinga bedi-e, bhoko bini au ani, ani atsia apa me: «Ngamu di-e, mu ne saka okpála gba Yesu-o!» Engú bini, Piele atsia agie me: «Bhoko-e, ma ne saka uo ade.»

⁵⁹ Pipita abhue mbo ngengele. Bhoko koko atsia azi kekele tété me: «A ko kukulu 'ngú, kpála inde-e du nako ne Yesu bhú dabili bini, anga a ko di kpála na Galilaya.» ⁶⁰ Engú bini, Piele agie pi bhoko ango-o me: «Bhoko-e, ma mbila 'ngú inde mu ngapa e de.» Bha li nedhinga inde ani adu apapa lie, engu atsia aku 'gbá. ⁶¹ Ngámá Yesu adji bhúla e, ani atsia bhúla Piele. Abhomu-o, Piele atsia abhundja engú inde li ngámá Yesu apa igini e pi ani-o me: «Sukpe na naki inde-e, kala me engu ku 'gbá-a, mo opá bhutsibhutsi bata me

ni mbila ma de.» ⁶² Piele akoto kilidjo, ani abhele kuo e ne egba má kusu!

U asobho Yesu, u atsia abhi di ani

(Tsia bhú Mat. 26:67-68; di ne bhú Mlk. 14:65.)

⁶³⁻⁶⁴ Okpála inde adu alila Yesu-o aholo amu ani. U agbite djila ani. U aholo abhi ani. U atsia adu ayi ani me: «Aa! Ngamu, polofeta-a , pa nga pi ya me asu mu da!» ⁶⁵ U asosobho ani. U atsia apa di ongu koko pi ani bhele bhú osobho inde u adu asosobho ani ne e ko.

Odimandø akodho 'ngú gba Yesu

(Tsia bhú Mat. 26:59-66; ne bhú Mlk. 14:55-64; di ne bhú Dja. 18:19-24.)

⁶⁶ Li ekpi aseke lie, obhelesi okpála gba omaYuda apokobhe bhúla o bhú dabili bini ne ongbengbe odimandø gba Ebhe, di ne omusuno na líli gba Moidje-o. U atsia agbe ani kala Libi okpála natsia 'kpi li 'ngú gba omaYuda-o . ⁶⁷ U ayi ani me: «I du me mu nde ne Masiya-a , mu de pa pi ya.» Abhomu-o, ani agie pi uo me: «I du me ma nde apa pi yi-e, yi bhuka de. ⁶⁸ I du la di me ma nde ayi yi li 'ngú-o, yi gie 'ngú muma tété de. ⁶⁹ Nayie pi mbia inde-e, ngama, Ndili gba kpála-a, ma adú li pápá na kokpa gba Ebhe na angu-o.†» ⁷⁰ Abhomu-o, ndu uo hana atsia ayi me: «Bhobhomu-o apa me mu ne Ndili gba Ebhe?» Ani agie pi uo me: «A maka yi apa lie ko.» ⁷¹ Abhomu-o, u atsia apa me: «Ní matá ne gumu okpála koko inde i ti da napa engú ango-o

† **22:69** 22:69 Tsia bhú Ets. 110:1.

pi ní ade, anga ní adje bha nganí makpe bhú 'li ani adje!»

23

U anu ne Yesu kala Pilatø
(*Tsia bhú Mat. 27:1-2, 11-14; ne bhú Mlk. 15:1-5; di ne bhú Dja. 18:28-38.*)

¹ Pipita-a, ndu okpála hana inde adu bhú dá bula-a ayie bhúlá, u atsia anu ne Yesu kala Pilatø, ngámá na Loma . ² Oo, u aholo apa li Yesu me: «Ya abhaka kpála inde-e me ani nde ngaha kpéke 'ndji pi okpála gba ya-o. Ani nde ngayoko uo me u akala mandjandja gba Kaisala , 'ngbé ngámá na Loma-a de. Ani atsia adu apa di me ni ne Masiya , akunda napa me 'ngbé ngámá.»

³ Pilatø ayi ani me: «Ngamu-o, mu ne 'ngbé ngámá gba omaYuda?» Yesu agie pi ani me: «Mo opa ngamu.» ⁴ Abhomu-o, Pilatø atsia apa pi ongbengbe odimandø di ne bhiti okpála bhomu-o me: «Ma u engú bini inde a ayo me u holo kpála inde-e ngú e de.» ⁵ Engú bini, u azi bha kekele tété me: «Bhú nasuno gba ani-e, ani ngaha kpéke 'ndji pi okpála me u améne líli gba ngámá-a de. Ani amene bhú doto gba omaYuda libhomu. Ani akpo bhú ndu doto na Galilaya. Mbia inde-e, ani akolo ibili ne di ei.»

U anu ne Yesu kala ngámá Elode

⁶ Li Pilatø adje lie mo-o, ani atsia ayi me: «Kpála inde-e, a ko kpála na Galilaya?» ⁷ U agie pi ani me: «A moko, a ko kpála na Galilaya.» Abhomu-o, li Pilatø adje lie me Yesu ayie bhú ndu

doto li ngámá Elode adu alila e-e, ani atsia atima ani pi ani. Padhá de, anga bhú ekpí ang-o, Elode adu di bhú Yelusalema oo. ⁸ Elode akpi djali naali li ani au Yesu lie. Padhá de, anga nayie nani didili naali, ani adu akunda me ni u Yesu ka engú gba ani inde ani adu adje e-o. Ani atsia adu akunda nau ani me ani nde ngamene ngamba 'ngú. ⁹ Ani ayiyi Yesu li ongú bhelé. Engú bini, Yesu gie 'ngú pi ani tété belegu de bini. ¹⁰ Ongbengbe odimandø di ne omusuno na líli gba Moidje adu oo. U adu apa 'ngú li kute ani sisiti naali. ¹¹ Elode ne osudha gba e amu ani, u atsia asosobho di ani. Pipita-a, u adyi bádha bongo li ani, u atsia agie ani pi Pilatø. ¹² Kalanu-o, Elode ne Pilatø du nadje lio de. Nayie li 'kpí ang-o, u atsia akolo bhú makpolia.

U akodho 'ngú gba Yesu me ani kpi bha makpi (Tsia bhú Mat. 27:15-26; ne bhú Mlk. 15:6-15; di ne bhú Dja. 18:39 - 19:16.)

¹³ Abhomu-o, Pilatø apo bhúla ongbengbe odimandø, ongámási gba omaYuda di ne okpála. ¹⁴ Ani atsia apa pi uo me: «Yi ago ne kpála inde-e muma me ani ngaha kpéke 'ndji pi okpála. La-a, ma ayi ani li 'ngú ang-o kala yi si, ma u ani ne siti 'ngú belegu de bini bhú ká ndu 'ngú hana inde yi apa e li ani-o. ¹⁵ Elode u di siti 'ngú ka ani de anga ani agie ani pi ní ei. A moko me kpála inde-e mene siti 'ngú belegu de bini inde u ti da nabhøø ani ka e ko. ¹⁶ Kaka-a, ma abhí ani ne fimbo, ma atsia tsé 'kpa li ani.» [¹⁷ Bhú ndu anokomia na Pasika hana, a ayo me Pilatø

tse 'kpa li kpála inde u aholo e bhú tikpɔ-o pɪ uo bini.]

¹⁸ Engú bini, ndɔ uo hana aholo asusula bhú dabili bini me: «Bhøø kpála bhomɔ-o mabhøø, amba mɔ tse 'kpa li Balaba pɪ ya!» ¹⁹ (U aholo nani Balaba bhú tikpɔ anga ani agbe nani kpéke 'ndji abhú Yelusalema, ani atsia abhøø di kpála.) ²⁰ Pilatø adɔ akunda natse 'kpa li Yesu. Kaka-a, ani atsia ayi matá uo li 'ngú angoo ko. ²¹ Engú bini, u aholo bha nasusula me: «Gi ani li kulusi! Gi ani li kulusi!» ²² Bhøtsibhøtsi na bata-a, ani apa pɪ uo me: «Ani amene la mangua siti 'ngú dho? Ma u engú inde ani amene e, u ti da nabhøø ani ka e de. Ma abhí bha ani ne fimbo, ma tsia tsé 'kpa li ani.»

²³ Engú bini, u azi bha kekele tété kpekpeke me, a ayo me u gi Yesu li kulusi. U adɔ bha a'é'e 'li o ne bhúlá, akolo li nedhinga li 'li uo aha angu Pilatø lie ko. ²⁴ Abhomɔ-o, Pilatø atsia aziba namene maka u adɔ akukunda lie ko. ²⁵ Ani atsia atse 'kpa li kpála inde u adɔ ayo e-o, kpála inde u aholo e bhú tikpɔ-o. Padhá de, anga ani agbe kpéke 'ndji, ani atsia abhøø di kpála. Engú bini, ani atsia aha Yesu pɪ uo me u mene ne ani maka u adɔ akukunda lie ko.

U anɔ ne Yesu ngú nabhøø ani

(Tsia bhú Mat. 27:32-44; ne bhú Mlk. 15:21-32; di ne bhú Dja. 19:17-27.)

²⁶ Li osudha adɔ anɔ ne Yesu lie, u akø lio ne Simo, kpála na ndu doto na Silene, me ani nde ayie abhiye. U aholo ani, u atsia a'o kulusi gba

Yesu-o li 'ngbu ani me, ani bibi amba ani kpata Yesu ne di.

²⁷ Okpála bhelé adu akpata Yesu. Bhú ká uo-o, adu di ne olisi inde adu aku 'gbá ne nalopolo lio ngú ani-o. ²⁸ Yesu adji bhúla e ne apí uo, ani atsia apa pi uo me: «Ngayi, olisi na Yelusalema-a, yi akú 'gbá ngú ma de! Engú bini, yi ku mangbo egba ngú yi ne ongisi gba yi ko. ²⁹ Padhá de, anga oekpi koko akólo makolo, oekpi inde u apá lie me: <A ko djali pi olisi inde i zu de, inde i bi 'bhi de, di ne obhende li ongisi ndji 'ka o de-o!> ³⁰ Li nedhinga bhomu-o, okpála ahólo napa pi ongbengbe 'ta me: <Yi buku ya!>† ³¹ Padhá de, anga i du me okpála nde amene ndula bhe na yiyi-e mo-o, u méne la ibili naae ndula bhe na keke-e pi?»*

³² Li nedhinga bhomu-o, u anu di ne obhosi bhisi koko inde amene sisiti 'ngú naali me u bhili uo bhú dabili bini ne Yesu.

U agi Yesu li kulusi

(Tsia bhú Mat. 27:45-56; ne bhú Mlk. 15:33-41; di ne bhú Dja. 19:28-30.)

³³ U akolo li bili inde u a'i e me «Pelegendji.» U atsia agi Yesu li kulusi di ne okpála na sisiti bhisi-o, koko li kulusi gba e li pá 'kpa ani na kokpa, koko li kulusi gba e li pá 'kpa ani na gali. ³⁴ [Abhomu-o, Yesu atsia apa me: «'Dyi ma, mbu

† **23:30** 23:30 Tsia bhú Oz. 10:8. * **23:31** 23:31 Ndula bhe na yiyi-e, a ko Yesu. Ndula bhe na keke-e, a ko okpála.

li siti 'ngú gba uo, anga u mbila engú inde u ngamene e de.»]

Osudha agú gbanda ngú nagapa obongo gba ani-e li o. ³⁵ Okpála adu oo, u adu atsia engú inde adu akodho 'kpí-o. Ongámási gba omaYuda adu amu ani. U atsia adu apa me: «Ani akobho okpála koko. A ayo me ani kobho di lie ne titi e, i du me ani nde ne Masiya inde li Ebhe abhu e ko!»

³⁶ Osudha amu di ani. U adyudyo lio masakpe, u aha kpongadha pandi pi ani, u atsia apa me:

³⁷ «I du me mu nde bha ndju ne 'ngbé ngámá gba omaYuda-a, mu de kobho limu ne titi mu!»

³⁸ Pí 'ndji ani-e, u aye me: «A INDE-E 'NGBÉ NGÁMÁ GBA OMA YUDA-O.»

³⁹ Suka okpála na sisiti inde u agi o li kulusi adu asobho ani me: «Mu ne Masiya adi? Kobho limu ne titi mu, amba mu kobho di ya!» ⁴⁰ Engú bini, bhe koko ambe bhú 'ndji ani, do ani de-e: «Mu kpe Ebhe di, ngamu inde ngasia bhadi likabhu maka ani-e? ⁴¹ Pi ní-e, a li likabhu gba ní-e ne tata, anga ní ngasia bhomu-o mbini kulu gba ní ko. La-a, ngaani-e, ani mene naae siti 'ngú belegu de bini.» ⁴² Pipita-a, ani atsia apa pi Yesu me: «Bhundja ma uu, li nedhinga inde mo ogó lie ngú nau ngámá gba mu ko.» ⁴³ Yesu agie pi ani me: «Ma apa pi mu na paká me, naki-e, ní adú ne mu bhú dabili bini bhú kuti na munde yi ko.»

Yesu akpi

⁴⁴ A akolo masakpe de tulukpe, ela a'o nasu. Biti aha pila doto libhomu akolo li saa na bata pita tulukpe. ⁴⁵ 'Ngbé 'kpá bongo inde adu agbo

bhɔsɔ 'ngbé 'ti Ebhe gba omaYuda asidha bhɔsɔ e tɛtɛ má tsɛ! ⁴⁶ Abhomɔ-o, Yesu atsia asɔla kpekpeke me: «'Dyi ma, ma nga'o bua ma sa 'kpa mɔ.» Pita anɔ apa engú bhomɔ-o lie, anɔ atsia andala 'kpa li bua e. ⁴⁷ Li ngámá gba osɔdha na Loma au engú inde akodho 'kpí-e lie, anɔ atsia adɔ adhogɔ Ebhe me: «A ko paká me kpála inde e bha ndjɔ nako ne kpála na ngbingbili !» ⁴⁸ Ndɔ okpála hana inde ago apo bhúla o ngú natsia engú ango-o, au engú inde akodho 'kpí-o. U atsia adɔ agie lio agba o me u nde abubu 'kpa o pí 'ka o ka likabhu. ⁴⁹ Ndɔ obɔ Yesu hana di ne olisɔ inde adhɔkɔ ne anɔ bhú dabilɔ bini nayie bhú Galilaya-a, alɔlɔ mbo tsutsu. U adɔ natsia engú inde adɔ akodho 'kpí ko.

U azi Yesu

(Tsia bhú Mat. 27:57-61; ne bhú Mlk. 15:42-47; di ne bhú Dja. 19:38-42.)

⁵⁰⁻⁵¹ Kpála bini adɔ nani oo. A adɔ 'li anɔ me Djodjefɔ , kpála na Alimaté, sɔka gɔdhu gba omaYuda. A ko nani kpála na babadha inde adɔ di ngbingbili. Anɔ adɔ nani nadjekɛ nago ka Naɔ gba Ebhe píla doto. A ko nani sɔka Libi okpála natsia 'kpí li ongú gba omaYuda-o. Engú bini, anɔ dɔ aziba engú inde li Libi okpála natsia 'kpí li ongú gba omaYuda adɔ abhundja e di ne namene e li Yesu-o de. ⁵² Anɔ anɔ abhaka Pilatɔ, anɔ atsia ayo kuo Yesu ka anɔ. Pilatɔ aziba. ⁵³ Pipita-a, anɔ atsia a'e kuo anɔ li kulusi-o. Anɔ agagala ne bongo. Anɔ atsia ato bhú lata inde u adjɔ e bhú teme, lata inde u zi nga kpála bhú

e kalanu de. ⁵⁴ A adu nani 'kpí kulu bhuluvue, masikpe de ekpí nago .

⁵⁵ Olisi inde ayie nani ne Yesu bhú Galilaya-a, anu bhú dabili bini ne Djodjefu. U atsia lata-o, u au maka u a'o kuo Yesu lie bhúbhú-o. ⁵⁶ Pipita-a, u agie lio agba o. U atsia aleke emu, di ne mungotsi ngubula me sidi-e, u nu pulu kate kuo-o ne di. Li 'kpí nago-o, u atsia aguo maka li líli apa lie ko.

24

Yesu azuku

(Tsia bhú Mat. 28:1-10; ne bhú Mlk. 16:1-8; di ne bhú Dja. 20:1-10.)

¹ Bhú 'kpí yinga kèkpí má bhó-o, olisi aha mungotsi inde u agili e-o, u atsia agbida abhú lata. ² U abhaka me teme nde awawala li 'bhò lata-a awawala. ³ U ali lie, u bhaka kuo Ngámá Yesu de. ⁴ Nedhinga u adu akiaka lie ka 'ngú ango-o, kolo me-e okpála bhisi aze li uo. Okpála ango-o adyidyí bubu bongo má tuu tuu! ⁵ U adu la lie ne tsulu naali-e, u atutu bhúla o ne kuto. Okpála ango-o atsia apa pi uo me: «Yi ngagili kpála inde uu-o bhú ká okpála inde amu-o ka ni? ⁶ Ani sii ade. Engú bini, ani azuku. Yi bhundja engú nako ani apa e pi yi li nedhinga inde ani adu nga bha lie bhú Galilaya me: ⁷ «A ayo me u pu ma, Ndili gba kpála, pi okpála na sisiti. U gi ma li kulusi, amba bhú 'kpí na bata-a, ma tsia zuku.» ⁸ Abhomu-o, u atsia abhundja 'li ani-o.

⁹ U ayie bhú lata-o. U atsia anu nakpokpo ndu 'ngú bhomu-o hana pi obhala titima ndjikpa ne

ká bini, di ne ndu obhende adu ne uo bhú dabili bini-e hana. ¹⁰ Olisi ango-o, adu nani Malia , kpála na gudhu na Magadala, Djaani ne Malia , 'hi Djaki. Ngauo ne olisi koko inde adu bhú dabili bini ne uo akpokpo pi obhulu titima gba Yesu-o. ¹¹ Engú bini, obhulu titima abhundja naao me, engú inde li olisi akpokpo e-e, a ko engú na ngingi. Kaka-a, u tsia bhuka de. ¹² Engú bini, Piele ayie bhúlá, ani anu ne holo abhú lata. Ani akolo lie oo, ani akita ne kuto, ani atsia 'kpí, ani au bha bongo inde u agagala kuo ne e ko. Pipita-a, ani agie lie agba e me ani nde ngangamba naali ka engú inde akodho 'kpí ko.

*Yesu akoto li omukpata bhisi li kpadji na Emausi
(Tsia bhú Mlk. 16:12-13.)*

¹³ Bha li 'kpí ango-o, omukpata bhisi adu anu bhú kuti bini inde u a'i e me Emausi. Kutu ango-o adu de Yelusalema tsutsu, masikpe de kilometele ndjikpa ne ká bini. ¹⁴ U adu akpokpo 'ngú sunda o pindji ndu 'ngú hana inde akodho 'kpí-o. ¹⁵ Nedhinga uo adu akpokpo 'ngú di ne namene kpekebhe lie sunda o-o, ngaani Yesu makpe, ani adyudyo lie de uo masikpe. Ani atsia aholo 'nú ne uo bhú dabili bini. ¹⁶ U adu au ani, engú bini, ehe bini adu amene me u ambila ani de. ¹⁷ Ani ayi uo me: «A ko mangua 'ngú dho yi adji ne kpokpo e sunda yi me-e?» Abhomu-o, u ala, u atsia abedhe ne likabhu bedhe.

¹⁸ Suka uo bini inde adu 'li e me Keleopasi apa pi ani me: «Bhú ká ogomago na Yelusalema libhomu-o, engú inde akodho 'kpí sunda okpi

inde-e, mu mbila bha de ngamu kpi mu kpi?»
 19 Ani ayi uo me: «Mangua 'ngú dho?» U atsia agie pi ani me: «Engú inde akolo li Yesu, kpála na Nadjaleta! A ko nako polofeta kukulu. Ongú inde ani amene e ne bhende ani asuno e, ani amene ndundu hana ne angu. Ani atsia asuno ongu angu-o kala Ebhe di ne kala ndu okpála hana. 20 La-a, ongbengbe odimandø gba Ebhe di ne ongámási gba ní-e, apu ani me u bhøø ani. U atsia agi ani li kulusi.

21 La-a, ya adu nako ne 'to ya naaya me, a ko kpála inde agbégbé Isalaele bhú bali-o. Engú bini, a ane naki ekpi bata maka li oengú angu-o akodho 'kpi lie ko. 22 La matá di-e, ya angamba ka olisi koko bhú ka ya naali. U anu igini bhú sikikpi abhú lata. 23 Engú bini, u u kuo ani de. U agie lio, u apa pi ya me oandjelu aze lio. Oandjelu atsia apa pi o me ani uu. 24 Pipita-a, okpála koko bhú ká ya anu abhú lata, u atsia abhaka ndu 'ngú hana maka li olisi akpokpo lie ko. Engú bini, ngaani makpe-e, u u ani de.»

25 Abhomu-o, Yesu atsia apa pi uo me: «Yi ne ongingi! Ka ni yi ngabhuka lie má gala ade ndu 'ngú hana inde li opolofeta-a apa e! 26 A ayo nako de me Kilisito dje likabhu kala me ani li bhú nau na asasaua gba e di?» 27 Pipita-a, ani aholo nakpokpo ndu 'ngú hana inde u apa e pindji ani bhú obhuku gba Ebhe-e pi uo. Ani akpokpo nayie bhú obhuku gba Moidje akólo bhú obhuku gba ndu opolofeta-a hana.

28 U akolo lie de kuti inde u adu anu bhú e masikpe-e, Yesu amene mugito me ni adji tsutsu.

²⁹ Engú bini, u atsia apa pi ani me: «Ní si ne yi si, anga ekpí asegele, bita la di ngago.» Aní atsia ali ngú nasi bhú dabili bini ne uo oo ko. ³⁰ Nedhinga ani adu azu 'he lie bhú dabili bini ne uo-o, ani aha mapa, ani agie heni pi Ebhe. Pipita-a, ani agumu mapa-o, ani atsia aha pi uo. ³¹ Abhomu-o, djila uo abhulu, u atsia ambila ani. Engú bini, ani angita bha kolo bhú djila uo má pele! ³² U atsia aholo nayi lio sunda o me: «Li nedhinga inde ani adu akpokpo 'ngú di ne nasuno ta eli gba Ebhe lie pi ní li kpadji-e, bua ní bedhe igini bhú ní ne djali bedhe di?»

³³ Bha li nedhinga bhomu-o, u ayie bhúlá kolo má gala, u atsia agie lio abhú Yelusalema. Oo, u abhaka me obhulu titima ndjikpa ne ká bini-e nde apo bhúla o ne obi o-o bhú dabili bini. ³⁴ U atsia apa pi obhe bhisi bhomu-o me: «Ngámá azuku na kukulu! Simo au ani!» ³⁵ Pipita-a, omukpata bhe bhisi-e atsia akpokpo 'ngú inde akodho 'kpí li kpadji-e pi uo, di ne maka u ambila Yesu lie li nedhinga ani agumu mapa lie ko.

Yesu asuno lie pi omukpata gba e-o

(Tsia bhú Mat. 28:16-20; ne bhú Mlk. 16:14-18; ne bhú Dja. 20:19-23; di ne bhú Kul. 1:6-8.)

³⁶ Li nedhinga u adu nga bha lie nakpokpo 'ngú ango-o, Yesu atsia alu bhú ká uo. Do ani pi uo me: «Guo 'ngú du bhú dabili bini ne yi!» ³⁷ U adje tsulu naali, u atsia aholo aguku, anga u adu abhundja me o ou igbadyibhe. ³⁸ Engú bini, Yesu atsia apa pi uo me: «Yi ngadje tsulu ka ni? Yi ne bua na bhisi bhisi ka ni? ³⁹ Yi tsia nga 'kpa ma di ne 'dhu ma, a ko bha ma makpe. Yi tana

nga kute ma, amba yi u, anga mbilika ne biki li igbadyibhe ade maka yi ngau ma lie ne di ko.»

⁴⁰ Ani apa engú bhomu-o lie, ani atsia asuno 'kpa e di ne 'dhu e pi uo. ⁴¹ Li djali di ne nangamba aha angu uo lie naali-e, u tsia bhuka ngaiza de. Ani atsia ayi uo me: «Mbo 'he nazu mazu ka yi si uu?» ⁴² U atsia aha ndu sungu inde u azi e mazi-e pi ani. ⁴³ Ani aha, ani atsia azu li djila uo oo.

⁴⁴ Pipita-a, ani pi uo me: «Ma apa nako pi yi ndjindji nedhinga ní adu nga bha lie bhú dabili bini-e me, a ayo me ndu 'ngú hana inde u aye e pindji ma bhú líli gba Moidje , bhú obhuku gba opolofeta di ne bhú bhuku na oetsi gba ní-e, amene lie.» ⁴⁵ Pipita-a, ani atsia abhulu imbilangú gba uo ngubula me u mbila ta engú inde u aye e bhú oBhuku gba Ebhe ko. ⁴⁶ Ani atsia apa pi uo me: «Maka u aye lie bhú oBhuku gba Ebhe-e me, a ayo me Kilisito dje likabhu, amba ani tsia zuku bhú 'kpí na bata. ⁴⁷ A ayo me okpála kpokpo 'ngú gba ani-e pi ndu okpála hana píla doto libhomu. U akpókpo nayie bhú Yelusalema me okpála dji bua o, amba Ebhe 'e siti 'ngú gba uo ko. ⁴⁸ Yi au engú inde akodho 'kpí-e ne djila yi makpe. ⁴⁹ Ngama-a, ma atíma pi yi bhende li 'Dyi ma apa me ni atíma e-o. Kaka-a, yi du bha bhú gudhu si akólo li 'kpí inde li Ebhe atíma angu pi yi lie ko.»

Ebhe aha Yesu abhúlá

(Tsia bhú Mlk. 16:19-20; di ne bhú Kul. 1:9-11.)

⁵⁰ Pipita-a, Yesu anu ne omukpata gba e masikpe de kuti na Betania. U akolo lie oo, ani

a'e 'kpa e, ani atsia atuko bisagu pí uo. ⁵¹ Li nedhinga ani adu atuko bisagu pí uo lie, ani ayie bhú ká uo. Ebhe atsia aha ani abhúlá. ⁵² Ngauo-o, u adhөгө ani. Pipita-a, u atsia agie lio abhú Yelusalema me u nde abedhe ne djali bedhe. ⁵³ Ndu 'kpí hana, u adu nadu bhú 'ngbé 'ti Ebhe gba omaYuda ngú nadhөгө Ebhe.

cxviii

Gandja na Mbia
Mayogo: Gandja na Mbia (New Testament)

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

6b4904fb-f8ce-5931-8218-7cee8914232c